

ВИЛЬЯМ ШЕКСПИР

ТАНЛАНГАН АСАРЛАР

Беш жилдлик

Биринчи жилд

Тошкент
Faafur Fулом номидаги Адабиёт ва санъат нашриёти
1981



РОМЕО ВА ЖУЛЬЕТТА

МАҚСУД ШАИХЗОДА
таржимаси

ИШТИРОК ЭТУВЧИЛАР

Эскал — Верона беги.

Парис — Ёш дворян, бекнинг қариндоши.

Монтекки } — Бир-бирига душман икки оиланинг
Капулетти } бошлиқлари.

*Чол — Капулеттининг қариндоши.

Ромео — Монтеккининг ўғли.

Меркудио — Бекнинг қариндоши ва Ромеонинг дўсти.

Бенволио — Монтеккининг жияни ва Ромеонинг дўсти.

Тибалт — Капулетти хонимнинг жияни.

Роҳиб Лаврентий } — Францискан роҳиблари.

Роҳиб Иоани }

Балтазар — Ромеонинг хизматкори.

Самсон — Капулеттининг хизматкорлари.

Григорий

Петр — Жульетта энагасининг хизматкори.
Абрам — Монтеккилар хизматкори.
Дорифуруш
Уч созанда

Париснинг маҳрами.

2- маҳрам.

Миршаб.

Монтекки хоним — Монтеккининг хотини.

Капулетти хоним — Капулеттининг хотини.

Жульетта — Капулеттининг қизи.

Жульеттанинг энагаси.

Верона фуқароси; ҳар иккала хонадоннинг қариндошлиридан бўлган бир неча эркак ва хотинлар; ниқобли кишилар, посbonлар, қоровуллар, бекнинг аъёnlари ва хор. Воқеа: Верона ҳам Мантуяда ўтади.

ПРОЛОГ

ХОР КИРАДИ

х о р

Бизнинг Веронада икки хонадон
 Аслу насаблари эрур баробар,
 Улар низоларга киришиб ҳар он —
 Шу шаҳар аҳлига етказди зарар.

Ва лекин бу душман оиласардан
 Туғилган фарзандлар севишиб қолди.
 Бу икки баҳтсизнинг ўлими билан
 Адоват ўзи ҳам гўрда йўқолди.

Шу баҳтсиз ёшларнинг муҳаббатини,
 Ужар хонадонлар адватини,
 Аламли севгининг мусибатини
 Кўрсатиб берамиз сизга шу куни.
 Сизлар кечиринглар нуқсонимизни,
 Ўйнаймиз аямай биз жонимизни!

I ПАРДА

БИРИНЧИ САХНА

Верона, Майдон.

Капулеттипинг Самсон ҳам Григорий деган хизматкорлари қилич ва қалқонлар билан қуролланган ҳолда кириб келадилар.

Самсон

Григорий, қасам ичаманки, бизларни қоралашла-рига сира ҳам чидамайман.

Григорий

Сира ҳам! Бўлмаса бизлар кўмирчи бўлган бўлар эдик¹.

Самсон

Яъни, демоқчиманки, агар қаҳрланиб юзларимиз қорайиб кетса, албатта ёқалашамиз.

Григорий

Хўш, ҳозирча тирик экансан, бўйнингни қора сиртмоқдан чиқариб қўй.

Самсон

Менга сал-пал тегишиб кўрсинглар-чи, калтаклаб ташлайман.

¹ Бу ерда кўмирчи дейишдан мақсад: ҳар ким ҳам маска-ра қилиб туришга сазовор бўлинган паст ҳунар эгалари.

Григорий

Тұғри-ю, аммо сени калтакбоз қиласман деб жаҳ-лингни чиқариш ҳам унча жүн бўлмаса керак.

Самсон

Монтекки ҳовлисинг ҳар бир кучуги менга тегишиб ўтади.

Григорий

Сенга тегилган бўлса, сен ҳам қимир этишинг ке-рак-ки! Мард бардош бериши шарт! Аммо-лекин, сенинг қимир этганинг — аллақачон қочиб кетганинг!

Самсон

Йўқ, шу ҳовлининг бирон кучуги менга тегиб қўйса, бардош бериб қаттиқ тураман. Мен ўзим ёл-ғиз бошимга ўз арк деворимизни Монтеккиларининг ҳар қанақа эркагидан ҳам, қизидан ҳам сақлаб олурман, ҳа ўзим!

Григорий

Шунинг ўзи кўрсатадики, сен ожиз банда: ахир, ожизлар деворга орқасини суяб туради-да!

Самсон

Гапинг тўғри; шу сабабли аёлларни, мўрт идиш деб доимо девордаги токчаларга тиқиб қўядилар-да! Мана мен ҳам Монтеккилар ҳовлисинг ҳар қайси бўз боласини девордан ошириб ташлаб, қизларини бўлса деворга суялтираман-да!

Григорий

Эҳ.., бизга нима? Хўжайниларимиз ўзаро бўгиша-версин! Биз фақат уларнинг қароли — бандаси, холос!

Самсон

Барибир! Мен чинакам шаддод бўлмоқчиман: эркакларни калтаклаб адабларини бериб бўлганимдан кейин, мен қизларга ҳам шафқат қилмоқчи эмасман, мен уларнинг қаллаларини олиб ташлайман.

Григорий

Қизларнинг қаллаларини-я?

Самсон

Қаллалариними? Бошқа жойлариними? Ишқилиб, ўзинг билганингча тушунавер!

Григорий

Ўҳӯ: сенинг бу шаддодлигинги кўрганларгина тушунади, дейман!

Самсон

Мен қанчалик бардош беришимни улар яхши тушуниб қолишар: ахир ҳаммага машҳур ва маълумки, менинг этларим жуда ҳам, жуда ҳам қаттиқ!

Григорий

Хайриятки, сен бошлиқ эмас! Бўлмаса, сендан ўтакетган бадҳазм қоқ балиқ чиққан бўлар эди! Ҳай, шашларнинг ол, Монтеккиларнидан икки киши бу ёққа келяпти!..

Абрам ва Балтазар кириб келадилар.

Самсон

Шашпарим шай! Сен жанжални бошлайвер, мен сенинг орқангда турибман!

Григорий

Ҳай, тағин орқангни орқамга ўгириб чап бера кўрмал!

Самсон

Мендан хавотирланма!

Григорий

Йўқ, худо урсин, мен сен учун хавотирман!

Самсон

Менга қара, қонун бизни ёқласин учун, жим турайлик — жанжални улар бошласин.

Григорий

Мен уларнинг ёнидан қовоғимни солиб ўтай; улар буни қандай хоҳласалар шундай тушунаверсинлар.

Самсон

Хоҳласалар эмас, ботинсалар дегин! Мен уларга себарга кўрсатай. Улар бунга чидай олсалар, демак, биз уларни ҳақоратлаган бўламиз.

Абрам

Тақсир, сиз бизга себарга кўрсатяпсизми?

Самсон

Ҳа, тақсир, мен кўрсатяпман.

Абрам

Тақсир, сиз ҳали бизларга себарга кўрсатяпмнз, денг?!

Самсон

(Григорийнинг қулогига)

Мен, «Ҳа!» десам қонунга тўғри келадими?

Григорий

Йўқ!

Самсон

Йўқ, тақсир, мен сизларга себарга кўрсатаётганим
йўқ, мен умуман себарга кўрсатяпман.

Григорий

Сиз, тақсир, жанжал чиқармоқчимисиз?

Абрам

Жанжал дейсизми ,тақсир? Йўғ-е, тақсир!

Самсон

Агар сизлар жанжал чиқаришни хоҳласадаринг,
мен тайёр! Менинг хўжайиним сизникidan кам эмас.

Абрам

Зиёд ҳам эмас!

Самсон

Майли, тақсир!

Бенволио кириб келади

Григорий

(Самсонга астагина)

Зиёддир дегин! Хўжайинимизнинг қариндошлари-
дан бири бу ёққа келаётиди.

Самсон

Зиёддир, тақсир!

Абрам

Елғон!

С а м с о н

Агар әркак бўлсаларинг, қани, уришинглар! Григорий, ўша мақтаган зарбангни кўрсатиб қўй-чи. (Уришадилар.)

Б е н в о л и о

(Уларнинг орасига тушиб ажратади)

Тентаклар!

Қилични ол! Бемаъни жанжални қара-ю! (Тибалът киради).

Т и б а л ь т

Уришасан сен ҳам қўрқоқ қароллар аро?
Бенволио, менга қара, ажалингга боқ!

Б е н в о л и о

Яраштиromoқ истар эдим. Қайтар қиличинг.
Ёки уни ишга солки, ярашсин булар!

Т и б а л ь т

Жанжал пайти, яраш сўзи? Бу сўз кўп мурдор,
Худди дўзах, худди сендей, монтеккилардай
Қани номард, воқиф бўл!

Уришадилар. Ҳар иккала хонадоннинг намояндалари,
булар кетидан шаҳар фуқароси ва таёқ тутган
миршаблар кирниб келадилар.

Ф у қ а р о

Ҳой одамлар! Чўқмор, найза олиб чиқ илдам!
Уринг Қапулеттини ҳам! Монтеккини ҳам!

Халат кийган чол Қапулетти ва Қапулетти
хоним кирадилар.

К а п у л л е т и

Бу қанақа шовқин? Беринг узун тифимни!

Капулетти хоним

Сизга қўлтиқтаёқ керак! Қилич нимага?

Капулетти

Буюрдимки, қилич бер, дёб! Боқ, чол Монтекки —
Менга қараб келмоқдадир қилич ўйнатиб!

Чол Монтекки ва Монтекки хоним кириб
келадилар.

Монтекки

Эҳ, сен олчоқ Капулетти! (Хотинига).

Қўй, хоним, хотин!

Монтекки хоним

Иўқ, балога йўлиқарсан, ёвни ахтариб!

Эскалбек ўз аъёнилари билан кириб келади.

Бек

Осойишнинг асов, бетинч душманларисиз,
Қариндошлар қони билан пўлатлар доғли,

Сизлар йиртқич одамларсиз, эшитмайсизми?
Томирлардан оқсан алвон булоқлар ила
Сўндирасиз адоватнинг қаҳрин, оловин, —
Мен жазолаш хавфи билан дейман сизларга:
Қуролларни ерга ташланг қонли қўллардан!
Эшитинглар қаҳрланган бекнинг ҳукмини:
Уч мартаба кўп беҳуда ўзаро низо
Чиқардинглар сен Монтекки, сен Капулетти,
Осойишта кўчаларда қизди жанжаллар,
Уч мартаба бу фуқаро хоҳлар хоҳламас
Ҳашаматли сарупо-ю, либосни ечиб
Мажбур бўлди ушламоққа қадим қуролни
Ва ёқлади бу низода бирон тарафни.
Бундан буён, ё сен, ё сен бузсанг тартибни —

Тиячлик бузган гуноқкор деб қатл этиласиз.
 Аммо бу гал, ҳаммаларинг, тарқаб кетинглар!
 Мен билан сиз бирга юринг, чол Капулетти.
 Сиз ҳам бугун маҳкамага боринг, Монтекки,
 Ҳукм: Вилла-Франқуда чиқарилади,
 Эшитарсиз у девонда фармонимизни,—
 Қолганларинг, уй-уйларга йўқолиб кетинг!

Монтекки, Монтекки хоним ва Бенволиодан бўлак ҳамма
 чиқиб кетади.

Монтекки

Яна кимлар бошлади-я эски низони,
 Иўқмидингиз, бошлангандা бу жанжал, жиян?

Бенволио

Мен келганда жанжал қизиб, ёқалашганди
 Икки уйнинг қароллари бу ерда қаттиқ
 Мен уларни ажратмоқчи бўлдим, шу онда—
 Тибалт қизиб кириб қолди, тиғ яланғочлаб,
 Уйнатарди бош устида дўқ қилиб менга,
 Чийилларди ҳаволарни ёриб қиличи.
 Қизиб кетди сўз ва қилич муҳорабаси.
 Оломон ҳам етиб келди, бўлди жанг-жадал;
 Ҳаммалари тинчиди бек келгандагина.

Монтекки хоним

Оҳ, Ромео қайдада экан? Қандай шодманки—
 Бу балодан омон қолди кўринмай қолиб!

Бенволио

Хоним, ҳали, шарқнинг олтин деразасидан
 Тонг чорининг шуълалари липилламасдан —
 Мен ҳасратим босилсан деб кезгани чиқдим!
 Шаҳримизнинг қалъасидан кунботар томон —
 Үсиб чиқсан анжирларнинг соясида мен
 Уғлингизни кўриб қолдим, бироқ у дарҳол

Яширинди, кириб кетди қалин ўрмонга.
 Мен ҳам бундай туйгуларга ошноман-ку:—
 Қачон ўзинг ўз дилингта зил бўлиб кетсанг,—
 Сен бешбадтар ўзгалардан ҳазар қиласан.
 Таъқиб этмай қайтиб келдим, зотан шод эдим —
 Мендан қочган бир кимсадан қочганимга мен.

Монтекки

Кўп кўрганлар саҳарларда уни ўрмонда;
 Қўшар экан шабнамларга кўз ёши намин,
 Булутларга қўшар экан ноладан булат;
 Лекин, қуёш кун чиқарнинг қирғоқларида —
 Тонг париси ётогидан қора пардани
 Бир ирритиб ташлар экан, ўша соатда —
 Фамгин ўғлим нурдан қочиб келаркан уйга,
 Бекинаркан хонасида ҳамма оламдан;
 Епар экан офтобдан деразасини,
 Ясар экан ўзи учун сунъий бир кеча!
 Қора, ўсал бир ранг бордир унинг дилида,
 Эзгу панду — ўгитгина најотдир унга.

Бенволио

Биласизми бунинг важҳин, азиз амаки?

Монтекки

Билолмайман, билмоқлик ҳам қўлимдан келмас!

Бенволио

Қаттиқ туриб қайта-қайта сўрадингизми?

Монтекки

Сўраганман, сўрадилар дўстлари ҳатто:
 Аммо фақат қулоқ солар туйғу пандига,—
 Насиҳатчи туйғу бўлса, билмайман қалай?
 У ичидан пишган, писмиқ ҳамда камсухан,
 Юрак сириц очмоқликка йўқдир тоқати.

Ич-ичини қуртлар еган қуртак бўлади,
На баргларин кўкартишга мажол топади,
На қуёшга бера билур ўз жамолини,—
Мана шундай гулламасдан сўлмоқда ўғлим.
Зора билсак қайдан келган шу дарду алам,
Биз давосин топиб унга берурмиз барҳам!

Ромео киради.

Бенволио

Мана келди. Четга туриңг, шу илтимосим!
Бу сирларниң ҳаммасини билмоқлик лозим!

Монтекки

Барака топ, ниятингга етгайсан, болам,
Ростин билгин! Қани энди кетдик бизлар ҳам!

Монтекки ва хотини кетадилар.

Бенволио

Хайрли кун!

Ромео

Шунча барвақт?

Бенволио

Соат тўққиз-ку!

Ромео

Ғам-ғуссали соатларниң умри ҳам узун,
Ҳозир бундан кетган киши отам эмасми?

Бенволио

Худди ўзи! Нима чўзар соатингизни?

Ромео

Соатларни тезлаштирган бирор йўқлиги!

Бенволио

Мұҳаббатми?

Ромео

У йүқ бўлса...

Бенволио

Нима, севгими?

Ромео

Сен севсаигу севилмасанг, мана фожиа!

Бенволио

Афсусларки, кўринишда ширин бўлган ишқ-а,
Амалда-чи, шунча аччиқ, шунча жафокор!

Ромео

Афсус, севги кўр бўлса ҳам, бўлса ҳам кўзсиз,
Қайга деса бизни судрар сўроқсиз — сўзсиз!—
Кўй шуларни, қани, қайдা овқатланамиз?
Ҳайҳот, ҳали бунда катта тўполон бўлган.
Галирма, қўй! Мен ҳаммасини эшишиб билдим!
Нафрат, — мудҳиш; аммо севги уйдан мудҳишроқ!
Э гаразли ишқу савдо, э нозанин ёв!
Э борлиқлар, э ҳечликлар, э нур ва зулмат!
Осонлик ё машақатлик, тезлик ва савлат,
Кўринишда гўзал, асли паришон суврат:
Кўргошин пат, равшан тутун, совуқ аланга.
Соғлом касал ё уйқуда ухлаган бедор...
Севилмасдан бир севгига бўлдим гирифтор.
Гапларимга кулмайсанми?

Бенволио

Йўқ, йиглаяпман.

Ромео

Хўш, нимага, яхши йигит?

Бенволио

Дардингга дилбанд.

Ромео

Бу балога йўлиққанлар бари дардиманд.
 Бусиз ҳам кўп оғир эди дилимда аlam,—
 Аламингдан ўз аламим ортди яна ҳам.
 Модомики мени шунча яхши кўрассан,
 Шу севгидан хасталигим кўпайди, билсанг!
 Muҳаббат, бу — фарёдлардан ёйилган тутун,
 Назаримда аммо ўтдай кўринар бутун;
 Ё кўз ёшдан жамарилган мотам денгизи...
 Бу доно бир жинниликми? Нимадир бу ҳол?
 Бизни каракт қилган музлик ёки ширин бол?
 Кайр энди, биродарим!

Бенволио

Йўқ, мен ҳам бирга.

Бу балода қўямани мен сизни якка?

Ромео

Шу... Узимни йўқотибман, бўлибман хароб!
 Ромео йўқ, қайдадир, хўш... Ким бергай жавоб?

Бенволио

Айтиб қўя қолинг, дўстим, севганингиз ким?

Ромео

Хузуримда фигон тортиб ингра, дейсанми?

Бенволио

Йўқ, асло йўқ! Фақат исмин сўйласангиз, бас.

Р о м е о

Бу — касалга; васият қил, деган билан тенг.
 Ишон дўстим, бу кўп оғир жафокор бўйруқ!
 Севганим ким? Билмоқчисан? Битта хотин-да!..

Б е н в о л и о

Ишқ ҳегандада, мен хотинни олдим ҳадафга.

Р о м е о

Бўлмаса сен зўр мергансан: севганим — жонон!

Б е н в о л и о

Демак, уни кўзлаб отмоқ шунчалик осон!

Р о м е о

Янглишибсан: унга қараб севги илоҳи
 Беҳудага мўлжал олиб узганди ўқни;
 У Диана — ой тангриси, ғоят зеҳили.
 Бегуноҳ қиз совутидан ўқлар ўтолмас!
 Ўқни унга тегдиролмас севги илоҳи!..
 Уни сўзга қамал қилсанг пинагин бузмас,
 Үраб олган қаролларга ғоят жиддийдир,
 Олтинларнинг жозибаси унга дахлсиз,
 Гўзаликка бой бўлса ҳам, афсуски ажал —
 Самарасиз гўзаллигин қамрар бир маҳал.

Б е н в о л и о

У умрбод қиз қолишга қасам ичганми?

Р о м е о

Ҳа, ҳасислик, саҳродаги чечак сингари,
 Илтифотсиз гўзаликни саррайтиради,
 У зурриёт чечагидан қолур бебаҳра.
 У оқила, у ҳусндор, гўзал бағоят,

Мен ишқида дардлар топдим, у эса — жаннат;
 У севгидан воз кечишга онт ичди, ҳайҳот,
 Сүзи қатый, мен хоҳ ўлай, хоҳ қолай ҳаёт!

Бенволио

Сизга менинг маслаҳатим: ўйламанг уни!

Ромео

Ургатгин, оҳ, қандай қилиб унутай уни!

Бенволио

Кўзингизга эрк берингу, ҳар ёққа қаранг,
 Кўринг тўйиб бўлак сўлим гўзалларни ҳам!

Ромео

Шу усулни гар қўлласам, кўражакманий,
 Бошқаларнинг ҳаммасидан удир афзалроқ!
 Хонимларнинг лешонасин ўпувчи никоб
 Узи совуқ, аммо гўзал юзни яширап...
 Ҳа, кўр бўлиб қолган сира унута олмас —
 Кўзнинг нури нақадарлик азиз хазина!
 Менга шундай бир гўзалини кўрсатиб берки:
 Бир хотира дафтаридаи ўқий шу сўзни:
 «Ҳар гўзалдац яна ўзга бир гўзал аъло!»
 Унутмоқлик ҳунарини ким ўргатар? Хайр!

Бенволио

Мен ўргатай ёки куйсин менинг виждоним!

Чиқиб кетадилар.

I. ИҚКИНЧИ САҲНА

Кўча.

Капулетти, Парис ва хизматкор кириб
 кёладилар.

Капулетти

Монтекки ҳам мен сингари жазоланишидир,
Бу жазомиз жаримадан иборат бўлди,
Икки чолга мушкул эмас сулҳни бузмаслик!

Парис

Сиз ҳам, у ҳам кўп муҳтарам киши экансиз —
Таассуфки, хусуматда яшайсиз мудом,—
Хўш, ҳалиги сўроғимга жавоб не бўлди?

Капуллети

Илгариги жавобимниг худ ўзгинаси.
Қизим ҳали киборларнинг оламин билмас:—
У ҳаммаси бўлиб энди ўн тўртга кирди.
Яна гуллаб ўтиб кетсин икки ёз фасли —
Ушанда қиз никоҳ учун етилиб қолар!..

Парис

Ундан ҳам ёш оналар бор масъуд, баҳтиёр!

Капуллети

Шунинг учун, зотан, улар эрта сўлади,
Ерга кўмдим мей ўзимниг ҳамма боламни:
Фақат бу қиз умидгоҳdir менга дунёда!
Қиз кўнглини топинг, Парис, баҳтга эришинг!
Рози бўлса, мен қиттак ҳам йўқ демагайман,
Иигитлардан сизнингина у танлаб олса
Мен ҳам берай овозимни сиз учун роса!..
Эски удум: бизникида бугун зиёфат,
Меҳмонларни кечқуринг қилганман даъват;
Лекин, фақат менга маъқул меҳмонлар бўлар,
Бу қаторда ҳаммадан ҳам бизга сиз азиз.
Биз фақирнинг хонасига ташриф буюринг,—
Жонояларни кўрсатаман юлдуздан порлок,
Сиз кўрарсиз соғлом ёшлик келтирган шавқни,

Шундай шавқки, худди ўхшар чўлоқ қишдан

сўнг —

Келиб қолган зебо баҳор севинчларига;
Сиз тотирсиз раъно қизлар ширинлигини,
Ҳаммасини кўриб, тинглаб яхшисин танланг.
Мана шулар орасида бизнинг қиз ҳам бор,
Аммо ғолиб бўлишлиги мен учун гумон...
Қани, тўрам, бирга юринг, бу ёққа, қани!

(Хизматкорга қоғоз бериш).

Сен-чи, бориб жар чақиргин Верона бўйлаб,
Рўйхатдаги меҳмонларни, азиз дўстларни,
Таклиф қилгин, бугун кечга бизнинг қўрага!

Капулетти ва Парис кетадилар.

Хизматкор

Рўйхатдагиларнинг ҳаммасига жар қил эмиш! Қайдам! Эҳтимол, бу қоғозга: этикдўз — газчўпни, машиначи — бигизни, балиқчи — қаламни, бўёқчи — тўрни қўлласин — деб ёзилгандир, қайдам? Бунга ёзилганиларни топгайсан деб буюрдилар; мен бўлсам бу ерга ёзган киши нима ёзганини асти тушунолмайман!!! Доно-ю, донишмандлардан сўраб кўрай-чи! Ана ўзлари ҳам келиб қолдилар!

Бенволио ва Ромео кириб келадилар.

Бенволио

Ишон менга, ўтнинг бири бўлагин босар,
Янги оғриқ даволайди эски оғриқни,
Янги алам камайтирас бўлак аламни,
Ва бошқача эсанкираб айланар бошинг!
Майли, кирса кўзимизга янги дард машъум,
Уша соат йўқолгуси олдинги заққум!

Ромео

Ҳозир менга мос келарди отқулоқ барғы.

Бенволио

Нима? Нега?

Ромео

Менинг синган оёғим учун.

Бенволио

Эсу ҳушиңг жойидами, ўзи нима гап?

Ромео

Жойида-ю, телбалардай кишанланганман,
Мен зиндонда, бир бандиман бетаом, бекуч,
Жафокашман... Ҳа, йигитча, ҳа, хайрли кун?!

Хизматкор

Хайрли кун! Биласизми хат ўқишини сиз?

Ромео

Ҳа, ўқийман, қайғулардан ўз қисматимни!

Хизматкор

Бунисини сиз бекитиб машқ қилған бўлсангиз кепак. Сўраганим шу важданки, шу кўриб турганингизни ўқиб бероласизми?

Ромео

Ҳа, тил ва алифбени билсам, албатта.

Хизматкор

Сиз ҳалол жавоб берар экансиз! Дард кўрманг!

Р о м е о

Тұхта, йигит, сейга үқиб берай (*ұқиәди*): «Синьор Мартино ўз хотини ва қыздари билан, граф Аんсельм ва унинг ойжамол сингиллари; аламзада бева Витрузио хоним; Плаченцио афанди ва унинг нозанин жиянларни, Меркуцио ва унинг биродари Валентин; амаким Қапулетти, унинг хотини ва қыздари боқам; менинг жонон жияним Розалина; Лидия, Валендио жаноблари ва унинг амакивачаси Тибалт, Лючио ва унинг шұх Еленаси...» Нур аълонур бир жамият-ку; қаёққа таклиф қилишади?

Х изматкор

Тепага.

Р о м е о

Тепаси қаерда?

Х изматкор

Бизникига, кечки овқатга!

Р о м е о

Кимнинг уйига?

Х изматкор

Хұжайнимникига-да!

Р о м е о

Буни мен боя сұрашим керак эди.

Х изматкор

Энди ҳеч қандай сұроқсиз сизга айтиб берай: менинг хұжайним донг чиқарған боёнлардан Қапулеттидір. Агар, сизлар Монтеккилардан бұлмасаларинг,

бир қадаҳ шаробни уриб шимиргали бизникига марҳамат қилгайсизлар! Яхши қолинг! (Кетади).

Б е н в о л и о

Капулетти уйидаги бу зиёфатда
Соҳибжамол бизнинг машҳур дилбарлараро
Сенинг азиз Розалинанг бўлгуси албат!
Бор у ерга, шошилмайин оғир кўз ташла,
Таққослаб чиқ бу қизларни севганинг ила —
Зордан қора кўрингуси сенинг оққушинг!

Р о м е о

Менинг кўзим ўз ишқимга сўзласа ёлғон,
Кўз ёшларим алантага айланса, кошки!
Шаффоф коғир бўлган кўзлар учун ўлимдир
Ёлғон айтиб ўртамоқлик, тошдай куймаслик.
Севганимдан гўзалроқми? Йўқ баробари —
Жононимнинг, дунё пайдо бўлгандан бери!

Б е н в о л и о

Сиз кўргансиз доим уни якка-ягона,
Ёйида ҳеч бўлмагандир бирон дугона,
Таққослай деб кўздан ясанг гўё тарози,
Бир кафида бошқа бир қиз, бирида ўзи,
Кўрарсизки ундан ҳам бор келишган жонон,
Унутарсиз бу биринчи ёрни ўша он.

Р о м е о

Бораману лекин бўлак ёрни деб эмас,
У олдинги нигоримнинг дарди менга бас.

(Кетадилар.)

УЧИНЧИ САҲНА

Капулетти уйида бир хона. Капулетти хоним билан
энага кириб келадилар.

Капулетти хоним

Қани менинг, қизим, қани? Дарҳол чақиргин!

Энага

Онт ичаман, маъсум қизлик иффати ҳақи,

Уни боя, чақиргандим: Қўзичоқ! Қумрим!

Қани, қизча? Вой ўлай э — қани Жульетта?

Жульетта кириб келади.

Жульетта

Хозир мени ким чақирди?

Энага

Сизнинг онангиз.

Жульетта

Мен бу ерда. Нима керак, азиз онажон?

Капулетти хоним

Биласанми... Бизни бирпас қўйгин, энага,

Гаплашгани галимиз бор,— йўқ, сен ҳам қолгин:

Үйлайманки: сен ҳам буни эшитсанг бўлар,

Қизим бўйга етганини ўзинг биласан!

Энага

Хоҳласангиз ёшларини соатлаб айтай!

Капулетти хоним

У ўн тўртга тўлган эмас!..

Энага

Йўқ, йўқ албатта.

Тўлган эмас, онт ичаман тишларимгаки,

Гарчи, бор-йўғи тўртта тишгинам қолган.

Неча кун бор авлиёмиз Пётр ҳайитига?

Капулетти хоним

Ҳали икки ҳафтадан сал ошиқроқ қолган.

Энага

Икки ҳафта ё ошиқми, шуни биламан:
 Ўн тўрт ёшга у тўлғуси Пётр кечаси.
 Унга тенгқур бўлар эди, қизча Сусанна.
 Аммо худо уни олди. Раҳматлик бўлсин!
 Пешонамга ёзгани шу. Қисмат шу экан!
 Демоқчиман, Пётр куни ўн тўртга тўлар!
 Дарвоқе бунақадир. Яхши эсимда —
 Зилзиладек ўтиб кетди расо ўн бир йил.
 Уша куни мен кўкракдан ажратдим уни.
 Мен у кунни ҳеч эсимдан чиқаролмайман,
 Кўкрагимга аччиғ кўкат суркаб, ўлтиридим
 Қантархона ёнидаги офтобрў жойга.—
 Бой сиз билан Мантуюда меҳмон эдилар —
 Йўр-е, эссиzl Эсни қара, ҳа-ҳа, шундайди.
 Аччиғ кўкат сўриб олгач, болагинамиз
 Оғизлари куйиб кетди, тентак қизчанинг,
 У аразлаб кўкракни ҳам итариб қўйди.
 Шунда бирдан қантархона қарсиллаб кетди —
 Мен жойимдан туриб қочдим безовта бўлиб.
 Уша кундан энди ўн бир йил ўтиб кетди;
 Эндиниң қиз оёққа босган эди,— йўқ,
 У пилдираб югуради, қасам ичаман!
 Бир кун олдин пешонаси ёрилган эди.
 Эсимдадир менинг эрим — худо раҳматлик,
 Хушчақчақ бир киши эди,— қизни кўтариб:
 «Бу қандай гап? Ииқиласан, деди, юз билан?
 Чалқанчага йиқилгайсан ақлга киргач,
 Тез фурсатда шундай бўлар, шундайми, болам?»
 Тушмагур қиз дами ўчиб бирдан деди: «Ҳа!»
 Уша ҳазил чиқаётир энди рўёбга,
 Худо ҳақи, умр кўрсам неча юз йиллаб —

Унутмайман, эрим девди: «Шундайми, болам?»
Тентак қизча йигисини босиб деди: «Ха!»

Капулетти хоним

Бўлди, энди, гапинг қурсин, сайрашни бас қил!

Энага

Хўп, хўп! Аммо кулгим қистар эсимга олсан,
Бирдан босиб йигисини «ҳа» деганини!
Чаккасидан чиққан фурра, ищонтираман,
Нақ тухумдай келар, десам асло лоф эмас.
Ваҳимали эди бу шиш, у ҳўнграр эди.
Эрим деди: «Йиқиласан нега юз билан
Бўйга етгач йиқилгайсан чалқанчасига,
Шунақами?»
Қизча босиб йигисини бирдан деди: «Ха!»

Жульетта

Қўй, энага, бўлди энди, илтимосим шу!

Энага

Аллақачон жим турибман, худо асраруп,
Ҳеч кимни ҳам сенча яхши боққан эмасман.—
Тўйингни ҳам кўрсам қолмас эдим армонда.

Капулетти хоним

Худди тўйдан гаплашгани сен билан, қизим,
Мен бу ерга келдим. Қани айтинг, Жульетта,
Эрга тегиши ниятингиз борми, айтингиз!

Жульетта

Бў шарафни хаёлга ҳам келтирмаганим.

Энага

Мен-ку, сенинг энагангман, яхши биламан:
Сутим билан эмиб олдинг ақлу фаросат!

Капулетти хоним

Ана шуни ўйлаб кўринг, ҳозирда, қизим,
 Веронада сиздан ёшроқ хонимлар борки,
 Бирмунчаси она бўлди! Ҳатто мен ўзим —
 Сизни туққан чоғларимда сиздан ёш эдим.
 Мана гапнинг хулласини айтиб қўяйин:
 Сизга совчи юбормишdir муҳтарам Парис.

Энага

Эркак десанг арзугудай, — оҳ, оҳ, хоним қиз,
 Худди мумдан ясалгандай, ҳаммадан яхши!

Капулетти хоним

Веронада ёз гуллари унга етолмас...

Энага

Ҳа, у гулдир, у чинақам гули раънодир!..

Капулетти хоним

Нима дейсиз, ёқадими сизга у йигит?
 Зиёфатда учратарсиз уни бу оқшом.
 Чеҳрасининг китобида ўқирсиз албат
 Гўзалликнинг қалами-ла ёзилган лаззат.
 Чеҳрасининг бичимиға эътибор қилинг.
 Қаранг, қандай келишгандир юз тузилиши.
 У китобда чиқиб қолса бирон муаммо;
 Кўзларидан ўқинг, кўзлар англатар буни.
 Қимматбаҳо бу китобга, бу ишқномага
 Бирон нафис муқава ҳам керак-ку, ахир!
 Балиққа шарт бўлганидай сув чайқалиши,
 Яширин ҳар ҳуснга ҳам ялтираш даркор!
 Қўплар учун бу китобнинг ортар шуҳрати
 Унинг олтин зарварақи, зари туфайли.

Хуснингиздан бўлур ҳусни яна ҳам гўзал,
Лекин сизга бу етқизмас ҳеч қандай халал.

Энага

Халал қайдада?! Эрга тегсак семирамиз-ку!

Капулетти хоним

Энди сизга ёқармикин Париснинг ишқи?

Жульетта

Бир қарайман, агар ёқса, ўша соатда —
Кўзларимга эрк берарман истаганимча,
Лекин «бўлди» деб қўйсангиз ерга қарайман.

Хизматкор киради.

Хизматкор

Хоним, меҳмонлар келишиди, дастурхон ёэилган,
сизга мунтазирлар. Еш бекани изляяптилар, омборда
энагага лаънат ўқияптилар, ҳамма безовта! Мен меҳ-
монларга хизмат қилиб туришим керак. Қани, қадам
ранжида қилиб, ташриф буюрасизлар! (*Хизматкор ке-
тади.*)

Капулетти хоним

Ҳозир, ҳозир, Граф сизни кутар, Жульетта!

Энага

Яхши боргин: кун ортидан ширин тун келур!

Қетадилар.

ТУРТИНЧИ САҲНА

Кўча.

Ромео, Меркуцио ва Бенволио беш-олти
никобдор киши билан бирга кириб келадилар;
хизматкорлар қўлида машъаллар.

Ромео

Бирон нарса айтамизми кириш олдида,
Е саломсиз, тўппа-тўғри кираверамиз?

Бенволио

Серсуханлик, кўп гапириш ҳозир расм эмас,
Ахир, бизнинг ёнимизда кўр Купидон¹ йўқ;
Қўлга тутиб татарларнинг рангли ёйини,
Бўжи бўлиб ҳуркитмаймиз хонимларни биз.
Пичирлаган суфлёрлардан сўзлар ўрганиб —
Кириш пайти қўрқиб-қўрқиб айтмоқ не даркор?
Бизни ким деб санасалар — ихтиёлари:
Биз бир қадар рақсга тушиб чиқиб кетамиз.

Ромео

Сен машъални менга бергин! Ўйин билмайман;
Кўп бадқовоқ бўлсан ҳамки нурни элтаман.

Меркуцио

Ўйин тушмоқ сизга даркор, азиз Ромео!

Ромео

Сизлар кийган этикларнинг пошнаси енгил,
Менинг қалбим бўлса худди оғир қўрғошин,
Бу оғирлик мени ерга қоқиб қўйгандир.

Меркуцио

Сиз-ку ошиқ; дунё узра парвоз қилай деб —
Кира қилинг қанотларни ишқ тангрисидан!..

¹ Уша даврнинг инглиз театрларида хўзи боғлиқ Амур ёки Купидон (ишқ тангриси) образи одатий ва шартли фигулардан бўлиб «ниқоб» да чиқар эди.

Ромео

Мен бу енгил пар қанотда уча олмайман,
Жуда оғир ярадорман ишқининг ўқидан.
Үзим шунча тутқунманки, ғамни тутолмай,
Ишқ юкини күтаролмай йиқилмоқдаман.

Меркуцио

Шу юк билан қулаб қолсанг ишқни эзарсан;
Нозик буюм; у юкларга тоқат қилолмас.

Ромео

Ишқ нозикми? Иўқ, у дағал, у кўп ёвуздир,
У ноинсоф, санчиб турар худди тикандек.

Меркуцио

Шундай экан, қўпол ишқа сиз ҳам қўрс бўлинг;
Чақишига сиз ҳам чақинг, қаданг тупроққа!

(Ниқобни кияди.)

Юзимни мен яширайин, филофни беринг,
Ниқоб узра ниқоб кияй: Меняга нима бор,
Мени майли хунук десин талабчан кўзлар!
Бу уятта қўй, қизарсин сохта пешона.

Бенволио

Қани юринг, эшикларни қоқиб кирайлик,
Аммо олдин оёқларни тартибга солинг!

Ромео

Иўқ, менга бер машъални сен! Қўй, дадил ёшлик —
Товоң босиб топтай берсин бўйра¹ полларни.

¹ Уша замонларда Англиядаги гилам ҳали расм бўлган эмас эди. Энг яхши уйлар, ҳатто саройларда полларга қамиш-бўйларлар ёзилар эди.

Мен бўлсам-чи, бизнинг эски мақол бўйинча:
Узгаларга нур элтаман, қараб тураман,
Үйин яхши, мен ортиқча, ғойиб бўламан!

Меркуцио

Ғойиб эмас, ҳаммамизни безор қилдинг сен!
Ғойиб бўлсанг, ниҳон бўлсанг, биз сени яна —
У шуҳратли муҳаббатдан олиб чиқамиз,
Ийқ десанг ҳам қулогингдан ушлаб элтамиз.
Беҳудага ўт ёнмасин! Қани юринглар!

Ромео

Янглишасан!

Меркуцио

Хаёл қилиб турмоқлик бекор!
Ўт ёнмоқда кун ўртаси чарор сингари.
Менинг сўзим, сўзларимни баҳолаб турган —
Беш калладан беш мартаба донороқ, ишон!

Ромео

Бу базмга келишимиз ҳақида қарор —
Емон эмас, аммо бунда ҳеч бир маъно йўқ!

Меркуцио

Хўш, бу тапни кимлар айтди?

Ромео

Бугун туш кўрдим.

Меркуцио

Мен ҳам кўрдим!

Ромео

Нималарни кўрдингиз тушда?

Меркуцио

Тушда менга айтишдики, ҳамма туш ёлғон...

Ромео

Етогида ухловчининг туши гоҳо рост...

Меркуцио

Малика Меб¹ сизникига қўнгган шекилли.
 У арвоҳлар ўртасида доя бўлса-да,
 Олдерменнинг² узугида ақиқдай холос.
 Одам қаттиқ ухлаганда бурни устида
 Атомларни миниб чопар шу Меб тушмагур!
 Ўргимчакнинг оёқлари — чарх кегайлари
 Соябони — сузанакнинг қанотларидан.
 Тизгинлари — ўргимчакнинг нозик тўридан,
 Бўйинчалар ойнинг инжиқ нурлариданdir,
 Чигиртканнинг пўстларидан ясалган дурра,
 Аравасин ҳайдаётир ушоқ бир чибин;
 Шунча кичик бир чибинки, ялқов қизларнинг
 Билагида ўрмаловчи қуртдан ҳам кичик;³
 Араваси пуч бир ёнгоқ, уни олмахон
 Еки қари бир чувалчанг боплаб ясаган.
 Париларнинг улар эски аравасози...
 Ҳашамат-ла шундай чопар тунлар бўйи Меб,
 Ошиқларнинг миясидан ўтса у ногоҳ —
 Ошиқларнинг тушларига севги киради;
 Йўли тушса шоҳ маҳрами тиззаларидан —
 Тушга кирап таъзим билан қўл қовуштироқ;

¹ М е б — фольклордан чиққан номаълум образ.

² Шаҳар кенгашининг аъзоси. У даврда инглиз амалдорлари бармоғига тақиб юрган узукларнинг кўзига муҳр ёки киши суратини ўйдириб қўйиш расм бўлган эди.

³ Афсоналарга кўра, ялқов қизларнинг суюкларида қуртлар пайдо бўлармиш.

Ё судьянинг қўлларига тегиб ўтса Меб —
 Албатта у судья кўрар тушда порани;
 Хонимларнинг лабларни бир ялаб кечса —
 Демак, улар тушда кўргай ширин бўсани;
 Уша лаблар шириниликка ўч бўлганидан —
 Меб уларни ҳуснбузар билан қоплайди.
 Агар тўра бурнига Меб бир тегиб ўтса —
 У тушида кўргисидир илтифот — инъом.
 Гоҳо чўчқа қили билан қитиқлаб ўтар
 Ухлаб ётган очкўз попнинг тумшуғини ҳам,
 Шунда кўпроқ назру эҳсон кўрар тушда поп.
 Бориб қолиб, елиб ўтса солдат бўйнидан,
 Шунда солдат ўз тушида қирғин — жангларни,
 Қамалларни, Испания шамширларини
 Ва ўн қарич чуқур барваст қадаҳни кўрар.
 Ноғоранинг гумбурлашин эшитади у,
 Сесканиб тез уйғонади, дуо ўқийди,
 Сўнгра бир оз ором толиб ухлаб кетади.
 Яна ўша Мебнинг ўзи саҳарга довур —
 Қир кокиллар тўқиб турар отлар ёлидан;
 Қокилларни ечсанг демак — бало бўлгуси.
 У жодугар, чалқанча ётган қизларни —
 Устларидан босиб турар, токи қизчалар —
 Кўниксинлар юк-пукларга чидаб туришга;
 Ва ҳалитдан бўлолсинлар кўниккан аёл —
 У...

Р о м е о

Етади, Меркуцио, худо ҳақи, бас!
 Ҳамма гапнинг эзмачилик.

М е р к у ц и о

Балли, бу тушлар,

Одамзоднинг бекор зеҳни туққан фарзандлар.
 Бўш хаёллар ва хулёлар буларга ота;

Энг тиниқ бир ҳаво каби енгилдир улар,
 Улар шимол тупроғининг музли қўксини —
 Силаб ўтган шамоллардан ҳам беқарордир.
 Бироқ, улар қаҳрланса жанубга учар,
 Ҳўл шабнамлар қоплаб турган жануб ерига.

Бенволио

Бизни биздан жудо қилур сенинг шамолинг.
 Унда овқат тамом бўлди. Кечга қоламиз!

Ромео

Йўқ-е, эрта эмасмикан? Кўнгил сезади —
 Юлдузларда ҳал бўлгандир менинг толеим!.
 Тақдиримнинг аччиқ, шўрлик бошланғичи, эҳ —
 Шу тундаги базм бўлур; буни биламан.
 Ундан кейин менинг умрим кўп чўзилемас ҳам.
 Ҳалок этар гаддор, мудҳиш ва бевақт ажал.
 Энди майли! Қани менинг кемам даргаси,
 Елканларни тўғрилаб оч. Ё таваккал! Юр!

Бенволио

Ноғорани ур-ҳа, урнинг! (Уйға кирадилар.)

БЕШИНЧИ САҲНА

Қапулетти уйда бир зал.
 Музикачилар кутмоқда. Хизматкорлар қўлларида
 сочиқ билан кириб келадилар.

1-хизматкор

Қани у хумпар Потпен?. Уйни тузатишга мадад
 бермайдими, ёрдамлашмайдими ахир?! Лаганларни
 алиштириш, қозон-товоқларни тозалаб қўйиш унинг
 иши-ку, ахир!

2-хизматкор

Қачонки уйнинг юмушлари панжалари ювуқсиз иккни кишига қолар экан, ишнинг мазаси кетди, дегин!

1-хизматкор

Курсиларни тезроқ олиб чиқинг! Жавонларни суреб қўйинг! Кумуш асбоб-идишларга кўз-қулоқ бўлиб туринг!— Ҳой, сен менга тўқачлардан олиб қўй, чина-кам ошнам бўлсанг эшикдаги қоровулга, Сусанна Грайндстонни, тағин Неллини ичкарига киргиз, деб тайинлаб қўй! Антон! Полтен!

2-хизматкор

Хўп, биродар, тўғрилаймиз.

1-хизматкор

Сизларни катта залда излаб, сўраб, истаб, бақириб-чақириб юрибдилар.

2-хизматкор

Бирданига унда ҳам мунда ҳам ишлаш мумкинми, ахир? Қани, йигитлар, чақон бўлинглар! Эпчилроқ! Бирорлардан ошириб умр кўрганлар ҳамма нарсани боплаб эгаллаб оладилар. (*Кетадилар.*)

Қапулетти ўз қизи Жульетта ва бўлак хона аҳллари билан кириб келади; улар мәҳмонларни ва ниқобли кишиларни кутиб оладилар.

Қапулетти

Хуш келдингиз, афандилар, қани марҳамат! Сўгаллари йўқ хонимлар даврага тушсин. Ҳа-ҳа-ҳа-ҳа, дўндиқчалар! Қани, қайсингиз, Шу ўйинга тушмоқликдан бош тортар, қани? Азбаройи худо дейман, қайси бирларинг

Ана-мана деб тушмаса бугун ўйинга,
Демак, унинг оёғида катта сўгал бор!

(Ромео ва унинг шерикларига.)

Афандилар, қани уйга! Кунлар бор эди —
Мен ҳам иккоб кийиб юриб базму тўйларда
Хонимларга ёқсан сўзни шивирлар эдим.
Ўтиб кетди, ўтиб кетди, ўша чоқлар, оҳ!
Қани, уйга!.. Чалинг жадал, ҳой созандалар!..
Шу орани очиб қўйинг! Ёшлар ўйинга!

Музика чалинади, меҳмонлар ўйинга тушадилар.
Чироғларни кўпроқ ёқинг! Ҳой, хизматкорлар.
Курсиларни олиб чиқинг, ўтни ўчиринг,
Уй жуда ҳам исиб кетди, ўчиринг жадал!
Кутилмаган шодлик менга хўп ёқиб тушди... --

(Ўз кекса қариндошига.)

Ўтири, ўтири, Қапулетти, ўтири азизим!
Ўтиб кетди сен билан биз ўйнаган кунлар!
Сўнгги марта зиёфатда қачон бўлгандик,
Эсингдами, эслаб кўр-чи!

Кекса

Ўттиз йил бурун.

Қапулетти

Э, қўйсанг-чи! Шунчага ҳам етмаса керак.
Люченицио тўй қилганди шекилли, у кун.
Арвоҳларнинг кунларини шунча қистаманг!¹
Ўша тўйдан ўтса керак йигирма беш йил.

Кекса

Иўқ-э, тақсир, кўпроқ бўлди, ўғли ўзи ҳам
Энди тўлиб қолди роса ўттиз ёшларга.

¹ Мақол.

Капулетти

Бу қандай гап? Бултургина, шу деганингиз
Қичкина бир гўдак эди, азбаройи ҳақ!

Ромео

(хизматкорга)

Қара, анов йигит билан айланиб турган,
Ҳусни кўэни қамаштирган дилдор хоним ким?

Хизматкор

Билмайман, тақсир.

Ромео

Жамолидан машъаллар ҳам бўлдилар хира!
Тун қўйнида олмос янглиғ барқ урар ҳусни.
Гўё занжи қулоғида порлоқ зиракдай;
Бу дунёга нисбатан у кўп қимматбаҳо!
Гўё оппоқ кабутардир зоғлар ичида.
Унинг ҳусни, бўлакларнинг ҳуснин ўчирад.
Улар рақсни тугалишин пойлаб турайин:
Қўлларига тегиш ўзи ғанимат — савоб!
Илгари ҳам севармидим? Тонинг кўзларим!
Шу кечгача гўзалликни билмас эканман.

Тибальт

Эшитаман Монтеккиининг беҳаё товшин.—
Ҳой йигитча, қилични бер! Кўрасанларми,—
Базмимизни масхаралаб кулги қилгани—

Ниқоб кийиб нега келган, анов қулбачча?
Онт ичаман насибимнинг шарафигаки,
Назаримда гуноҳ эмас уни ўлдирмоқ!

Капулетти

Нега шундай шовқин-сурон кўтардинг, жиян?

Ти бальт

Амакижон, душманимиз Монтекки шунда;
У беҳаё, у ярамас бир муттаҳамки —
Оиламиз базмларидан кулгани келган.

Капулетти

Ким экан, ёш Ромеоми?

Ти бальт

Аблаҳ Ромео?

Капулетти

Қўй, азизим, у билан ҳеч ишинг бўлмасин;
Унинг хулқи олижаноб меҳмондай, ҳалос.
Тўғрисини айта қолсам, Верона ичра —
У одобли, ғоят ростгўй, ҳалол бир йигит,
Бу шаҳарнинг баҳосини берсанг ҳам менга —
Уз уйимда хўрламайман ўз меҳмонимни.
Сабр қилгин, сен бу ишни юракка олма;
Хоҳишим шу! Буйргумга риоя қилгин!
Мехрибон бўл, илтифот қил, қовоғинг солма.
Зиёфатда қовоқ солиш одобдан эмас.

Ти бальт

Нима қилай, уйга кирса анов муттаҳам!
Иўқ, мен сира чидолмайман!

Капулетти

Мажбур этаман!
Жим, адабсиз, жинни бола. Айтдим, қиласман!
Хўжайин ким? Сизми, менми? Иўқолинг, кетинг!
Гапни қаранг, «чидолмайман!» эмиш; ё оллоҳ!
Меҳмонларим ўртасида жанжал қилмоқчи,
Удағайлаб, безорилик қилиб кўр-чи! Хўш!

Тибальт

Бу биз учун шармандалик, амаки!

Капулетти

Иүқөлі

Сиз уятынан бир безори — ҳаммага маълум.
 Бу ҳазиллар бошингизни егуси охир!
 Сиз жиғимга тегяпсиз! Бас энди, бўлди! —
 Шу сўзим хўб беш кетди-я; безори йўқол!¹
 Жим ўтириңг! Ҳа айтгандай... чироғ бер! — Уят!
 Адабингни хўб берурман — шод бўлинг,
дўстлар! —

Тибальт

Тўйғуларнинг ғалаёни титратар мени,
 Босилсан ҳам, ғазабимни сўндиролмайман!
 Мен кетаман. Киришларинг ҳозир шириндир,
 Аммо какра ва заҳардай аччиғдир кети. (Кетади.)

Ромео

(Жульєттага).

Шу гуноҳкор қўлим билан тегдим қўлингга,—
 Гуноҳимдан тавба учун менга ҳақ бергин!
 Шу лабларим зиёратчи: ўз гуноҳини —
 Ювмоқ учун бирон нозик бўса кифоя.

Жульєтта

Зиёратгоҳ бўлса лаблар, демак сиз ҳожи,
 Лекин нега қўлингизга шунча бешафқат;
 Фикримизча, қилган иши гуноҳ эмасдир,
 Қўлларнинг шу тегишуви бизча табаррук,
 Бу ҳожининг кўп ихлосманд ўпишидай соф!

¹ Бу ерда ва бундан кейинги мисраларда Капулеттининг гаплари гоҳо жиянига ва гоҳо меҳмонларга қаратилган.

Ромео

Ҳожиларнинг, эзгуларнинг лаблари йўқми?

Жульетта

Бор, афандим, лекин дуо зикр этмоқ учун!

Ромео

Эзгу хоним, қўлларимга берилган бахтни

Лабларимга ҳам очсангиэ! Йўқса, шаккокман!

Жульетта

Розиликини билдиримоққа қимиirlаш шартми?

Ромео

Қимиirlамай турмоқ маъқул — мен бахтни топдим.

(*Ўпади.*)

Лабларингиз ўчирдилар лабим гуноҳин.

Жульетта

Демак, юқди лабларингиз гуноҳи менга?

Ромео

Лабларимнинг гуноҳими? Бу сўз жафодир,
Аммо ширин бир жафодир. Қайтар бўлмаса —
Мендан сенга юққан ўша гуноҳларимни!

Жульетта

Ҳақ — ҳисобнинг тўғрилигин ёқтираман мени.

(*Ўзи уни ўпади.*)

Энага

(*Жульеттага*)

Онангизнинг икки оғиз гали бор экан!

Р о м е о

Онаси ким?

Э н а г а

Онт ичаман, сизга, эй йигит,
Оналари бека бўлур бу хонадонга,
Илтифоткор, кўп оқила бир бонудир у,
Мен уларниң қизларига энагадирман.
Қизларн-чи? Сиз гаплашган дўндиқнинг ўзи.
Айтиб қўяй: уни олган — хазина топар.

Р о м е о

Капулетти қизими шу? Ажойиб ҳисоб!
Шу ҳисобда умрим кетди душманларга қарз.

Б е н в о л и о

Қани кетдик, ҳазилимиз ҳам жуда боп тушди.

Р о м е о

Иўқ, ҳазиллар адо бўлди шу дамдан бошлаб.

К а п у л е т т и

Афандилар, шошмоқ нега, кетманлар ҳали,
Ҳозир бирга биз тамадди қилиб оламиз,¹
Вақт бўлдими? Қолмайсизлар? Кетмоқчиларми?
Хўп бўлмаса, раҳмат сизга! Хайрли кечалар!—
Машъалларни тутинглар, ҳой! Биз-чи ётоққа!
Дарҳақиқат, вақт ҳам анча кеч бўлиб қолди.
Келиб етди дам олишнинг айни фурсати!

Жульетта ва энагадан бошқа ҳамма чиқиб кетади.

Ж у л ь е т т а

(энагага)

Бу ёққа кел. Қани айт-чи, ким у афанди?

¹ Кечки овқатдан сал кейин мевалар, ширинликлар ва шароблар берилар эди.

Энага

Тиберио чолнинг ўғли ҳам ворисидир.

Жульетта

Эшиклардан чиқаётган анов йигит-чи?

Энага

Янглишмасам, назаримда ёш Петруччо.

Жульетта

Уйнамасдан тургани-чи! Ана униси?

Энага

Қайдам:

Жульетта

Мутлақ билиб олгин унинг исмини!
У уйланган бўлса, демак ортиқ мен учун;
Никаҳ тўйи, ётоқ жойим — совуқ гўр бўлур.

Энага

Унинг исми Ромеодир, Монтеккилардан;
Сизнинг улуғ ғанимингиз унинг отаси.

Жульетта

Севги куртак очар, ҳайҳот, ёвуз нафратдан!
Ҳеч бўлмаса кўрмоқ! Сўнгра кечикиб билмоқ!
Бу бир баҳтсиз эҳтироснинг бошланғичидир:
Юрагимни ўғирлади ашаддий душман!

Энага

Бу нимаси? Бу нима гап?

Жульетта

Зиёфат чоғи —

Бир йигитдан эшигандим шу байтларни.

Энага

Сиз эшитиб бўпсиз! Бўлди. Меҳмонлар кетди —
Ухлашнинг ҳам пайти келди. Қани ётоқقا.

Кетадилар.

II ПАРДА

ПРОЛОГ

Хор кириб келади.

Хор

Улим ётогида кексайган севги;
 Аммо ёш муҳаббат эшикдан кирав,
 Иигит илк севганин унутган балки,
 Жульетта бор жойда у эмас дилбар.
 Ромео севади, севилади ул.
 Жульетта кўзлари қилибдир жоду.
 Аммо қиз уйига йигит номаъқул,
 Жульетта қалбида севги ҳам қўрқув.
 У эски ҳусумат йўлларда тўсиқ,
 Ошиқлар бир бирга қовуша олмас,
 Жульетта меҳрига қўйилган тақиқ,
 Ўз ёрин кўрмоққа мұяссар бўлмас.
 Баҳарҳол ўртадан гов йўқолгуси,
 Шум қисмат ишқ билан ширин бўлгуси.

Кетади.

БИРИНЧИ САҲНА

Кўча муюлиши. Қапулетти боғи олдида девор.
 Ромео кириб келади.

Ромео

Шунда қолса қалбим, кета оламанми мен?
 Тентак дунё! Топиб олгин ўз марказингни!

(Девор ошиб кўздан ғойиб бўлади.)

Бенволио ва Меркуцио кириб келадилар.

Бенволио

Ҳой Ромео! Жон биродар!

Меркуцио

Эси жойида.

Худо урсин, ҳозир бориб ётгани кетди.

Бенволио

У, бу ёққа чолиб келди, девордан ошди!
Чақир уни Меркуцио!

Меркуцио

Энди аврайман!

Ҳой Ромео, девона ёр, савдойи айёр!
Бир «оҳ» бўлиб кўзга кўрин, ё бир байт ўқи;
Фақат бир байт, мен шунда ҳам бўлурман

хурсанд.

«Ҳайҳот!» дегин, қофия қил: «жон ва жонон» де,
Ишқ тангриси Венерага бир оғиз гап оч,
Ёки унинг қийшиқ ўғлин ғашини келтири,
Чунки унинг ўғли Амур бир отишдаёқ —
Битта шоҳни ошиқ қилди гадой хотинга.¹
Иўқ, у асло қимирламас ва жавоб бермас.
Маймун худди қотиб қолган. Аврашим бекор!
Розалина кўзи билан жоду қиласман.
Лаъли лаблар, юзи билан жоду қиласман,
Нозик оёқ, ҳамда ларzon бўксаси билан,
Шу бўксага яқин турган неъматлар билан

¹ Шоҳ Кофетуанинг Амурдан ўқ еб Зенелефон деган бир гадой хотинга ошиқ бўлганлиги тўғрисида қадимги афсона.

Жоду қилиб сени яна тоза аврайман;
Важоҳатинг ила ҳозир пайдо бўл, ҳозир.

Бенволио

Сўзларингни эшитади, хафа бўлади.

Меркуцио

Ундаи эмас. Агарда мен Розалинанинг
Ишқ-муҳаббат хонасига ўзга арвоҳни.
Чақирсадим, Розалина хоҳлар-хоҳламас
Ромеони ҳайдасайди, халал берма деб.
Ҳақли эди хафа бўлса унда Ромео.
Менинг ҳамма жаврашларим тўғри ва ҳалол:
Севган ёри ҳурматига келсин деяпман?

Бенволио

Юринг, ҳозир, у дарахтлар аро зим кетди,
Ўшанда зах қоронгилик, бу — унга ёқар.
Севги кўрдир, қоронгилик унга мос тушар!

Меркуцио

Севги — кўрдир; у мўлжалга тегмаги мушкул.
Чангалзорда ўтиргандир ҳозир Ромео.
Хилватзорда хаёл сурмоқ унга кўп осон,
Орзу қиласар у бир қизни, очиқ мевани,
(Очиқ мева нималигин қизлар билади.)
Биласанми, Ромео, сен, у очиқ бўлса,
(Нимасининг очиқлиги ўзингга маълум)
У ҳолда сен нок бўлурдинг, Ромео, ўзинг!..
Мен ётгани кетяпман, хайр, Ромео:
Сенга ўхшаб, ерда ётиб шамоллаб қолмай.
Хўш, бўлмаса кетамизми?

Бенволио

Кетамиэ, йўқса

Биздан қочган бир кишини изламоқ бекор!

Кетадилар.

ИККИНЧИ САҲНА

Қапулетти бори.

Ромео кириб келади.

Ромео

Ҳеч ярадор бўлмаганлар ярадан кулар.

Юқорида — деразада Жульєтта кўринади.

Деразада липиллаган ўша нур нима?
 У ердадир олтинранг қиз, Жульєтта — қуёш!
 Эй офтоб, рашк қилувчи ойни ўлдиргин,
 Ой, рашкидан сўлиб қолган, ўзи хастаҳол,
 Чунки, унинг канизаги ундан ҳам гўзал.
 Сенинг беканг кундош экан бўйсунма унга:
 Ташлаб қўйгин бокира қиз яшил либосин:
 Қизиқчилар фақат кияр яшил кийимни,
 Оҳ маликам, оҳ соҳибам, ишқу савдом сен!
 Билармикан у ўзининг шу мавқени?
 Гапирди-я. Йўқ индамас. Майли, бўлмаса!
 Кўзлари-ку гапирмоқда — жавоб берайн!
 Мен сурбетман. Сўйлашмайди ҳеч ким мен билан.
 Осмондан икки нафис юлдуз, иш билан
 Кета туриб, у кўзларга ёлвордиларки —
 Кошки бўлсан шу маҳалда, қўлқоп ўрнида.
 Ёки шундай: юлдузларга алмашса кўзлар!
 Қандай бўлур? Юзи хира қилур юлдузни,
 Кундуз нури чароғларни сўндирганидай.
 Қушлар бўлса тунни кун деб сайрар эдилар.
 Қўк ёришиб кетар эди кўзлар туфайли.
 У қўлига чаккасини суяб турибди.
 Кошки бўлсан шу маҳалда қўлқоп ўрнида,
 Чаккасига тегар эдим!

Жульєтта

Вой, ўла қолай!

Ромео

Гапга кирди! Гапиравер, нуроний малак!
 Бошим уэра гүё тиниқ, ёрқин бир фалак—
 Сен фалакда учар меҳмон сингари гўзал,
 У шунаقا, ялқов булут ичра кезади,
 Еки ҳаво тўлқинларин ёриб юзади,
 Бошин қайраб, инсон кўзин олайтиради.
 Мафтун бўлиб ҳайрон-ҳайрон унга қарайди.

Жульетта

Оҳ, Ромео. Нега ахир сен Ромеосан?
 Уз исмингдан, оиласандан воз кеч, эй йигит!
 Агар буни хоҳламасанг ишқимиз учун—
 Қасамёд қил, Капулетти бўлмайман мен ҳам.

Ромео (ўз-ўзига)

Яна сўзи бормикан, ё, берайин жавоб?

Жульетта

Ўзинг эмас, сенинг исминг ғанимдир менга.
 Сен бошқасан. Сен Монтекки эмассан асло.
 Одамзоднинг қўли, юзи, оёғи ёки—
 Бўлак қисми Монтеккидан бўлиши шартми?
 Сен ўзингга бошқа ном топ! Ном деган нима?
 Гулнинг номи ўзга бўлса нима бўлурди:
 Ўзга номда хушбўйлиги ўзгарармиди?
 Ромеонинг номи агар ўзгача бўлса—
 Ҳеч нарса кам бўлмас эди камолотидан!
 Ташла номинг, ном-ку сенинг бир ҳиссанг эмас,
 Тану жоним сенинг бўлур бугун, Ромео.

Ромео

Сўзларингни унумтагин, тоимагин, эй қиз!
 Мени ёр де, мен ўзимга бошқа ном қўйай,
 Ва бундан сўнг бўлмагайман асло Ромео.

Жульетта

Кимсан ўзинг? Тун пардаси остида, бутун—
Сирларимга ошно бўлдинг?

Ромео

Қайси ном билан

Мен ўзимни атай сенга— билолмай қолдим.
Менинг исмим энди бўлди менга кўп жирканч:
Чунки сенга у душмандир, азизим, жоним.
Номим бўлган васиқани йиртсан розиман.

Жульетта

Мен оғзингдан юзта сўз ҳам эшитганим йўқ—
Товушингдан таниб олдим, лекин, ўзингни.
Сен Ромео? Сен Монтекки? Шундай эмасми?

Ромео

Йўқ-э, йўқ, йўқ; ҳар икки ном сен учун манфур!

Жульетта

Бу ерга сен қандай кирдинг? Нимага кирдинг?
Бу ҳовлида девор баланд, ошмоқ ноқулай;
Сен учун бу хатарлидир: бирон қариндош—
Кўриб қолса бошгинангга тушади ўлим!

Ромео

Мени, севги қанотида келтириб қўйди:
Севги учун ҳаттоки тош бўлолмайди ғов.
Ҳар нарсага севги дахл қила олади,
Менга тўсиқ бўлолмайди қариндошларинг!

Жульетта

Қўзга тушсанг, бўлди, дарҳол қилурлар ҳалок!

Ромео

Эвоҳ, эвоҳ, йигирмата қиличбозингдан—
 Менга кўпроқ у кўзларинг хатарлироқдир.
 Сен меҳр ила бир қарасанг, мен учун шу бас,
 Бу билан мен сақланаман ёвлар қаҳридан.

Жульетта

Кошки сени кўрмасалар!

Ромео

Шу тун бошпанам,
 Агар мени севгинг билан исита олсанг...
 Аммо мени ёмон кўрсанг— кўрсинглар улар;
 Сенинг ишқинг даргоҳидан бенасиб ҳаёт—
 Ёв қаҳридан ўлмакдан ҳам бешбадтар ёмон!

Жульетта

Ахир айт-чи, сени бунга ким олиб келди?

Ромео

Севгим мени бошлаб келди ёр даргоҳига,
 Севги менга кенгаш берди, мен унга— кўзлар.
 Мен денгизчи сайёҳ эмас, аммо ишонки,
 Агар олис денгизлардан нари бўлсанг ҳам—
 Шундай қиммат гавҳар учун юзиб борардим.

Жульетта

Тун ниқоби ёпиб олган менинг бетимни,
 Бўлмаса сен пайқар эдинг қизарганимни,
 Чунки менинг сўзларимни писиб тинглабсан.
 Сўзларимдан хижолатман, кўп уятдаман,
 Ҳозир жон деб кечар эдим айтганларимдан.
 Энди ортиқ хайр дейман ясама гапга!
 Қани, мени севасанми? Дарров «ҳа» дейсан;
 Бу сўзингга ишонаман, аммо онт ичсанг—
 Елғонсираб кетмаклигинг кўпроқ эҳтимол.

Ишқий қасам тепасидан тангрилар кулар,¹
 Тұғрисин айт, севасанми, азиз Ромео?
 Мени, бу қыз унай қолди, деб үйламагин,
 Бұлмаса мен, қовоқ читиб, «йўқ!» дейман, ҳозир.
 Сени қалдан севиб қолдим, азиз Монтекки!
 Мени балки енгилтак деб үйлаб қоларсан.
 Лекин, ишон, пинагини гүё бузмасдан —
 Бепарводай юрганлардан мен вафодорман.
 Мен ҳам балки бепарводай күринар әдим —
 Башарти сен менинг ишқу ҳавасларимни —
 Эшитмаган бұлсанг әди бугун ногаҳон.
 Коронғу тун сирларимни очған бўлса ҳам,
 Мени дарҳол тан берди деб үйлама, кечир!

Р о м е о

Дараҳтларни кумушларга белаб турувчи —
 У муборак ой ҳурмати, қасам ичаман...

Ж у л ь е т т а

Йўқ, бевафо ой номига қасам ичмагин,
 Ү-ку ҳар ой ўзгартиromoқда ўз рухсорини,
 Бизнинг севги ҳеч бўлмасин ундей бевафо.

Р о м е о

Оҳ, нимага қасам ичай?

Ж у л ь е т т а

Кераги ҳам йўқ,
 Жуда керак бўлиб қолса ўз жамолингга,
 Ўзлигингта, яъни менинг худом ҳурмати
 Қасам ичгин, ишонаман.

Р о м е о

Агар дил меҳри...

¹ Тұғриси — «Юпитер кулар» — чунки у ўз маъшуқала-
 рини тез-тез алмаштириб турар эмиш.

Жульетта

Йўқ, онд ичмал Келишингга хурсанд бўлсам ҳам,
 Тун маҳали аҳдномага рози өмасман:
 Бу жуда тез, ногаҳоний, нохосдан бўлур,
 Бизлар ҳали: «Ана чақмоқ!» деб улгурмасдан —
 Учиб кетган чақмоқларга ўхшайди бу аҳд!
 Хайрли тун! Ёзинг майин нафаси тонгга,
 Ишқ куртагин гўзал гулга айлантиrolсин!
 Хайрли тун! Қалбимдаги өсойишталик —
 Азиз дўстим, юрагингга ором сололсин!

Ромео

Бирон тухфа бағишиламай, ҳайдаяпсанми?

Жульетта

Қандай тухфа истар эдинг, шу тун маҳали?

Ромео

Мен, онтимнинг баравари, онт ич, сўрайман!

Жульетта

Сўровингдан илгариёқ онт ичган эдим,
 Жон деб қайта такрор қиласай севги онтимни.

Ромео

Сен аввалги қасамингни бузмоқчимисан?

Жульетта

Янги совға бермоқчиман саховатимдан.
 Ихтиёrimда бор нарсанинг эгасидурман.
 Дентизлардай бепоёндир менда саховат,
 Денгизлардай менда чуқур севги-муҳаббат.
 Қанча беҳад тортиқ қилсан муҳаббатимни,
 Шунча чексиз — бепоён бил саховатимни.

(Эшик орқасидан энага чақиради.)

Уйдан товуш келаяпти. Хайр, севганим!—
Ҳозир!— Менга вафодор бўл, азиз Монтекки.
Жиндак тўхта, ҳозир тағин қайтиб чиқаман.

Кетади.

Ромео

Оҳ муборак, шафқатли тун! Кўп қўрқаманки —
Кўрганларим ўнг эмасу бошдан-оёқ туш,
Чунки шунча ширин нарса ўнгда бўлмайди.

Яна юқорида Жульєтта кўринади.

Жульєтта

Икки оғиз гап: ундан сўнг, хайр Ромео.
Дилдан бўлса сенинг ишқинг, ҳамда хоҳласанг
Менга бир кун уйланмоқни — эрта эрталаб,
Мен юборган одамимга чин гапни айтгин:
Қачон, қайда сен никоҳни ўқитмоқчисан,—
Ундан сўнгра, оёғингга поёндоз бўлай —
Эгамсан,— деб борай сен-ла қаерга десанг.

Энага

(эшик орқасидан)

Хоним!

Жульєтта

Ҳозир!— Аммо ишқинг ҳалол бўлмаса
Ялинаман...

Энага

(эшик орқасидан)

Хоним! Хоним!

Жульєтта

Ҳозир, ҳозир! Бораман ҳозир!
Ялинаман, мени қўйгин ўз ғамим билан.
Эрта билан юбораман!

Ромео

Саодатимга...

Жульетта

Сенга юз-юз саломларим!

Кетади.

Ромео

Тонгни кутиш интизори юз марта мушкул!
Дарслигидан ажралганда суюнтар шогирд,
Аммо ёрдан ажралмоқлик дўзахдир роса.

(Секин дарвозага юради.)

Жульетта

(яна юқорида пайдо бўлади)

Оҳ Ромео, лочинларни ундан олгали —
Лочинбозлар менга нега овоз бермади!
Канизакнинг бўғиқ товши шунча ожиздир,—
Бўлмаса мен горлардаги Эхо санамин —
Акси садо санамини титратар эдим,
Хирилларди ҳаволарнинг зўр садоси ҳам —
Шу исмни такрор қилса: Ромео — Ромео!

Ромео

Менинг жоним чақирмоқда. Ошиқлар товши —
Тун қўйнида кумуш каби ширин жаранглар,
Худди нозик музиканинг куйлари каби!

Жульетта

Ромео!

Ромео

Севиклим!

Жульетта

Эрта соат нечаларда киши юборай?

Ромео

Тўққизларда.

Жульетта

Оҳ, эртага йигирма йил бор!
Сени нега чақирудим, эсимдан чиқди.

Ромео

Кутиб турай, балки тағин эслаб қоларсан!

Жульетта

Бунда туриб қолгайсан, деб эсламайман ҳам,
Фақат бирга бўлсак яхши — эсимдаги шу!

Ромео

Кутиб турай, токи сён ҳам худди мен каби —
Унутгайсан жаҳондаги бўлак ўйларни.

Жульетта

Ана саҳар. Истайманки энди жўнасанг,
Оёғига ип илинган бир қуш сингари;
Шўх қизчалар шундай қушни гоҳо учирар —
Лекин худди занжирланган бир банди каби
Сўнгра, дарҳол яна ипни тортиб оларлар,
Гўё гўзал қуш эркига рашклари келар.

Ромео

Истар эдим сенинг қушинг бўлмоқни мен ҳам!

Жульетта

Ҳа, азизим. Шундай қушни сийлардим дилдан.
Хайр энди, хайрлашув кўп ширин ўйин!
Эртагача хайрлашиб турсам хурсандман.

Ромео /

Мен бу кеча уйқу, ором тилайман сенга!—
 Истар эдим тушинг бўлай, ороминг бўлай!
 Менга мадад керак ҳозир, ҳаловат учун—
 Шу дам роҳиб кулбасига тўғри бораман.

Кетадилар.

УЧИНЧИ САҲНА

Роҳиб Лаврентийнинг кулбаси. Роҳиб Лаврентий сават кўтариб келади.

Лаврентий

Қовоқ соглан шу кечага қарайди кундуз,
 Нур — шуълалар сояларни ҳайдагай ҳануз,
 Кир зулматлар худди бир маст сингари ҳозир
 Четлаб қочар офтобнинг ўтли йўлидан.
 Токи боқмай куйдирувчан кундузнинг кўзи,
 Шабнам шимиб, табрикламай бизларни ўзи,—
 Саватимни тўлдирибман ҳар хил доруга,
 Кўп шифобахш гиёларга, ҳар хил оғуга.
 Тупроқ ҳам, гўр ҳам қоринидир; оламга — она;
 Гуноҳларга, савобларга у ўзи хона.
 Биз тупроқнинг ич қорнидан чиққан авлодни
 Ахтарамиз. Эмизади тупроқ уларни.
 Табиатнинг авлодлари тўлмиш неъматга.
 Аммо улар, бош қўшмайди ҳеч ҳусуматга.
 Бу тошларда, майсаларда не-не хосият,
 Қанча қулрат, қанча мадор ва нозу неъмат!
 Тупроқ қўйни олий ё паст ашёга тўлиқ.
 Ерга бирон нарса берар ҳатто паст маҳлуқ.
 Аммо яхши нарсани сен қўллай олмасанг,
 Ноҳуш, бебурд самаралар келтирур улар,—
 Шу аҳволда айланади яхши ёмонга;
 Еки нуқсон айланади мусбат томонга.
 Мана чечак! Бу гунчада заҳар ҳам бордир,

Аммо шифо беришга ҳам шу чечак қодир.
 Унинг атри танимизни қилади хушҳол,
 Аммо бир оз татиб кўр-чи, ўлдирап дарҳол,
 Гиёҳларда мудом яшар икки душман шоҳ;
 Қишиларнинг дилларида савоб ва гуноҳ.
 Қачон чиқса яхшилиқдан ёмонлик устун —
 Ўсимликни ёмон мараз еб қўяр бутун.

Р о м е о кириб келади.

Р о м е о

Салом сенга, ё отахон!

Л а в р е н т и й

Ҳақ мададкоринг!

Тонг отарда бу меҳрибон салом кимдандир?
 Ётогингдан шундай барвақт турибсан, ўғлим,
 Бирон ташвиш авзойингни бузган шекилли?
 Ухламоққа сира қўймас чолларни қайфу.
 Кексаликнинг гуссасини алдамас уйқу;
 Аммо қайга бош қўймасин беғам навжувон.
 Олтин тушлар ҳоким бўлар у ерда шу он.
 Сенинг бевақт келишинингнинг маъноси шуким,
 Юрагингга оғир ташвиш бўлмишdir ҳоким.
 Ё бўлмаса, мен фолимда қилдимми хато?
 Демак, бу тун сен мижжа ҳам қоқмабсан ҳатто.

Р о м е о

Йўқ, шу тунда роҳатланиб хўп ҳузур қилдим.

Л а в р е н т и й

Тавба қилдим, Розалина биланми боҳам?

Р о м е о

Розалина билан, менми? Йўқ, менинг, пирим,
 Жисмини ҳам, йисмини ҳам буткул унудим.

Лаврентий

Хўш, бўлмаса, қайда эдинг, бу кеча, бедор?

Ромео

Сен сўрама: ўзим ҳозир бўлайин иқрор.
 Ёвлар билан ҳамбазм әдим тунда, отахон.
 Ёв, ногаҳон, юрагимга ханжарин солди,
 Аммо мендан у ўзи ҳам жароҳат олди.
 Икки душман фарзандига, ота, бир чора!
 Ота, нафрат қилмоқликка йўқ менда мажол,
 Мадад, ота, ёвимга ҳам, менга ҳам дарҳол!

Лаврентий

Ўғлим, менга очиқ айтгин, қанақа гуноҳ:
 Сирли гуноҳ кечирмаклик, мушкулдир, эвоҳ!

Ромео

Очиқ айтай: билиб қўйки, мана севгим шу:
 Қапулетти қони оқар ёрим қонида.
 У ҳам мени яхши кўрар, масаламиз ҳал:
 Бирлаштирас никоҳ бизни албат бехаял.
 Мен у билан қачон, қайда танишиб олдим,
 Қандай қасам ичиб қўйдим, қандай унашдим,
 Айтиб берай, аммо фақат сендан илтимос,
 Ваъда қилгин, бугун никоҳ ўқишга, халос.

Лаврентий

Ё, пирим-э! Бу қанақа ўзгариш бирдан?
 Розалина унудилди, шунчалик тездан.
 Рост айтарлар: йигитларнинг дилида эмас,
 Кўзларида ёнар экан муҳаббат, ҳавас.
 Шу йигитнинг чаккасидан сўлғун, асабий
 Қанча аччиқ ёшлар оқди, ё ҳақ, ё раббий!
 У ишқ учун сен шунчалик қон ёш тўкканда,
 Ҳаммаси ҳам вақтинча гап! Бекор экан-да.

Ҳали офтоб учирмабди оҳ додларингни.
 Эшитаман, ҳозирда ҳам фарёдларингни.
 Мана тураг ҳозирда ҳам чаккаигда бир дар,
 Илгариги кўз ёшларга энг жонли гувоҳ.
 Узганики эмас эди ўша кўз ёшлар,
 Розалина учун эди тилак-хоҳлашлар.
 Узгардингми? Иқрор бўлгин. Қани, ўғлим! Хўш.
 Хотинларда гуноҳ борми, эрлар бўлса бўш?

Ромео

Мени-ку сен койир эдинг севганим учун.

Лаврентий

Севги учун эмас, ўғлим, жиннилик учун.

Ромео

Деган эдинг: «Ишқингни кўм!»

Лаврентий

Аммо, азизим.

Янгисини гўрдан қавла, демовдим, сенга.

Ромео

Сен койима! Менинг ҳозир севганим жонон,
 Севгим учун севги тўлар, сен шунга инон.
 Бу — олдинги муҳаббатга сира ўхшамас.

Лаврентий

Чунки жуда аён эди, илк дилбарингга —
 Ўқимасдан ёдлаганинг ишқ китобини,
 Шунинг учун ишонмасди сенинг гапингга!
 Ўтган ишга саловат де! Юргин қаландар,
 Сенга ёрдам бермоқ керак, имкон бор қадар.
 Хонадонлар ўртасида ғазаб-хусумат
 Шу никоҳнинг туфайлидан тугагай шояд!

Ромео

Тез юрайлик! Кутолмайман, етар интизор!

Лаврентий

Ховлиқмайлик: шошилганинг оёғи тояр.

Қетадилар.

ТҮРТИНЧИ САҲНА

Кўча.

Бенволио ҳам Меркуцио кириб келадилар.

Меркуцио

Қайси гўрга кетиб қолди ахир Ромео?
У уйида тунаганми?

Бенволио

Йўқ дейишади.

Меркуцио

Оҳ золим қиз, Розалина, ҳамма айб унда,
Ахир, уни қийнаб-қийнаб жинни қилгуси.

Бенволио

Тибалът деган, Капулетти жияни бугун
Уйга нома юборибди Ромеога деб.

Меркуцио

Онт ичаман, бу — дуэлга таклифномадир.

Бенволио

Хат, жавобсиз қолмайди-ку.

Меркуцио

Хат-саводи бўлган ҳар ким ҳам хатга жавоб бера
олади.

Бенволио

Йўқ, мен хатга хат билан жавоб беради, демоқчи эмасман. Дуэлга чақириққа — чақириқ билан жавоб қайтаради дейман.

Меркуцио

Хайҳот, бечора Ромео! Уни энди ўлди, деб бил! У, оқ юзлик қизнинг қора кўзларидан яраланди; унинг қулоғига муҳаббат қўшиғининг ўқи тегди; унинг юраги худди ўртасидан кўр бир гўдакнинг ўқига дуч бўлди. У энди Тибалътга қарши қандай қилиб туради.

Бенволио

Тибалътинг ким? Унинг нимаси бор?

Меркуцио

Сизни ишонтираманки, у мушуклар шоҳидан ҳам хатарли! У балойи азим! У боадаб қилиқларнинг жасур дарфаси! У қилични худди нотага қараб чалгандай чалади; қиличбозликда вақт, масофа ва кўламни жуда ҳам бажо келтиради. Қисқагина танаффус билан шундай ҳужум қилади-ки: бир-икки-уч деганингизча — сийнангиз чок-чок бўлиб кетади. У шоҳи тугмаларнинг чиякам жаллоди! Дуэлбоз, дуэлбоз, у бошдан-оёқ аслзода! Дуэль учун керак бўлган биринчи ва иккинчи баҳоналарни топишга жуда уста. Оҳ, ўлмас таъбир: Passado! Puhto, raverso! hai! Ушланг!

Ташланг! Бошланг!

Бенволио

Нима, нима?

Меркуцио

Вабога йўлиққур шу айёр тақлидчилар, дудуқланиб сўзловчи масхабозлар тилини янги мақомларга созла-

моқчилар. Гапни қара: «Исога онт ичаман, бу шамшир ғоят соз шамшир! Бу ғоят хушқомат эркак! Бағоят танноз сатанг!» Бу чет эл пашшалари, бу модага кириб кетган матоғурушлар, бу «Pardon-amî»¹ деган иборалар бизни қийнаб тургани алам қилмайдими? Бу одамлар янги лиbosларни шунча иззат қиласады, эски курсиларга бемалол ўтиришга ҳам ожизлик кўрсатадилар. Бу одамларнинг французчалаб «bones, bones»² дейишларини демайсизми!

Ромео кириб келади.

Бенволио

Ана Ромео келяпти, ана Ромео!

Меркуцио

У ёрсиз қолса, безлари қуриб кетган балиққа ўхшайди. Эй гўшт, эй гўшт, шунча бевақт балиқлашиб кетдинг! Ҳозир у шоир Петракага ўхшаб яйраб кетади. Петраканинг маъшуқаси Лаура бунинг жононига нисбатан — ошпаз хотин, холос. (Гарчи Лауранинг маҳбуби ўз маъшуқасини бу дўстимиздан кўра тузукроқ мақтаган бўлса ҳам.) Машҳур дилбар Диони буникига нисбатан шилта, Клеопатра — лўли, Елена ва Гера фоҳиша ва шилқим, Фисба гарчи шаҳло кўз бўлса-да, бунинг жонони олдида сариқ чақага арзимайди. Жаноб Ромео, бонжур! Мана сизнинг хашаки француз иштонингизга французча салом! Сиз кеча бизни тоза қўлга туширдингиз лекин...

Ромео

Иккалангизга ҳам хайрли эрта! Қандай қилиб сизни қўлга туширибман?

¹ Мени афв этгайсиз! (Французча ва итальянча аралаш таъбир).

² Французчадаги воп, воп (яхши, яхши) сўзидан бузуб олинган.

Меркуцио

Чап бериб сирғалиб кетдингиз, тақсир, чап бериб, гапга тушунмайсизми?

Ромео

Мени кечирасиз, қимматли Меркуцио, жуда зарур ишим бор эди; шунаقا ишлар чиқиб қолганда одоб қоидаларини бузиш жойиз-ку!

Меркуцио

Агар сиз, бундай пайларда, киши тиз чўкиб узр сўраши лозим деганингида эди, бу ҳам жойиз бўлар эди.

Ромео

Яъни одоб билан узр сўраш керак, демоқчисиз!

Меркуцио

Гапимга батамом тушуниб олибсан.

Ромео

Гапни назокат билан тушунтиrsa, шундай бўладида!

Меркуцио

Ахир менинг одоб ва назокатнинг асл чинни гули деса бўлади-ку!

Ромео

Чинни гул, дейсизми?

Меркуцио

Албатта.

Ромео

Үндай бўлса, менинг этикларим ҳаммадан ахлоқли,
чунки улар чинни гул билан безатилган.

Меркуцио

Яҳши гапирдинг! Шу ҳазилда менга әргашиб юр,
этикларинг тўзигунча. Қачонки этикларингнинг ягона
пошиаси тўзиб кетса, сенинг ягона ҳазилинг ҳам яккаю
ёлғиз қолади.

Ромео

Оҳ, ёлризликда ягона, ягоналика якка ва ёлғиз
ҳазил!..

Меркуцио

Гап қўшсанг-чи, меҳрибон Бенволио; асқиябозлигим
ўтмай қолди!

Ромео

Асқиябозлик, отингнинг биқинига уриб чопавер,
бўлмаса сендан ўзиб кетдим деб жар соламан.

Иўқ, агар сен билан мени ёввойи ғозлар¹ кетидан
қувсак, ишонаманки, сендан ўзиб кетарман, чунки ме-
нинг бешала сезгимдан кўра, сенинг бйтта сезгингда
ёввойилик кўпроқдир. Еки сиз мени гоз деб ўйладин-
гизми?

Ромео

Доимо шундай деб юрибман-ку. Бўлмаса «шу
ғоз — жуда соз!» дейишга арзимайсизми?

Меркуцио

Бу ҳазилинг учун қулоғингдан тишлиб оламан².

¹ Ёввойи ғозни овлаш ҳамма ғозлардан сакраб чавандозлик
қилишдан иборат эди.

² Уша даврда кенг тарқалган ҳазилкашлик расми.

Ромео

Иўқ, меҳрибон ғозим, чимчиламай қўя қол!

Меркуцио

Сенинг ҳазилинг аччиқ-чучукдир; бунинг қайласи жуда қуюқ чиқса керак.

Ромео

Ширин ғоз гўштига бундай қайла яхши зиравор бўлиб тушмайдими?

Меркуцио

Сенинг ҳазилинг эчкининг терисига ўхшаб қолаяпти! Илгари сен икки эллик ҳазилни ҳам бизлардан аяр эдинг, ҳозир бўлса бемалол, эркингина чўзиб-тортиб қулочдан ҳам оширяпсан-а!

Ромео

Мен ҳазилимни «эркин» сўзига қараб тортаман, сен бўлса буни «ғоз» сўзига келтириб қўшгин-чи, нима чиқаркин? «Тили эркин ғоз» бўлиб чиқмайдими-а?

Меркуцио

Муҳаббат фарёдидан кўра буниси яхши эмасми? Энди сен билан гапиришса бўлади. Сен энди Ромеонинг ўзи. Аслингга қайтибсан. Сенинг думбул ишқинг эса, таёғини тешикка бекитиш учун сарсон бўлиб довдира-ган аҳмоқи — дарознинг ишига ўхшайди.

Бенволио

Бас, бас, бўлди!

Меркуцио

«Бас, бас»нинг билан сен менинг қиссамни тес-карига бураяпсан.

Бенволио

Бўлмаса, гап-сўз ичда ботиб ғарқ бўлмагайсан деб
қўрқаман!

Меркуцио

Ана янглишдинг! Мен қиссамнинг айни мағзини энди
чақмоқчи бўлиб гапни калта қилмоқчи эдим...

Энага билан **Петр** кириб келадилар.

Ана, зебу зийнатни қаранг!

Меркуцио

Елкан, азбаройи худо, елкан!

Бенволио

Кўйлаги бир бўлса, иштони билан икки елкан.

Энага

Петр

Петр

Лаббай!

Энага

Менинг елпигичимни бер, **Петр**!

Меркуцио

Марҳаматли **Петр**, бу кишининг башараларини елпигич билан ёпиб қўй! Елпигичлари юзларидан зебороқ!

Энага

Хайрли эрта, афандилар.

Меркуцио

Хайрли кеч, дўндиқча хоним!

Энага

И-я, кеч бўлиб қолдими?

Меркуцио

Шубҳасиз, чунки соатдаги далла-миланинг учи пешинни кўрсатаяпти.

Энага

Йўқолинг-э! Қанақа одамсиз ўзингиз?

Ромео

Бу одам, хоним, шундай махлуқдирки, худо, уни ўзи яратиб, ўзига зарар етказган, холос!

Энага

Худо урсин, бу гапингиз, беш кетди: «ўзи яратиб, ўзига зарар етказган!» Ҳа? Жаноблар, қайсингиз айтиб берасиз, ёш Ромеони қайдан топсан бўлар экан?

Ромео

Мен айтиб бераман; аммо сиз Ромеони топиб олгунингизча унинг ёшлиги ҳам адo бўлади. Энди, гапнинг тўғриси, Ромео деб аталган кишилар ўртасида мабодо энг ёмони бўлмасам, у ҳолда энг ёшроғи мендурман.

Энага

Сиз, яхши гапирап экансиз?

Меркуцио

Ёмон қандай қилиб яхши гапиради-а? Ана ақлу, ана фаросат! Бай-бай, бай!

Энага

Агар у киши сиз бўлсангиз, тақсир, сизга яширин айтадиган гапим бор.

Бенволио

Бу хотин, Ромеони қандайдир бир кечки овқатга таклиф қилмоқчи!

Меркуцио

Дала, дала, дала, олкиш, олкиш, ол уни!

Ромео

Сен кимни «олкиш» қиляпсан?

Меркуцио

Олқиплаётганим қуён эмас, тақсирим, башарти қуён бўлганда ҳам у фақат парҳез овқатлар учун ярайди, чунки у ҳануз қоврилмасдан бурун тамомила қуриб сасиган (Куйлади.)

«Рўзада — парҳезда,
Парҳез келган кезда,
Қуённинг думини —
Ямлардим бирпасда.
Жўн эмас, бу овқат,
Ўтмайди дум, фақат!..
Рўзага етмаёқ;
Қуён ҳам бўлди қоқ».

Ромео, уйга борасизми? Бизлар овқатга сизникига кетаётибмиз.

Ромео

Мен ҳам тездан бораман.

Меркуцио

Яхши қолинг, Даққионусдан қолган бону, яхши қолинг! «Хой бону, ҳой бону, ҳой бону!»

Меркуцио билан Бенволио кетадилар.

Энага

Яхши боринглар! Гўрга э!. Fирт аҳмоқ бу сўзфурш ким ўзи, тақсир!— Уни шу гаплари учун оссангиз ҳам кам.

Ромео

Энагажон, бу жаноб фақат ўз сўзига ўзи қулоқ солишни яхши кўради. У шунча кўп гапирадики, бир нафасда гапирган гапларини бирор унга айтиб берса, бир ой чидаб ўтириши керак бўлар эди.

Энага

Агарда у менга қарши бирон гап айтиб қўйса, уни қанча бақувват бўлмасин, ерга улоқтириб ташлайман! Мен шунга ўхшаган йигирмата хумпарнинг уддасидан чиқоламан... Башарти ўз мажолим етмаса, зарур одамларни топиб оламан! Ҳу, сен қўтириб муттаҳамни қаранг-а! Мен унга ўйнаш бўлмасам, тақсир! Мен унга қариндош бўлмасам! (Петрға) Сени қара-я! Бу ерда туриб, аллақандай муттаҳамлар мени эрмак қилишига индамайсан-а!

Петр

Мен ҳеч қачон бирон эркак сизни эрмак қилганини кўрганим йўқ! Агар шундай нияти борлигини пайқаганимда, сизни ишонтираманки, дарҳол қуролни суғурган бўлар эдим. Мен яхши жанжал учун баҳона топганимда ва қонун менинг томонимда эканини кўрганимда, ҳаммага ўхшаб мен ҳам жанжалга тайёрман.

Энага

Худо шоҳидки, мен шунча таҳқирландимки, ҳамма аъзойи вужудим қалтираётубди, қўтириб муттаҳам! Тақсир, сизга бир оғиз гап! Менинг бекам, сизни ахтариб

топишни менга буюрган. У сизга тайинлаган гапларни ҳозирча айтмай қўяй, лекин даставвал, ижозатингиз билан шуни айтиб қўяйки, агар сиз уни аҳмоқ қилмоқчи бўлсангиз, бу жуда дағаллик бўлади, чунки менинг олижаноб бекам ёш нарса; шу учун сиз уни алдамоқчи бўлсангиз — гапнинг рости, бу ишингиз олижаноб бекага нисбатан пасткашлик ва bemazалик қилганингиз бўлади.

Ромео

Энагажон, бекангга салом айтиб қўй! Мен ваъдамга кафилман!

Энага

Оҳ, меҳрибон йигит, мен албатта бу гапларнинг ҳаммасини унга айтарман! Илоҳим, кўз тегмасин, у нақадар баҳтли хотин бўлади! Илоҳим...

Ромео

Сен унга нималарни айтиб берасан, энага? Сен-ку, гапимни бўлиб қўйдинг, ҳеч нарса демадим-ку.

Энага

Мен унга айтаманки, сиз кафилсиз, тақсир, шунинг ўзи, ўйлашимча, жуда бамаъни таклиф!

Ромео

Унга айтки:

Тавба — дуо ўқигали ижозат олсин,
Дуодан сўнг иккимизни роҳиб Лаврентий
Бирлаштириб никоҳ ўқир. Ол, хизмат ҳақинг!

Энага

Иўқ, йўқ, тақсир, буниси нима, пул керак эмас!

Ромео

Майли, майли, олинг!

Энага

Бугун кечқурунми, тақсир! Хўп, у ҳам у ерда бўлади!

Ромео

Сен кутиб тур бутхонанинг орқа ёғида,
Хизматкорим бир соат сўнг у ерга келар,
Унда берар сенга арқон-осма нарвонни;
Уша билан сирли кеча пайтда мен ҳам
Саодатим чўққисига қалқиб чиқаман.
Вафолик бўл, энди хайр, хизматларингга
Инъом бўлур. Саломимни еткиз бекангта!

Энага

Худо сизни ёрлақасин... тақсиржон, тақсир...

Ромео

Бирон гапинг борми менга, энага, гапир!

Энага

Навкарингиз ишончлими? Чунки, ҳар сирни —
Бирор билиб қолса у сир — сирликдан чиқар.

Ромео

У пўлатдай мустаҳкамдир, кафилман бунга!

Энага

Хўп, тақсир! Менинг бекам дунёниг энг ажойиб жононидир. Илойим-э! У кичкина маҳмадона кезлари эсимда... Оҳ!.. Бу шаҳарда Парис деган кибор бир афанди борки, менинг бекамни илиб олиш пайида юрибди. Аммо бекам, ўша афандини кўрса чўлбақани кўргандай бўлади. Мен ҳар замонда, Парис жуда муносиб йигит, деб қўйсам, бирам жаҳли чиқадики... Лекин қасам ичаманки, шундай дейишим биланоқ ранги рўйлари

докадай оқариб кетади. Розмарин¹ дарахти билан Ромео, иккаласи ҳам бир ҳарф билан бошланади, шундайми ахир?

Ромео

Шундай энага. Нега шуни сўрайисан? Ҳа, иккаласи ҳам «р» ҳарфи билан бошланади.

Энага

Вой масхарабоз-э! Бу-ку қучукнинг лақаби². «Р» ҳарфи фақат... Йўқ, йўқ билмайман, биламанки сизнинг исмингиз бўлак ҳарф билан бошланади. Менинг бекам, розмарин тўғрисида, сизнинг тўғриңгизда шундай ёқимили сўзлар айтиб ўтирадики, эшитсангиз баҳрингиз очилади.

Ромео

Беканга салом ва эҳтиромларимни айтиб қўй!

Энага

Хўп, минг қайта салом айтаман.

(Ромео кетади.)

Петр

Хизмат?

Энага

Петр, еллигичимни олиб олдимга туш, илдамроқ юр!

Кетадилар.

¹ Ҳамиша кўкариб турган розмарин деган бута вафо ҳам мангалик белгиси ҳисобланар эди.

² Ўша даврнинг грамматикасида «р» ҳарфи итнинг ирилашига ўхшаган товуш бергани учун уни «ит ҳарфи» дер эдилар.

БЕШИНЧИ САҲНА

Жульетта кириб келади.

Капулетти боғи.

Энагамни юборганда соат тўққизди;
 Айтган эди: қайтарман деб, ярим соатда,
 Балки уни тополмаган? Иўқ, мумкин эмас!
 У чўлоқдир! Ваҳоланки севги жарчиси —
 Тоғ бошидан сояларни қувлаб келувчи
 Шуъладан ҳам ўн карра тез инсон фикридир.
 Севги учар тез қанотли капитарлар билан,¹
 Шу сабабли Амурнинг² ҳам бордир қаноти.
 Қуёш чиқди ўз кунининг авж нуқтасига,
 Наҳордан то тушликкача уч узун соат,
 Аммо менинг юборганим ҳануз бедарак.
 Бўлса эди унда бир оз ишқу муҳаббат,
 Ёки қони сал иссиқроқ, у копток каби
 Учиб бориб Ромеога сўзимни элтар.
 Унинг сўзин эса менга олиб келарди.³
 Кексаларнинг феъли, лекин мурдадан бефарқ.
 Қўроғиндай сўлғин, совуқ, ялқов ва оғир.
 Ана,ана келаяпти! Э парвардигор!

Энага ва Петр кириб келадилар.

Энагажон, тиллагинам, қани нима гап?
 Кўролдингми? Хизматкорни чиқар ташқари!

Энага

Дарвозада бизни кутиб турасан, Петр!

Петр кетади.

¹ Миғологияда севги илоҳаси (тангриси) Венеранинг арасига кабутарлар қўшилган ҳолда тасвирланар эди.

² Амур — Венеранинг ўғли, севги тангриси ҳисобланиб, қанотли гўдак суратида тасвирланади.

³ Тенинс ўйинидан олинган копток образи.

Жульетта

Қани, жоним, меҳрибоним... Оҳ, хафамисан!
 Ғамли бўлса ҳам хабаринг қувноқ гапиргин!
 Модомики яхши экан, нега бўлмаса —
 Зарда билан бузаяпсан шу таронани?

Энага

Чарчаб кетдим, нафасимни ростлай, жон болам.
 Суякларим сирқирайди. Шунча кўп кездим!

Жульетта

Суякларим сенга берай — хушхабарни айт!
 Қани, сўзла, ўтинаман, жоним, бўлсанг-чи!

Энага

Шошқалоқлик эви билан! Сабр этинг бир пас!
 Кўрмайсизми, энтикаман, ололмай нафас.

Жульетта

Бу қанақа энтикишки, нафасинг етди —
 «Энтикаман» деган сўзни айтиб беришга?
 Узрларинг шунча узун, шулар ўрнига —
 Шу айтмаган сўзни айтиб берсанг бўларди.
 Хушхабарми? Шум хабарми? Шунга жавоб бер!
 Қолганини менга кейин айтиб берарсан.
 Қани айтгин: хушхабарми, ёки шум хабар?

Энага

Қанақа хабарлигини ўзингиз биларсиз?! Бутун бир хазинани ўзингга ёпиштирибсан-а! Ўзинг танладингми, энди ўзишдан кўр! Нимаям деб бўлади у хусусда. Юзлари-ку ойдек, аммо қадди-басти янам соз. Қўли, оёғини таърифлашга сўз йўқ, дарҳақиқат улар ҳар қан-

дай таърифдан юксак! Бахтинг ёр бўлсин, қиз!—Худо-
га шукур қил! Сиәлар овқатландиларингми?

Жульетта

Иўқ! Буларни мен аввалдан яхши билардим.
У ҳалиги... Тўй ҳақида нималар деди?

Энага

Оҳ, бошгинам оғриб кетди! Вой-вой бошгинам!
Бошим гўё тарс ёрилиб, чилпора бўлди!
Белим бўлса, вой белим, эй!—Вой, белгинам-эй!
Мени бугун ўлгудайин югуртдинг тоза!

Жульетта

Кечир мени, энагажон, қийнаб қўйдимми?!
Меҳрибоним: қани айт-чи, у нима деди?

Энага

Сизнинг ошиқингиз, жуда ҳалол бир афанди, жуда
боадаб, жуда ҳам меҳрибон, ҳаддан ташқари ёқимли
ва худо ҳақи, ҳимматли киши бўлганидан айтдики...
Айтгандай онангиз қаёқда?

Жульетта

Онам қайда? У қайда ҳам бўларди? Уйда!
Менга берган жавобларинг бари пойма-пой!
Эмиш: «ҳалол афандидай менинг ошиқим
Айтдики... айтгандай, онангиз қайда?»

Энага

Вой ўлай-e.. Қизишасиз!!! Қизишган билан
Шояд оғриқ суюгимга иссиқлик берса!
Бундан буён юурдаклик, ўз бошингизда.

Жульетта

Неа шунча чийиллайсан? У нима деди?

Энага

Сизга рухсат беришарми бугун черковга?

Жульетта

Беришар.

Энага

Боринг ота Лаврентийнинг кулбасига сиз.
Унда сизни куёв кутар хотин қилгали.
Үйноқи қон тўлди ана чаккаларингга!
Энди тағин қизаргуси у гул юзларинг.
Сиз черковга бора қолинг, менга йўл ўзга:
Ошиқингиз тун пайтида сизнинг уяга —
Киролсин деб битта нарвон топмоғим керак..
Сизга шодлик, менга заҳмат! Майлин бирон вақт
Бу кечанинг юки қиласиз сизни иккиқат.
Мен овқатга, сиз бўлсангиз кулбага жўнанг!

Жульетта

Жўнай энди баҳтга қараб. Кечир, энага!

Кетадилар.

ОЛТИНЧИ САҲНА

Роҳиб Лаврентийнинг кулбаси.
Лаврентий ва Ромео кириб келадилар.

Лаврентий-

Иншооллоҳ, никоҳ бўлгай тангрига маъқул,
Иншооллоҳ, оқибати беозор бўлгай!

Ромео

Омин, омин! Аммо ҳозир алам келса ҳам —
Бизни аслб ажратолмас хурсандчиликдан:
Ерим билан бир нафас ҳам улуғ қувончdir.

Дуо ўқиб бирлаштирган қўлларимизни,
Ишқ жаллоди, ўлим келсин, майли, ундан сўнг!
Жульеттани меники деб атабманми — бас!

Лаврентий

Тўлқинланган шодлик кети тўлқинли бўлур,
Шодликларнинг ғалабаси — уларга ўлим;
Уқ-дорию ўт бирлашган каби булар ҳам —
Куйиб кетар бир бўсада, битта бўсада.
Асал ғоят ширин бўлса кўнгил айнайди,
Иштаҳани бўғиб қўяр чучук еғжик.
Эви билан севиб турсанг ишқ маҳкам бўлур;
Шошилсанг ҳам, шошмасанг ҳам манзил ўшадир.

Жульетта кириб келади.

Келин келди, Юришлари мунча хиромон,
Оёқлари тошларга ҳам тегмай сузади.
Ез кунининг тиниқ шаффоф ҳавоси ичра —
Учаётган ўргимчакнинг тўрида агар —
Ошиқ шу он юриб кетса йиқилмас сира.

Жульетта

Салом сизга, тетикмисиз, руҳоний ота!

Лаврентий

Иккимиздан сизга, раҳмат, дейди Ромео.

Жульетта

Раҳмат учун табриклайман уни ҳам қўшиб!

Ромео

Агар сенда хурсандчилик андозалари
Тенг келолса менда бўлган хурсандчиликка,
Бу шодликни нафасларинг мадҳ этсин, дилбар!
Сўзларингнинг таронаси тўлсин ҳавога!
Очиб бергин баҳтли висол саодатини!

Ж у л ѿ т т а

Ҳар ким сўздан кўра ишга бадавлат бўлса —
 Моҳиятга мақтанади, зийнатга эмас.
 Уз давлатин санаб кўриш гадойга осон.
 Менинг ишқим бепоёндир, ҳадсиз, ҳисобсиз,—
 Ярмини ҳам санолмайман бу зўр давлатнинг.

Л а в р е н т и й

Ишни тезроқ бошлиш зарур! Муқаддас черков
 Бирлаштирсин ошиқ-маъшуқ тану жонини;
 Үшангача кўзларимни олмайман сиздан.

Кетадилар.

III ПАРДА

БИРИНЧИ САҲНА

Майдон.

Меркуцио, Бенволио, маҳрам ва хизматкорлар
кириб келадилар.

Бенволио

Меркуцио, ялинамай, бундан кетайлик:
Ҳаво қизғин, бунда кезар Қапулеттилар!
Учраб қолсак жәнжал-низо бўлур муқаррар,
Иссиқ чогда қон ҳам жинни бўлиб қайнайди.

Меркуцио

Биласанми, сен кимларга ўхшайсан, бир хил йигитлар бўлади, қовоқхоналарга кириб қоладилар-да, қиличларни столга уриб, «илойим, менга керак бўлмагайсан!» дейдилар-у аммо иккинчи қадаҳдан сўнг, сира зарур бўлмаган маҳалда, қилични хизматкорнинг биқинига суқиб қўядилар.

Бенволио

Наҳотки, мен шундай йигитларга ўхшаб қолган бўлсам?

Меркуцио

Бўлмасам-чи! Сен итальянларга хос қизғин бир йигитсан: сени сал қўзғатиб қўйсалар қизиб кетасан, қизиб кетсанг-чи, ўзинг қўзғала бошлайсан.

Бенволио

Хўш, нима демоқчисан?

Меркуцио

Шуни демоқчиманки, агар шу ерда сенга ўхшаганлардан иккитаси бўлганда эди, кўп ўтмай биронтаси ҳам соғ қолмас эди, чунки улар бир-бирини ўлдириб қўйган бўлар эдилар. Сени қара-я! Сен-ку бирорнинг соқоли сенинидан бир тола кам ёки ортиқ бўлса, сўкишиб, уришиб кетасан! Ёки биронтаси ёнғоқни қарсиллатса, сенинг кўзларинг ҳам ёнғоқ рангида бўлгани учун ўша билан ёқалашиб қоласан. Жанжалга баҳона топиш учун ўша сенинг кўзларингдан ҳам ўткирроқ кўзлар қайдা бор. Тухум ичи сариққа тўлгандай сенинг калланг ҳам жанжалга тирбанд. Аммо сен шу қадар кўп уришгансанки, сенинг калтакланган калланг пуч тухумга ўхшаб бўмбўш бўлиб қолган. Биттаси йўталиб қўйиб, сенинг офтобда ухлаётган лайчангни безовта қилгани учун ўша билан уришгансан-ку! Сен ҳайитдан олдин янги камзул кийгани учун машиначига, янги бошмогини эски тасмалар билан боғлагани учун бошқа бир йигитга ҳужум ҳам қилгансан-ку, ахир! Хўш энди қандай қилиб, мени жанжалдан тутиб қолмоқчисан?

Бенволио

Агар мен, сенга ўхшаб жанжалга ишқибоз бўлганимда, ҳар ким ҳам менга меросхўр бўлиш ҳақини жон деб сотиб олар эди-ю, менинг ўлимимни кўпи билан биру чорак соат кутарди, холос!

Меркуцио

Сенга меросхўр бўлиш-а? Ия, сен бойми?

Бенволио

Қалламни бераманки, Қапулеттилар келаяптилар!

Меркуцио

Товонимни бераманки, бунақа гапинг учун пинагими-
ни ҳам бузмайман!

Тибальт ва бошқалар кириб келадилар.

Тибальт

Бирга юринг! Булар билан гаплашмоқчиман!
Қайси бири жавоб бергай, бир оғиз гап бор!

Меркуцио

Нега бир оғиз гап? Бу гапни яна бирон нарсага
қўшиб қўйинг! Масалан: гап ҳам, зарб ҳам бўлсин!

Тибальт

Хонаси келганда, мен шу бобда қанчалик забар-
даст эканимни кўрсата оларман!

Меркуцио

Хонаси келмай қолса-чи? Ўзингиз хонасини келти-
ролмайсизми?

Тибальт

Меркуцио, сен Ромеога жўр бўлиб куйляяпсан-al

Меркуцио

Жўр бўлиб куйлайманми? Сен бизларни кўча-кўй-
ларда дайдиб юрган ашулачиларга ўхшатибсан, шекил-
ли! Ундоқ бўлса билиб қўй, бизнинг музикамиз се-
никига ҳамоҳанг бўлолмайди. Мана менинг ғижжагим —
у сизни ҳозир ўйинга тушириб қўяр! Бор-э, бетамиз!
Бунинг гапини қара: жўр бўлиб куйлармишман!

Бенволио

Биз бу ерда майдондамиз, халқ ўртасида.
 Керак бўлса бирон бошқа хилват жой топинг,
 Ё шовқинсиз баҳсингизни давом этдиридинг.
 Ё тарқалинг! Бунда бизга ҳамма қарайди.

Меркуцио

Кўз дегани қараваш учун берилган ахир,
 Истаганча қарасинлар силжимайман ҳеч!

Ромео кириб келади.

Тибалт

Сен билан бас! Мана келиб қолди гумаштам...

Меркуцио

Онт ичаман, у сизларга қулвачча эмас.
 Агар сиздан кечикиброқ чиқса майдонга.
 У ҳолда, ҳа, ҳақингиз бор масхаралашга.

Тибалт

Эҳ, Ромео, менинг сенга бор муҳаббатим —
 Ҳанузгача фақат битта сўз топган: олчоқ!

Ромео

Тибалт, сени севищимга бир сабаб бордир,
 Ўша сабаб босиб қўйди, менда шу маҳал —
 Қилингга қарши олов олган ғазабни.
 Мен сира ҳам олчоқ эмас. Алвидо сенга!
 Мени яхши танимайсан: кўриб турибман.

Тибалт

Сен бизларга етказганинг ҳақоратларга
 Бу гап уэр бўла олмас. Тўхта, ҳой бачча!

Р о м е о

Мен ҳеч қачон қилғанмасман сени ҳақорат.
 То бу ишқнинг сабабини тушунмагунча,
 Сени қанча севганимни англай олмайсан;
 Менинг азиз Капулеттим, сенинг фамилиянг
 Уз фамилиям чамасида менга яқиндир.

М е р к у ц и о

Ҳой разиллик, номуссизлик, бандалик шунчал

(Қиличини суғуради.)

Бу қиличим зарби ювар шармандаликни,
 Тайёрмисиз, каламушлар овчиси, Тибальт?

Т и б а л ь т

Сенинг менга даъвойинг не?

М е р к у ц и о

Мұхтарам мушуклар шоҳи, мен сизнинг түққиз жо-
 нингиздан биттасигагина даъвогарман. Мен унга қасд
 құлмоқчиман, бундан сұнг, сиз ижозат берсангиз, қолган
 саккизтасини ҳам үйиб-үйиб олмоқчиман. Сиз шамши-
 рингизни құлғидан ушлаб, үз қинидан суғуришга тобиц-
 гиз борми? Фурсатни бой берманг, бұлмаса, менинг қилич-
 чим илгарироқ суғурилиб чиқади.

Т и б а л ь т

Мен раддибадалга тайёрман!

(Қилич суғуради.)

Р о м е о

Меркуцио, қадрдоним, қилични қайтар!

Меркуцио

Энди, тақсир, зарба учун навбат сизники!

Уришадилар.

Ромео

Бенволио, ўртага туш, қуролларин торт!
 Афандилар, бу уят-ку! Зўрлик нимага?
 Меркуцио, Тибалт, сиз ҳам қулоқ солингиз,
 Веронада тўполонга бек рухсати йўқ!
 Тибалт, тўхта! Меркуцио, азизим, тўхта!

Тибалт иайти пойлаб Ромео қўли остидан
 Меркуциони яралаб ўз ҳамроҳлари билан қочиб
 кетади.

Меркуцио

Яраландим!..
 Менга омин! Вабо тушсин хоналарингга!
 У кетдими? Яраланмай, бутун кетдими?

Бенволио

Яраландингми?

Меркуцио

Битта яра, лекин бунинг ўзи ҳам етар:
 Ҳой маҳрамим! Ҳой йигитча, жарроҳни чақир!

Маҳрам кетади.

Ромео

Дадил бўл, дўст, яранг оғир эмас албатта.

Меркуцио

Йўқ, албатта: у қудуққа ўхшаб чуқур ҳам эмас, бут-
 хона-ю, черков эшикларидай кенг ҳам эмас. Лекин ўша

яранинг ўзи етиб ортади ҳам. Эртага мени чақириб кўрчи, жавобида фақат қабрда бир банда топасан. Бу дунёдан иғарнб чиқарганларига шубҳам йўқ. Хоналаринг билан вабога йўлиққурлар! Қаранг-а! Кучук, каламуш, сичқон, мушук ҳам кишини ўладиган қилиб тишлаб қўйиши мумкин экан-а! Мақтандо, маҳмадона, шаллақи-ю, илми-ҳисобдаги тўрт амалнинг ҳамма қоидаларига мувофиқ уришади. Нега сиз ўртамизга кирдингиз? Сизнинг қўлингиз остидан у менга тиф етказиб яралади.

Р о м е о

Мен бу ишни босди-босди қилмоқчи эдим.

М е р к у ц и о

Бенволио, мени бирон уйга олиб кир.
Дармоним йўқ! Вабо кирсин хоналарингга.
Бу хусумат мени энди қилур — муқаррар —
Қуртларга ем... Вабо ёғсин хоналарингга!

М е р к у ц и о в а Б е н в о л и о кеталилар

Р о м е о

Шўрим қурсин! Бекнинг яқин уруғидир у.
Менинг эса азиз дўстим — ўлар ҳолатда.
Тибалът менинг номимни кўп қалака қилди.
Бехабар-да ўртадаги қариндошликтан!
Меркуцио мен туфайли қонга булғанди.
Сенинг ҳуснинг кўп юмшатди мени, Жульетта,
Сенинг ҳуснинг журъатимни эритиб қўйди.

Б е н в о л и о кириб келади.

Б е н в о л и о

Ромео, оҳ, Меркуцио ўлди! Ромео!
Дунёмиздан жуда барваҳт жирканган у руҳ,
У қўрқмас руҳ парвоз этди булутлар сари.

Р о м е о

Оҳ, қаро кун! Қаро кунлар негизидир бу!
Боши мудҳиш, оқибати бундан ҳам мудҳиш!

Б е н в о л и о

Бу томонга шошиб келар қутурган Тибалът!

Р о м е о

У соппа-соғ, менинг дўстим бўлса — бежондир,
Эҳ, ювошлик, энди хайр, йўқолиб кетгин,
Ут қарашли қаҳрим бўлсин менинг етакчим!

Тибалът кириб келади.

Тибалът, қайтиб олгин менга айтган сўзингни,
Сен-ку менга «олчоқ» дединг, олчоқ ўзингсан,
Меркуцио руҳи мана парвоз қилмоқда,
Ул ўзига ҳамроҳ тилар, сени кутмоқда,
Сен ёки мен, ё иккимиз, учамиз кўкка.

Тибалът

Аблаҳ бола, сен у билан тил биритирдинг,
Энди яна ўша билан бирга йўқолгин!

Р о м е о

Ҳал қиласи мана қилич.

Уришадилар. Тибалът йиқиласи.

Б е н в о л и о

Тезроқ қоч, Ромео!
Сен Тибалътни ўлдирибсан, ана одамлар!
Қотиб турма! Қўлга тушсанг агар мабодо,
Бек мутлақо ўлимингга ҳукм қилғуси!
Тезроқ қочгин!

Р о м е о

Мен тақдирнинг масхарабози.

Бенволио

Ҳалокатни кўриб туриб нега қочмайсан?

Ромео чиқиб кетади.
Шаҳар аҳли кириб келади.

1-Фуқаро

Қайга қочди Меркуцио қотили, ажаб?
Қотил Тибалт қай томонга сирғилди экан?

Бенволио

Ул ётибди мана бунда.

1-Фуқаро

Юринг, жаноблар!
Бек номидан буюраман, буйругим — қонун!

Бек ўз аъёнлари билан, Монтекки ва
Капулетти ўз хотинлари билан ва яна бошқалар
кириб келадилар.

Бек

Билмоқчиман,— ким бошлади бу шум жанжални?

Бенволио

Шафқатли бек! Эшишиб ол, шу воқеани —
Бу шум дуэль тафсилотин эшишиб қўйгин;
Бу ётганни ўлдиргандир бизнинг Ромео,
Аммо бу ҳам қатл этгандир қариндошингни.

Капулетти хоним

Оҳ, акамнинг ўғли, Тибалт! Қадрдон Тибалт!
Оҳ, бек! Жиян! Эрим! Эвоҳ, ёвлар ғарази —
Бу кун хўрлаб қўйди бизнинг насабимизни!
Адлинг билан ғаддорларнинг қонин тўк, бегим!
Оҳ, меҳрибон жиянгинам!

Бек

Айт, ким аввал хусуматнинг қўйди жиловин?

Бенволио

Ромеодан ҳалок бўлган Тибалт айбдор.
 Ромео кўп одоб билан унга ялинди,
 Жанжал қилсанг, қаҳрланиб қолар бек,— деди.
 У эҳтиром, очиқ фикр билан сўзлади.
 Аммо бежиз; қизгин Тибалт сира кўнмади.
 У ўқталди қиличин мард Меркуциога.
 Меркуцио ҳам қизиди. Чолишди тиғлар,
 Бир қўлида Меркуцио зарба индирав,
 Иккинчи бир қўли билан қайтариб турар
 У Тибалтнинг эпчил, моҳир зарбаларини.
 Шу вақтда Ромео ҳам қичқириб деди:
 «Дўстлар, етар!» Шундан кейин товушдан ҳам

тез

У даҳшатли қиличларга ташлади ўзин;
 Ажратмоқчи бўлган эди — шунда орқадан
 Тибалт уриб ҳалок қилди Меркуциони,
 Тибалт қочди, аммо тағин анча ўтмайин
 Қайтиб келди Ромеонинг олдига қизиб,
 Шундагина қарор қилди ўчга Ромео.
 Яшинвори бир жанг бўлди. Ажратолмадим.
 Ушбу жангда ҳалок бўлди шуҳратли Тибалт.
 Бундан кейин дарҳол қочиб кетди Ромео.
 Улай агар, ёлғон десам, бари сўзим чин!

Капулетти хоним

Бу Монтекки уруғидан: булар — қон-қардош.
 Бунинг гапи уйдирма гап, сўзи ғаразлик.
 Йигирмата киши экан улар бу ишда,
 Биттасини ўлдирмоққа улгурнишибди.
 Бизга бўлган ҳақоратга қасос истаймиз:
 Ҳеч яшашга ҳаки йўқдир Тибалт қотили!

Бек

Тибалът ўлди. Лекин ўзи ҳам ўлдирған-ку.
Меркуцио хуни учун кимлар жавобгар?

Монтекки

Нимага ҳам жавоб берсін бизнинг Ромео?
Ү қилганин қонун ўзи қиласы да-ку:
Қонунаң ҳам Тибалът ўзи ўлимга маҳкүм.

Бек

Бу жиноят. Бадарғадир бунинг жазоси.
Бу низода мен ўзимман энди даъвогар:
Хонумоним сиз туфайли хуноб бўлмишdir.
Ҳаммангизга жазо бергум, ишонаманки —
Ҳаммаларинг азам учун товон тўлайсиз!
Бундан кейин бепарвоман кўз ёшлирига,
Ялинишлар алдай олмас қулоқларимни.
Кўзларимдан тез йўқолиб кетсин Ромео,
Акс ҳолда ўлимига ҳукм чиқади.
Ҳаммаларинг бўйсунинглар! Олинг жасадни!
Қотилларга шафқат қилмоқ ўзи жиноят!

Кетадилар.

ИККИНЧИ САҲНА

Капулеттининг боғи

Жульетта кириб келади.

Жульетта

Тезроқ чопинг Феб уйига ўтли айғирлар!
Фаэтондай аравакаш сурсайди сизни —
Албатта тезроқ бориларди кун ботар сари;

Тун уйига сизни тезроқ әлтиб қўярди¹...
 Мұҳаббатга воситачи бўлган қора тун —
 Чойшабингни тезроқ ёзгин бошимиз уэра —
 То билдирмай қучиб олсин Ромео мени.—
 Ошиқларнинг либосини безайди ҳусни.
 Мұҳаббатнинг ўзи сўқир, тунга у хуштор.
 Эй тун, сен-ку парда ёпган ифратли бону,
 Келиб ўргат соф қалбларнинг ўйинин бизга.
 Чаккамизга тўлиб қолган ҳуркович қонни —
 Қанотингда парвариш қил дадиллансан деб,
 Ба билсинки чин муҳаббат — камтариликдир.
 Кела қол тун, тун ичиди Ромео — кундуз,
 Сен кечанинг қанотида қордай оппоқсан,
 Қора зогнинг белидаги қорлар сингари.
 Кела қол сен, қорақош тун, қадрдоним тун,
 Келтириб бер менга азиз ёр — Ромеони!
 Улиб қолса майда-майда юлдузларга бўл,—
 Осмон ҳам шаффоф бўлур шу юлдузлардан,
 Бутун дунё ошиқ бўлар туннинг ҳуснига.
 Шўх қуёшга топинишни ҳамма тарк этар.
 Сотиб олдим мен севгининг қасрини, аммо —
 Шу қасрга ҳали ҳозир бека эмасман;
 Үзимни ҳам сотиб олган менга эгамас!
 Эй, бадбаҳт кун!

Арафанинг тунига ўхшар —
 Ўшанда ҳам либосларни тезроқ кийишга
 Ҳайит кунин соғинади норасида қиз.
 Оҳ, энагам! Хабар борми! Қанақа гап бор?
 Ромеодан сўз очган тил осмондай бурро!

Энага арқон олиб киради.

¹ Феб (Аполлон)нинг ўғли Фаэтон отасининг қуёшли арасини бир кунга сўраб олган эмиш. Бироқ айғирларни тия олмасдан, ерия куйдиришга сал қолган. Аммо ўша кун қуёшни гарбга тезроқ ҳайдаб қўйган эмиш. (Юнон афсоналаридан).

Дарак борми? Айт, энагам! Ромео учун
Сен арқонлар тополдингми?

Э на га

Ха, ха арқонлар...

Арқонни ерга ташлайди.

Ж ульетта

Энагажон! Айт, нимага шу безовталик?

Э на га

Афсус, афсус! У ўлгандир, ўлгандир, ўлган!
Бизлар ҳалок бўлдик бекам, ҳаммамиз ҳалок!
Аттанг, аттанг вафот бўлди, ўлдирилди у!

Ж ульетта

Фалак шунча жафокорми?

Э на га

Нима ишники —

Фалак қила олмас экан, Ромео қилди!
Войдод, войдод, ким ўйлабди? Ромео, войдод?

Ж ульетта

Шайтонмисан, менга мунча азоб берасан?
Дўзахий ҳам чидай олмас бундоқ қийноққа!
Айт, Ромео ўлдиргани ўзини? «Ха» де! —
Бу жавобинг бир қарашда ўлдира турган —
Аждарнинг шум назаридан кўра ёқимли!
Шундай эмас; сен «ҳа» десанг одам эмасман.
Қўзларингни юмиб қўйдинг. Қани бўлсанг-чи!
Улган бўлса бир «ҳа!» дегин, бўлмаса бир «йўқ!»
Битта товуш ҳал қилгуси: алам ё шодлик!

Энага

Шу кўзларим, шу кўзларим кўрди ярани —
 У мард йигит сийнасида, тавба, э худо! —
 У бир сўлғин гулга ўхшар қонга беланган,
 Ачинарли, ачинарли қонли бир жасад!
 Лахталанган қон бор эди яра устида,
 Шунда менинг ҳушим кетиб беҳол бўлдим мен.

Жульетта

Ёрил, эй дил! Эй баҳтиргни ётқизган бадбахт! —
 Э кўзларим, эркдан кечинг, чўкинг зиндонга!
 Бадбахт вужуд, тағин қайтгин она тупроққа!
 Бирга ётгин зил тобутга Ромео билан!

Энага

Тибалът, Тибалът, менинг азиз ошнам Тибалът!
 Оҳ меҳрибон, гўзал Тибалът, оҳ олижаноб!
 Кўрди сенинг ўлимингни кўр бўлғур кўзим!

Жульетта

Бу қанақа, икки ёқдан эсувчи шамол!
 Ромеоми ўлдирилган! Тибалътми ўлган!
 Бу севикли акажоним! У севикли эр!
 Э қиёмат карнайчиси, ҳаммани ўлдир!
 Булар ўлса, бошқаларга умр не керак?

Энага

Тибалът ўлди, Ромео ҳам бадарға бўлди.
 Ўлдиргани учун сургун кетди Ромео.

Жульетта

Ромеоми тўқди Тибалът қонини? Ераб!

Энага

Шўрим қурсин! Ҳа, у тўқди, худди у тўқди!

Жульетта

Чеҳраси — гул, дили эса илоннинг дили!
 Гўзал ғорда яшар экан йиртқич аждаҳо!
 Оҳ, фаришта юзли иблис: гўзал ситамкор,
 Зоғ-кабутар, очкўз бўри — ювош қўзичоқ,
 Кўп илоҳий сиймоси бор, аммо паст махлук,
 Қиёфангниг акси экан ичинг — юрагинг,—
 Ҳалол — аглаҳ, тўғри — олчоқ, эзгу — лаънати!—
 Эй табиат, сен-ку шундай бадкирдор руҳни —
 Жаннатдаги шунча ширин танга берибсан,
 Жаҳаннамда қиласидиган ишинг демак, йўқ!
 Шунча сўлим муқовада шу разил китоб!
 Шундай олий қаср ичида ёлғон, мумкинми?

Энага

Эркакларда на шараф бор, на ору номус;
 Ҳаммаси ҳам муттаҳамдир, қаллоб, бевафо!
 Вой, хизматкор қайга кетди? Менга оқдори!
 Бўлмаса-чи қаритади мени аламлар!
 Ромеога лаънат бўлсин!

Жульетта

Танглайнингда қотсин тилинг, жим тур!— Ромео
 Лаънат учун туғилганмас, лаънатнинг ўзи —
 У манглайга қўнай деса хижолат қиласар.
 Дунёларниг маликаси бўлган шарафга —
 Тож кийгизиб қўядиган Ромео, билсанг!
 Унга шунча тил тегиздим, мен ўзим — ҳайвон!

Энага

Акангизни ўлдирганни мақтарсиз ҳали?

Жульетта

Бўлмаса мен ўз эримни сўкайми?— Иўқ, йўқ!
 Уч соатлик хотининг ҳам сўксса, хорласа,
 Исминингни ким иззат қиласар, эй менинг эрим?

Акамни сен ўлдирибсан, оҳ ярамас шум!
 Аммо менинг эримни ҳам ярамас акам —
 Улдириши мумкин эди! Тининг, кўз ёшлар!
 Кўз ёшларки, дарду ғамга бож тўловчилар,
 Нечун бежо тўкиласиз баҳтим устига:
 Эрим тирик! Уни Тибалът ўлдирмоқчи-ди.
 Тибалът ўлиқ! У эримни ўлдирмоқчи-ди.
 Ҳамма нарса ўз жойида! Нега мен йиғлай?
 Акамнинг ҳам ўлимидан бешбадтар, бир сўз
 Мени буткул ҳалок этди. Унутсам, кошки!
 Гуноҳ қандай тирнаб турса гуноҳкор дилин,
 Хотирамни — эсларимни қийнади бу сўз;
 «Тибалът ўлди. Ромео ҳам бадарға бўлди».
 Ҳа, «бадарға!» Бу ёмон сўз —«бадарға» сўзи
 Минглаб-минглаб Тибалътларни унутдиролди.
 Шу ўлимнинг мусибати етар эди-ку!
 Аммо мотам шерик излар доим ўзига,
 У хоҳларки ҳамроқ бўлса бўлак балолар!
 Сен нега ҳам менга айтгач: «Тибалът ўлди», деб,
 Сўйламадинг отанг ёки онанг ҳам ўлган,
 Менда фақат буларгами йиғлаш ҳақи бор?
 Акам ўлди, майли, яна нима керак-ди:
 «Ромео ҳам бадарғада» дейишинг нега?
 Бу сўз билан отам, онам, Тибалът, Ромео
 Ва мен ўзим ўликлармиз! «Ромео сургун!»
 Бу кўп ғаддор бир товушдир! Ҳаммамизни ҳам
 Кўмиб қўйди ўша товуш белоён, беҳад.
 Тилим ожиз! Отам қайдад? Қайдадур онам?

Э на га

Фарёд тортиб йиғлашади Тибалът устида.
 Хоҳлайсизми, олиб борай сизни у ерга?

Ж ульетта

Майли улар жасад узра кўз ёши тўксин,
 Фарёд тингач, сурилгангавой деб йиғларман.

Арқонни ол! Бу бечора — мендай алданди!
 Ромеонинг сурилиши — менга ҳалокат!
 Ётогимга сўқмоқ йўли бўлардинг, арқон!
 Үзим қизу бева бўлиб ўламан энди.
 Никоҳнинг лол ётогига юрайлик, ноchor.
 Қизлигимни эrim эмас, ўлим олгуси!

Э на га

Хонангизга бориб туринг, юпатиш учун —
 Топиб келай Ромеони ҳузурингизга;
 Қайдалигин мен биламан. Бугун кечаси —
 Ёнингизда тайёр бўлур. Яна ўзгинам —
 Уни излаб топмоқ учун кулбага борай.

Ж ульетта

Топгин тезроқ! Шу узукни унга бер дарров;
 Унга айтки: «Мени кечир!» демоқчи эдим.

Кетадилар.

УЧИНЧИ САҲНА

Роҳиб Лаврентийнинг кулбаси.
 Роҳиб Лаврентий кириб келади.

Л аврентий

Бу ёққа чиқ, бу ёққа чиқ, қўрқоқ Ромеом!
 Шавкатингга ошиқ бўпти аламлар, дардлар,
 Ҳалокат-ла ўқилгандир, никоҳнинг, ўғлим..

Р о м е о кириб келади.

Р о м е о

Ота: айтинг, нима бўлди? Ҳукм қанақа?
 Қандай янги алам билан танишмоқчиман!

Лаврентий

Дарду ғамлар сенга жуда қалин дўст экан;
Бекнинг ҳукмин олиб келдим, меҳрибон ўғлим!

Ромео

Бек ўлимдац өнгил ҳукм чиқардимикан?

Лаврентий

Сен тўғрида бекнинг ҳукми кўп қаттиқ эмас;
Ўлим эмас, бадарғага маҳкум қилиндинг!

Ромео

Бадарғами? Инсоф қилгин! «Ўлим» десанг-чи!
Ўлимлардан бадтарроқдир «бадарға» деган!
Шуни айтма!

Лаврентий

Веронадан суриласан сен.
Бардош қилгин! Ернинг юзи улуғ, бепоён.

Ромео

Веронадан ташқарида ҳеч бир дунё йўқ:
Унда аъроф¹, қийнов, жафо, жаҳаннам бордир.
Бундан кетсам, жаҳондан ҳам кетдим демакдир.
Бу жаҳондан кетмак эса ўлимдир, ўлим!
Бадарғанинг ўзи худди ўлим демакдир.
Шу гап ўзи — олтин чопқи, шу чопқи билан,
Бошим кесиб ўлдирасан — ўзинг куласан.

¹ Диний ақидаларга кўра, жаннат билан жаҳаннам ўртасида бир жойдирки, гуноҳкорларнинг руҳлари бу ерда кўп қийноқ ва синовлар билан тозаланиб, кейин жаннатга киргизилармиш.

Лаврентий

Вой, одамнинг тўймас нафси, вой, кўрнамаклик!
 Улим эди гуноҳингнинг ҳақи қонунан,
 Аммо сени бек ёқлади, қонунни четлаб,
 У сургунга алиштириди қора ўлимни:
 Бу-ку сенга илтифотдир — наҳот, кўрмайсан!

Ромео

Бу мен учун катта қийноқ, илтифот эмас!
 Жульетта қайда бўлса, осмон у ерда.
 Ҳар бир кўппак, мушук, сичқон, ҳар пасткаш
 махлук,
 Кўк тагида пафас олар, осмонга қарап,—
 Лекин шундан маҳрум экан фақат Ромео!
 Ўлимтикка қўниб юрган пашшаларнинг ҳам
 Ҳақ-ҳуқуқи Ромеонинг ҳақидан баланд!
 Чунки улар Жульеттанинг оппоқ қўлидан
 Ўрмалайди, ўрмалайди дудоқларидан,
 Дудоқларки, бир-бирига тегса қизарар.
 Истаганча лаззатларни ўғирлай олур.
 Менинг эса умрим — барбод: мен сурилганман.
 Ҳамма нарса пашшага-ю, мен четга учай.
 Ахир, улар ҳур пашшалар; мен бўлсам сургун.
 Шундан кейин: ўлим эмас — сургун деб кўр-чи?
 «Сургун» сўзи деганингдан — бир ўткир пиçoқ,
 Еки оғу ё тез бўғар ажал йўқмиди?
 Биратўла ҳалок қилсанг бўлмасми мени?
 Бу сўз, наҳот назарингда, ўлимдан афзал?
 Жаҳаннамда гуноҳкорлар шу сўзни айтар,
 Сен-ку менинг дўстим эдинг, авлиём, пирим,
 Қандай қилиб менга айтдинг «бадарға» сўзин?

Лаврентий

Менга қара, жинни ошиқ, девонагинам...

Ромео

Сен ҳали ҳам бадарғадан сўзламоқчисан!

Лаврентий

Мен бу сўзга қарши сенга шифо бераман;
Фалсафанинг ғоят ширин шарбатидан ич,
Дарҳол кўнглинг овунади сургун ҳам бўлсанг!

Ромео

Мен сургунга кетар бўлсам, фалсафанг бир пул!
Жульеттани фалсафами яратса олар?
Фалсафанинг қурби етмас шаҳарни йиқсин.
Е ҳукмни бекор қилсин! Сўз очма, бўлди!

Лаврентий

Қулоқ деган бўлмас экан девоналарда...

Ромео

Қандай қилсин, кўз бўлмаса у дополарда?

Лаврентий

Қани, энди сўзлашайлик сенинг ишингдан!

Ромео

Ишнинг тагин билмаганда, жим турмоқ маъқул!
Жульеттани севсанг эди мендай ёш бўлиб,
Мен сингари бир соатга уйланса эдинг,
Тибалтни сен ўлдирсайдинг, ваҳмага тушсанг,
Сўнгра яна бадарғага кетсанг мен каби,—
Қани қандай бўлур эдинг? Сотмас эдинг гап!
Сочларингни юлиб, ерга қулардинг мендай,
Тананг билан ўлчаб қўяр эдинг гўрингни.

Эшик қоқилади.

Лаврентий

Тур! Эшикка бирор келди! Яширин, ўғлим!

Ромео

Майли, менинг фарёдларим дуди, тумани —
Изловчилар кўзларидан яширгай мени!

Эшик яна қоқилади.

Лаврентий

Ким у? Ҳозир! Ахир ким у? — Ромео, боргни!
Сени ҳозир ушлайдилар! Тўхтанг! Турсанг-чи!

Эшик яна қоқилади.

Меҳробга бор! Ҳа эшитдим! — Ёраб, ё оллоҳ!
Ким у тентак?! — Ҳозир, дедим! Ҳозир очаман!

Эшик яна қоқилади.

Нега мунча шовқин-сурон? Кимсиз? Не даркор?

Энага

(ташқаридан)

Очсангиз-чи, ҳаммасини ҳозир биласиз.
Жульеттанинг амри билан келган кишиман.

Лаврентий

Киринг!

Энага кириб келади.

Энага

Авлиё пир, Авлиё пир, қани тез айтинг.
Хонимимнинг эри қани? Қани Ромео?

Лаврентий

У ўзининг кўз ёшидан маст-аласт ётар.

Энага

Хонимимнинг ҳолати ҳам худди шұнақа!

Лаврентий

Худди шундай! Эвоҳ, қандай бахтсиз ўшашлик!

Энага

Ачинарли, күп дилозор бир ҳолат! Ана —
Худди шундай ётиб йиғлар, ҳұнграп ва инграр.—
Мард бұлсанғиз, әр бұлсанғиз, қани құзғалинг!
Қани туринг, Жульеттанинг ҳұрмати, туринг!
Нега шунча теран ғамга ботиб кетибсиз?

Ромео

Ох, әнага!

Энага

Ох, тақсирим! Ҳамма гапта чек құяр ўлым.

Ромео

Жульеттадан гапирдингми? Үнга не бўлди?
Мен қариндош қонии тўкиб навжувон бахтни —
Бузганимга мени қотил деб қарғайдими?
Ўзи қайда? Менинг маҳфий, гўзал хотиним?
Нима дейди ўзим поймол қилган никоҳдан?

Энага

Ох, тақсирижон, гапирмайди, нуқул йиғлайди.
Гоҳ түшакка ўзин ташлар, гоҳо қўзғалар,
Гоҳо «Тибалт» деб чақирап, гоҳо «Ромео!»—
Сўнгра яна ҳушсиз ётар.

Р о м е с

Албатта исмим —

Унга қарши оташин ўқ каби туюлар,
 Ё акасин ҳалок қилган лаънати қўлдай.
 Сўйла ота, вужудимнинг қайси қисмида
 Қайси разил бўлагида исмим яшайди?
 Сўйла, ҳароб қилиб ташлай мурдор маконни.

(Қиличини суғуради.)

Л а в р е н т и й

Қўлингни торт! Эркакмисан, нимасан ўзинг?
 Кўринишинг гўё эркак, йигинг — занчалиш.
 Қидирингда бир ҳайвоннинг бефаҳм қаҳри бор;
 Сен қалбаки эр танида хотин экансан;
 Ё хунаса суратида бадкирдор ҳайвон!
 Худо ҳақи, ишларингга таажжубдаман!
 Ўйлар эдим, руҳинг маҳкам, жасур инсонсан.
 Тибалытдан сўнг ўзингни ҳам ўлдирасанми?
 Сени дея тирик турган ёш хотинингни —
 Ўлдирмоқчи бўласанми лаънатга учраб?
 Нега ерни, тирикликни, фалакни сўқдинг?
 Ахир, ҳаёт, дунё, фалак — ҳаммаси ҳамкор;
 Учови ҳам сенда жам-ку, тўэритасанми?
 Сен доғ солдинг ақлу ишқа ва одамзодга.
 Сен буларга бойсан, лекин ялқов судхўрдай —
 Давлатингдан бетайинча фойдаланасан;
 Безамайсан қиёфангни, ақлу севгингни.
 Одамият хосиятини йўқотиб, шаклинг —
 Худди мумдан ясалган бир қўғирчоқ бўлди.
 Муҳаббатинг даргоҳида қасамни буздинг.
 Қасам ичдинг, хотинимни асрайман, дединг.
 Аммо ҳозир, феълинг билан ўлдирмоқчисан.
 Муҳаббатнинг ва одамнинг ҳусни бўлган ақл —
 Сенинг севги ва феълингда барбод бўлгандир.

Худди нўюқ бир сарбознинг ўқ дорилари
 Уқдонида кўп бемаҳал портлаганидай;
 Сени сенинг ўз қуролинг парчалаб қўйди.
 Номус қилгин! Ахир ҳали Жульетта ҳаёт.
 Сен уни деб ўлмоққа ҳам тайёр эдинг-ку!
 Энди унинг висолига етдинг: бу — ютуқ!
 Тибальт сенга ҳамла қилди, ўлдирдинг, ютуқ!
 Гуноҳингга ўлим эди қонунан жазо,
 Аммо сенга сургун чиқди; бу ҳам бир ютуқ!
 Бу ҳаммаси сенинг учун улуғ ғанимат!
 Пешонангни силамоқда ҳашаматли баҳт.
 Лекин сен-чи, бадхулқ, нодон бир қиз сингари
 Ўпкаланиб ўз баҳтингга димоғ қиласан.
 Эсингни йиғ, йўқса, эсиз, ҳалок бўларсан.
 Севганингнинг олдига бор, аҳд қилингандай,
 Хонасиға кириб унинг кўнглини юпат!
 Тонг отмасдан, лекин, жўнаб кетгин у ердан,
 Акси ҳолда Мантуяга улгуrolмайсан.
 Мантуяда яшаб тургин, фурсати келгач,
 Биз никоҳни эълон қилиб дўстларни яна
 Яраштириб сенга бекдан афв сўрармиз,
 Қайтарамиз сўнгра сени тағин шаҳрингга,
 Ўша шодлик шу аламдан юз чандон бўлур.
 Бор, энага, хонимингга биздан салом айт,
 Айтгин, ҳамма хона аҳлии ётқизаверсин;
 Зотан ҳамма мусибатдан толган, чарчаган.
 Ўз вақтида Ромео ҳам етиб боради.

Э на га

-Туни бўйи сизни тинглаб турсам, ё рабби!
 Ўгитларга қулоқ солсам! Ана донолик!
 Сизни, албат келади деб айтаман, тақсир!

Р о м е о

Айтгин, мени койигани шайланиб турсин!

Энага

Бу узукни, тақсир; сизга атаб берганди.
Чаққон бўлинг, тезроқ келинг, кеч кирди, тақсир!

Кетади.

Ромео

Бу ҳаммаси юрагимга тасалли берди!

Лаврентий

Хайрли кеч! Боргин, ўғлим, аммо огоҳ бўл,
Посбонлар чиққунча сен шаҳардан чиқкин,
Гар кечиксанг кийимингин ўзгартиб жўна.
Мантуяда кутиб ётгин. Агар мабодо—
Бирон яхши хабар чиқса хизматкорингдан
Сенга мутлақ билдиарман. Кел, қўлингни бер;
Хайрли кеч! Хайрли кеч! Вақт ҳам кечкирди!

Ромео

Ерим билан мулоқотининг шавқи бўлмаса —
Менга оғир келар эди сендан ажралмоқ.
Алвидо!

Кетадилар.

ТУРТИНЧИ САҲНА

Капулетти уйида бир хона.
Капулетти, унинг хотини ва Парис кириб
келадилар.

Капулетти

Бу мусибат шунча оғир бўлдики, граф,
Қизимизни тўй ишига тайёрлолмадик.
У Тибалтни, худди мендай, яхши кўрарди.

Ҳаммамиз ҳам бир кун ўлмоқ учун тугилган.
Вақт кечкирди. Қиз бу ерга ортиқ чиқолмас.
Ҳатто сизнинг ташрифингиз бўлмаса бугун,
Мен ҳам ётган бўлар эдим бир соат олдин.

П а р и с

Мотам чоги совчиликка ўрин йўқ. Хайр,
Хайр, хоним! Жульеттани сўраб қўйинглар!

К а п у л е т т и х о н и м

Мен эртага эрта билан ундан сўрарман;
Ҳозир эса, у чуқур бир мотамга чўмган.

К а п у л е т т и

Граф Парис, мен қатъян кафил бўлайки,
Қизим сизни севажакдир, ишончим комил.
Шубҳа йўқки у итоат қилгуси мёнга.
Хотин, ҳали у ётмасдан олдига боринг,
Ва Париснинг севгисини билдиринг унга;
Унга айтинг, шу келгуси чоршанба куни...
Ҳа, айтгандай, бугун қайси кун?

П а р и с

Душанбадир.

К а п у л е т т и

Душанбами? А, бўлмаса чоршанба барвақт;
Пайшанбага қолдирамиз... Айтинг, пайшанба —
У муҳтарам граф билан никоҳга борур.
Бу шошилиш сизга қандай? Улгурасизми?
Дабдабанинг ҳожати йўқ. Бир неча ёр-дўст,—
Чунки Тибалт ўлдирилган яқиндагина.
Агар базму зиёфатга ўгирсак тўйни,
Қариндошга аза тутмас, дейдилар бизни.

Беш-олтита ёр-огайни чақирсак, бўлди.
Нима дейсиз? Пайшанба кун сизга маъқулми?

Парис

Эртагаёқ бўлса эди пайшанба, дейман.

Капулетти

Боринг, хайр! Пайшанба кун тўйни қиламиз.—
Жульеттангиз ухламасдан олдига бориб,
Тўй кунига тайёр қилинг ҳозироқ хотин!
Хайр, граф! Ҳой одамлар, дарҳол хонамга
Чироғ олиб чиқиб қўйинг! Вақт жуда кечдир.
Худо ҳақи саҳар пайти яқинлаб қолди.
Хайрли кеч!

Кетадилар

БЕШИНЧИ САҲНА

Капулеттининг боғи.
Юқорида, дераза олдида Ромео ҳам Жульетта.

Жульетта

Қетмоқчисан? Ахир, ҳали саҳарга узоқ;
У сайраган булбул эди, тўргай әмас-ди,

Анорзорда у ҳар кеча чаҳ-чаҳ қилади;
Севикли ёр, менга ишон, у булбул эди.

Ромео

У, саҳарга жарчи бўлган тўргайнинг ўзи.
Булбул әмас. Севикли ёр, ана, қараб кўр:
Булатларнинг ортидаги баҳил саҳарни.
Сўнмоқдадир кечаларнинг шамчироғлари,
Қувноқ кундуз пусиб турар тоғ туманида.
Қетмоқлигим менга ҳаёт; қолишим — ўлим!

Жульетта

У саҳарининг нури эмас, сўзимга ишон —
У қўёшдан ажраб кетган учар бир юлдуз,
У, бу кеча сенга йўлда машъал бўлғуси,
Мантуянинг йўлларини ёритгусидир.
Сенга кетиш даркор эмас, оҳ, яна қолгин!

Ромео

Мени ушлаб ўлдирсинглар, розиман, дилбар!
Модомики сен хоҳлайсан, мен бунга хурсанд.
Уфқда тонг нури эмас, дейман, истасанг,—
Балки ойнинг ерга тушган сўлғун ёғдуси.
Бошимизнинг устидаги осмон гумбазин—
Чок-чок қилиб сайрагувчи тўргай эмас, йўқ!
Кетишиликдан қолмоқликини кўпроқ хоҳлайман!
Кел, э, ажал, салом! Шуни хоҳлар Жульетта!
Саҳар узоқ, шундаймасми, сўйла, қувончим!

Жульетта

Йўқ, йўқ! Саҳар! Саҳар экан! Тезроқ кет, жоним!
Шундай совуқ сайраётган тўргайнинг ўзи!
Унинг чаҳ-чаҳ қилишини нафис дейдилар,
Тўғри эмас! У-ку бизни ажратадиган...
Алмаштирган бўлса бақа бирла кўзларин
Кошки эди товушин ҳам айрибош қилса!¹
У айирди қучоқлашган икки маъшуқни;
У тунни ҳам сенга ўхшаб ҳуркитиб қўйди.
Оҳ, майли, кет! Равшан кундуз ёримоқдадир.

¹ Халқ афсоналарига кўра, тўргай ўзининг чиройли кўзларини бақанинг кичик ва хира кўзларига алмаштирган эмиш. Жульетта тўргайнинг эмас, балки бақанинг товушини эшитмоқни хоҳлайди, яъни ҳозир саҳар эмас, ҳали оқшом бўлишини истайди.

Ромео

Саҳар ёриб — қораймоқда ғамнинг сояси.

Энага хонага кириб келади.

Энага

Хоним!

Жулъетта

Нима, энага?

Энага

Ҳозир бунга келмоқчидир сизнинг ойингиз.

Тонг ҳам отди. Бохабар бўл! Фурсат кечмасин!

Жулъетта

Деразадан кел, эй кундуз, сен уч, эй ҳаёт!

Ромео

Фақат битта бўсагина — сўнгра кетаман.

(Деразадан тушади.)

Жулъетта

Менинг эгам! Ерим, эрим, меҳрим-маҳбубим!

Ҳар соатда сендан хабар олмоқ истайман;

Ҳар лаҳзада қанча-қанча бесаноқ кун бор,

Шу ҳисобдаи Ромеомни яна кўргунча —

Жуда қариб қоларман-а!

Ромео

Алвидо энди!

Ҳар дам фурсат топилганда, эй нуридийдам,
Юборурман сенга севгим саломларини.

Жульетта

Үйлайсанми, биз яна ҳам кўришармиз деб?

Ромео

Шакким йўқдир. Яқин кунда сен билан боҳам
Ширин-ширин сўйлашармиз бу аlamлардан.

Жульетта

Менинг қалбим шум хабарга берилган фолбин.
Сени пастда кўрганимда менга туюлар —
Гўё гўрнинг қаърида бир мурда ётибди...
Менми яхши кўролмайман, ёки сен сўлғун?

Ромео

Назаримда муҳаббатнинг чеҳраси сўлғун,
Оҳ, алвидо! Дардларга ем бўлди бизнинг хун...

Кетади.

Жульетта

Толе, сени кўп бевафо дейди одамлар,
Вафода донг тараттанга нима қиласан?
Майли бўлиб сен бевафо, уни кўп тутмай —
Қайтар менга?

Капулетти хоним

(саҳна орқасидан)

Қизим, энди турдингизми сиз?

Жульетта

Бу ким экан? Бу онамми, менга гапирган?
Ҳали ётган эмасмикан? Ё барвақт турган?
У не учун шу маҳалда ёнимга кирди?

Капулетти хоним кириб келади.

Капулетти хоним

Ҳа, Жульетта, ҳолинг қалай?

Жульетта

Тобим йўқ, она.

Капулетти хоним

Қариндошнинг ўлимига йиглайсанми?
Унинг қабрин кўз ёши-ла ювмоқчимисан?
Ювсанг ҳамки уни асло тирилтолмайсан.
Бўлди, бас қил! Хафа бўлмоқ — севги белгиси;
Аммо бу ҳам ҳаддан ошса девоналиқдур.

Жульетта

Қўйинг, йиглай шу ҳасратли жудоликка мен.

Капулетти хоним

Йиглайвериб, дўстни эмас, жудолигини —
Ҳис қиласан.

Жульетта

Мусибатни ҳис қила олсам,
Дўст ҳақида йигламаслик, наҳотки, мумкин!

Капулетти хоним

Оғанг учун йигламайсан, балки оғангни —
Ўлдирган у аблай тирик юргани учун...

Жульетта

Ким у аблай?

Капулетти хоним

Уша аблай, ўша Ромео.

Жульетта

(Ўзи-Ўзига)

Ромео-ю, аблай сўзи! Ҳеч келишмайди. (Қаттиқ.)
Кечир худо! Мен дилимдан уни кечирдим,
Гарчи ҳеч ким шунча дилхун қилмаган мени.

Капулетти хоним

Чунки ҳали ўша аблаҳ қотил тирик-да!

Жульетта

Ҳамда жуда олисдадир менинг дастимдан.
Мен ҳам зотан олмоқчиман акам қасосин!

Капулетти хоним

Хотиржам бўл, биз у учун қасос олурмиз,
Мантуяда турмоқчидир дарбадар сургун,
У шаҳарда одамларга қутқу қиласман,
Унга шундай бир ичкулик ичирсинларки —
Тез фурсатда етиб борсин Тибалт олдига.
Ушанда сен шод бўларсан, шундайми, қизим?

Жульетта

Йўқ, ҳеч қачон шод бўлмасман, токи мен уни,
Токи уни кўрмагунча... ўлик ҳолида...¹
Бечора дил ташвишлардан толиқиб қолди.
Унга заҳар оборувчи киши топсангиз —
Мен шундай бир заҳар-заққум ясаб берайки —
Уни ичгач, маломатсиз ётсин Ромео².
Оҳ, бу қандай изтиробки, номин эшитиб
Ундан узоқ ерда турсанг ва айтольмасанг
Сен Тибалтга бўлган меҳру муҳаббатингни
У кишининг қотилига!..

¹ Жульетта сирини очиб беришга сал қолади. «Токи уни кўрмагунча шод бўлмасман», демоқчи бўлади-ю, бирдан эси-га келиб, ўз фикрини ынқобламоқчи бўлади ва «ўлик ҳолида» деган сўзни қўшади. Аммо буудай кейинги журмлани шундай келтирадики, бу сўзни ўз фикрида кейинги ибораларга боғлаш мумкин бўлсин.

² Бу ерда ва пастроқда Жульеттанинг гаплари икки маъноли қилиб айтилади;

Капулетти хоним

Заҳарни топ, мен элтувчи одам топарман.—
Энди сени воқиф қилай бир хушхабардан.

Жульетта

Хурсанд бўлиш ёмон әмас шу мотам ичра.
Қанақа бир хушхабарни сўзламоқчисиз?

Капулетти хоним

Сенинг отанг шунча ғамхўр, азиз қизгинам:
Ғамларингни йўқотай деб қувончли кунни,
У дафъатан тайинлади. Кутмаганимидинг?
Мен ўзим ҳам кутмагандим, ростини айтсам.

Жульетта

Қанақа кун, тезроқ айтинг, менга онажон.

Капулетти хоним

Пайшанба кун, эрта билан, меҳрибон қизим—
Олижаноб, аслзода, гўзал, навжувон,
Граф Парис, Пётрнинг бутхонасида—
Сени бахтли қилғусидир, хотини атаб...

Жульетта

Мен авлиё Пётрга-ю, ҳам черковига
Қасам ичиб айтаманки, шундай бўлмайди!
Нега лозим бу шошилиш? Ҳеч унашмасдан
Мен куёвга никоҳланай! Қандай гап ўзи?
Айтинг менинг отамга ҳам, у жанобга ҳам:
Эрга тегиш ниятим йўқ, онт ичаманки,
Мен Парисга тегиб хотин бўлгандан кўра—
У нафратли Ромеога текканим маъқул!—

Ана холос!

Капулетти хоним

Отангизга ўзингиз айтинг:
Бу гап унга қанча маъқул, айтиб кўринг-чи.

Капулетти ва энага кирадилар,

Капулетти

Қуёш ботса ерга қўнар шудринг-шабнамлар.
Аммо менинг жияйнимнинг ботган умрини
Ёмрир-ёғин ювайти. —
Ҳой қиз, нега кўз ёшиングниң жўмрагин очдинг?
Бу сел нима? Сенинг кичик шу вужудингда
Қайиқ ҳам бор, дengiz ҳам бор, шамоллар ҳам бор.
Денгиз рангли кўзларингда сув қалқар, тушар.
Танинг эса шўр тўлқинда чайқалган қайиқ;
Кўз ёшиングни тўсиб турган оҳларинг — шамол.
Шундай бўлгач, ногаҳоний бир тинчлик даркор.
Иўқса танинг ҳалок бўлур тўфонлар ичра.

(Капулетти хонимга.)

Жульеттага айтдингизми қароримиэни?

Капулетти хоним

Айтдим, лекин у норози, ташаккур айтди.
Бу тентакни тобут билан никоҳлаш маъқул!

Капулетти

Тушунмайман, тушунмайман гапингга, хотин!
Бу қарорга норизоми? Хоҳламайдими?
Бу нолойиқ тентакка биз шунча иззатли
Бир куёвни топибмиз-у, у қувонмайди?

Жульетта

Қувонмайман, аммо сизга раҳматлар дейман:
Севмаганим манфур бўлса қандай қувонай?
Аммо сизга раҳмат дейман, бу совға учун!

Қапулетти

Бу қанақа баҳсбозлиқ! Нима гап ўзи?
 «Қувонаман!», «Раҳмат дейман!»; «Раҳмат
 демайман!»
 «Қувонмайман!», қизим, фундай гапларни сен қўй!
 Раҳмат дейсан, демайсанми, қувонасанми?
 Бари бекор, пайшанба кун зоти — олингиз,
 Тайёр бўлинг граф билан никоҳ расмига,—
 Е бўлмаса бутхонага эўрлаб ҳайдайман.
 Йўқол, эзма! Йўқолиб кет, сариқ заифа!
 Йўқол, лақма!

Қапулетти хоним

Тфу, ақлдан оздингиз сиз ҳам!

Жульетта

Тиз чўкаман, ялинаман, меҳрибон ота,
 Бир сўзгина айтишимга ижозат беринг!

Қапулетти

Яшишамагур, ярамас қиз, шаллақи, овсар!
 Гап фақат бир: ё пайшанба черков борасан,
 Еки менинг кўзларимга кўринма асло!
 Жавоб берма, гап қайтарма! Тийгин тилингни!

(*Қапулетти хонимга*)

Менинг қўлим қичияпти.
 Қизни қаранг-а!
 Тангри бизга фақат битта фарзанд берди деб —
 Хафа бўлиб ғам ер эдик; энди қарасам —
 Шу бир фарзанд ўзи бизга ортиқча экан.
 Шундай қизнинг бўлишига минг лаънат, лаънат!
 Гўрга кетсин!

Энага

Тангри ўзи сақлагай уни!
Тақсир, қизни шундай сўкиш сизга уят-ку!

Капулетти

Ҳа, донишманд, нега уят! Овозинг ўчир,
Гийбатларни тўқишига бор кампирларингга!

Энага

Ҳеч ёмон гап айтмадим-ку!

Капулетти

Бўлди, бас, етар!

Энага

Гапириб ҳам бўлмайдими?

Капулетти

Ўчир нафасинг!

Сиз ароқдан ҳўплаб сотинг сафсатангизни.
Бу ерда жим туриңг! Аҳмоқ!

Капулетти хоним

Ғазабга мишимаг!

Іштимонент ишъ... **Капулетти**

Мен ақлдан (озажакман) браб, ё худо!
Кеча-кундуз, иш маҳали ё ўйин чоғи,
Елғиз бўлсан ёки биронижжамишларни ўтиш
Қайғум фақат: қизни эрга берниш-қайғувчинен!
Узеда эндрекуёзлағриғигаси, тобеҳодадан ё нотинт
Ёш, бадавлаға жарбиялдиша ёса тиззифин ўз беҳодадан
Гўзалидосса обўшадигани ишончидан ишадиғ—анд үШ
!Буз-лан! Тенини, ширқиллайди ўз юненши жўйини! Ш
Ойимтилла бир қўғирчоқ, унга тағимлангтиғ!

Гапни қаранг: «Йўғ-е», «ул, бул», «яхши
кўрмайман!»

«Ҳали ёшман», «жуда ёшман», «мени кечиринг!..»
Кечираман сени қачон куёвга тегсанг.

Бўлмаса-чи, сенга нон йўқ, ўзинг топа бер,
Кўзимга ҳам кўринмайсан. Ҳазил эмас. Ўйла!
Пайшанба ҳам келиб қолди. Ўзинг ўйлагин:
Сен меники — ўз ошнамга бераман сени;
Гар йўқ десанг — дорга осил, кўчада ўлгин,
Тиланиб юр, худо ҳақи, менга сен ётсан,

Менинг молу давлатимнинг сенга дахли йўқ.
Ўйла, ишон — мен бекорга қасам ичмайман!

Кетади.

Жульетта

Оҳ, наҳотки тангрининг ҳеч йўқдир инсофи?
У-ку, менинг мотамимни яхши билади.—
Оҳ, онажон, сизлар мени ҳайдамангизлар!
Шу никоҳни чўзинг бир ой ё бир ҳафтага;
Йўқ, десангиз менга битта тобут тайёрланг —
Тибалт ётган гўристоннинг дахмаси ичра.

Капулетти хоним

Қўй, галирма, сўзларингга жавоб бермайман;
Билганингни қила бергин — гапларим тамом.

Кетади.

Жульетта

Қандай қилиб мен бу ишнинг олдини олай?
Эҳ худойим! Эрим ерда, қасамим кўкда.
Агар эрим ерни ташлаб кўкка бормаса,
Агар кўкдан қайтармаса қасамни ерга,
Қасам қандай қилиб ерга қайта олади?
Оҳ, дояжон, мадад бергил! Юпантир мени!

Фалак нега ожизани шуинча қийнайди?
Нима дейсан? Ниҳотки сен юпатолмайсан?

Энага

Юпатаман. Сургун бўлиб кетди Ромео;
Худо ҳақи, қайтиб сизни талаб қилолмас;
Қайтгаида ҳам яширинча кела олади.
Шунинг учун ўйлашимча, бошқа чора йўқ!
Шу графга тегмакликка ризо билдиринг.
Оҳ, у жуда қоматлари келишган жаноб!
Унга агар таққосласам Ромео — латта.
Қўзи бургут кўзларидай ўйноқи, яшил.
Улай агар, баҳт келтирас иккинчи никоҳ,
Иккинчи эр биринчидан афзал бўлғуси.
Энди афзал бўлмаса ҳам, нима қилайик,—
Биринчи эр ўлган ёки ўлган ҳисоби;
Ромео соғ бўлса ҳамки, сизга нафи йўқ.

Жульетта

Шу гапларинг чин қалбданми?

Энага

Улай агар, ҳамма сўзим дилу жонимдан!

Жульетта

Омин!

Энага

Нима?

Жульетта

Ҳа, сен мени тоза юпатдинг.
Бориб айтки, мен роҳибнинг олдига кетдим:
Мен отамга айтган дафал сўзларим учун
Тавба қилиб, худованддан афв сўрайман.

Энага

Худо ҳақи, айтажакман; бу иш ақлдан!

Кетади.

Жульетта

Хой лаънати, айёр кампир, зиёнкор иблис!
 Мен эримга ичган онтни бузавер, дейиш,
 Юз мартаба Ромеони мақтаган тил-ла —
 Энди уни ёмонламоқ — мудҳиш бир гуноҳ!
 Йўқолиб кет, насиҳатгўй, менга сен ётсан.
 Меқ роҳибга бора қолай, топмаса илож.—
 Бу дунёни ташлаб кетай мангу, ноилож.

Кетади.

IV ПАРДА

БИРИНЧИ САҲНА

Лаврентий ва **Парис** кириб келадилар.

Лаврентий

Пайшанбами? Тақсир, муҳлат жуда қисқа-ку!

Парис

Бу — қайнатам Капулетти хоҳиши экан!
У шунақа шошиб турса мен «йўқ» дейманми?

Лаврентий

Келинчакнинг раъйини сиз билмас экансиз,—
Бу — номаъқул! Бу ҳол менга сира ёқмайди.

Парис

У Тибальтга аза тутиб доим йиглайди,
Ишқ ҳақида мен у билан кам сўзлашганман:
Ишқ тангриси жилмаймади йиги уйида.
Қиз отаси ўйлайдики, агар тўхтовсиз —
Қиз берилиб турса ғамга бу хатарлидир;
Шунинг учун шошилтириб юрибди тўйни;
Ният шуки — кўз ёшининг сели тўхтасин,
Кўз ёшларки оқаётир ёлғизлик ичра;
Кўз ёшларин тўхтатади улфат, жамият.
Шошилишнинг важҳи энди сизга аниқми?

¹ Парис ҳалитдан ўзини Капулеттига қўёв деб ҳисоблайди.

Лаврентий

(ўзича)

Ҳа, агарда кечикишнинг важҳин билмасам!
(Қаттиқ.)

Қаранг: ана, биз томонга келар бека қиз!—

Жульетта кириб келади.

Парис

Сизни кўрмоқ менга баҳтдир, менинг рафиқам!

Жульетта

Қачон сизга хотин бўлсам, шундай дегайсиз.

Парис

Севикли ёр, пайшанбада шундай бўлади.

Жульетта

Пешонага ёзилгани бўлади.

Лаврентий

Рост гап.

Парис

Сиз бу ерга тавба учун келгансиз, дейман?

Жульетта

Тавба қилиб, сўнгра сизга иқрор бўламан.

Парис

Пирингизга айтинг, мени севганингизни.

Жульетта

Балки, уни севганимни сизга айтарман.

П а р и с

Унга тагин айтинг: мени севганингизни!

Ж у л ѿ е т т а

Сизга бўлган ҳисларимни ростакам айтсан, Юзингизга эмас, сиртдан айтганим маъқул.

П а р и с

Кўз ёшлари жамолингни сўлдирап, эсиз!

Ж у л ѿ е т т а

Кўз ёшлари ҳеч нимамни сўлдирган эмас, Ифламасдан илгариёқ шундай хунук-дим.

П а р и с

Ифлашингдан кўра шундай ўйлашинг балки, Жамолингга кўпроқ зиён етказар, афсус.

Ж у л ѿ е т т а

Айтганларим туҳмат эмас, асл ҳақиқат, Мен ўз чехрам тўғрисида сўзладим сизга.

П а р и с

У — меники, сен бекорга бўхтон қиласан!

Ж у л ѿ е т т а

Шояд бу рост, у айтгандай меники эмас, Қани, энди сиз бўшмисиз, авлиё пирим? Ёки намозшом пайтида келайин тагин?

Л а в р е н т и й

Ўйчан қизим, мен тайёрман хизматингизга!

(Парисга.)

Кечирасиз, бизнинг хилват суҳбатимиз бор.

Парис

Мен тақвони ҳеч бузмайман, худо сақласин!
Пайшанба кун уйғотаман сизни, Жульетта.
Энди хайр, сиз покиза бўсамни олинг!

Кетади.

Жульєтта

Эшикни ёп, энди йиғла мен билан бирга:
На умид бор, на мадад бор ва на бир чора!

Лаврентий

Хабардорман, о, Жульетта, фалокатингдан;
Менинг ақлим бу гапларни қамрашдан ожиз,
Эшитдимки, пайшанбада тўйинг бўлғуси;
Ҳамда уни кечиктириш ҳеч мумкин эмас.

Жульєтта

Эшитганинг тўғрисида гапирмай турчи;
Айтгин, қандай қутулайин тўй балосидан.
Бу мушкулдан ожиз эса сенинг ҳикматинг,
Сен ҳикматли чора дегил — шу қароримни,—
Десанг бўлди; ана, пичоқ менга нажоткор.
Сен қўлларни бирлаштиридинг, тангри — дилларни.
Севганимга теккан қўлим, башарти, яна
Бошқасига никоҳ учун қўл қўяр бўлса,
Ёки менинг содиқ қалбим хиёнат қилса,
Шу пичогим ҳар икковин этгуси ҳалок.
Кекса умринг, сенинг узоқ билган-кўрганинг,
Менга ҳозир бера қолсни доно маслаҳат!..
Йўқса дардим билан менинг қозим — шу пичоқ.
На кексалик, на ҳунарлар қилолмаганинг —
Менга ижро қилгусидир шу қонли пичоқ,—
Бу балодан мени фақат қутқазур пичоқ!
Қисқа гапир — менинг битта ниятим: ўлим!
Фақат табиб сўзларини тинглайди кўнглим.

Лаврентий

Тингла, қизим, пайқаб олдим умид шарпасин,
 Бизга хатар бўлиб қолган тўй ташвишидан —
 Яна ўзга бир ташвишни кечирмоқ керак.
 Сен графга тегмайин деб, тўй бўлмасин деб —
 Ҳатто ўзинг — ўзгинангни ўлдирмоққа шай,—
 Демак сохта ўлимга ҳам рози бўлгайсан —
 Токи сенга ўлим қадар манфур туйилган —
 Шундай разил никоҳдан ҳам қутулажаксан.
 Сен унасанг, сенга сирли дори бераман.

Жульетта

Оҳ, Парисга бир дам хотин бўлишдан кўра
 У минора тепасидан сакрашни буюр.
 Ёки мени тунда қама ўликхонага —
 У хонада қирсилдайди ўлик суяги,
 У хонада тўла сарғиш бош косалари;
 Ёки менга амр этгин, қабрга кирай,
 Ўлик билан бирга ётая кафан остида.
 Бу сўзлардан қалтирайман, аммо бехатар,
 Ўйлаб турмай қилас әдим бунинг ҳаммасин,
 Токи, тоза хотин бўлай эрим олдида.

Лаврентий

Бўлмаса, кел — сўзимни уқ; ҳозир уйга бор;
 Қувноқ кўрин, тўйга билдири розилигингни,
 Эртага-ку чоршанба кун. Ёлғиз ўзинг ёт,
 Энагангни бўлак уйга чиқариб юбор;
 Тўшагингга кирганингда бу шишани ол,
 Дорусини шимир, битта қатра қолдирмай.
 Кўп ўтмайин аллақандай лаиж, ухлатувчан —
 Бир совуқлик ёйлади томирларингга.
 Ҳатто тўхтар юрагингнинг тепувлари ҳам,
 Тирикликтан дарак бермас нафас, иссиқлик,
 Гуича лабинг ва юзларинг гулдай сўлади.

Киприкларинг жисплашади ўликникидай:
 Гўё ўчиб кетганидай ҳаётнинг нури,
 Ўша чоғда вужудинг ҳам қотиб қолади —
 Уликларнинг жасадидай карахт ва совуқ,—
 Шу даҳшатли сохта ўлим қиёфасида —
 Ухламоқнинг муҳлатидир қирқ икки соат,
 Кўз очишинг шод уйқудан тургандай бўлур.
 Аммо қачон, уйғотгали сенинг күёвинг
 Келганида ўлик каби ётарсан бежон.
 Жасадингни ясантириб эл одатича
 Сени очиқ бир тобутда олиб борарлар,
 Капулетти уруғидан ҳамма марҳумлар
 Етган маълум сағанага қўярлар сени.—
 Келганида сенинг учун уйғониш пайти.—
 Ромео ҳам хатни олиб етиб келади.
 Икков бирга кутажакмиз уйғонишингни;
 Ўша кечা Мантуяга элтар у сени,
 Қутуларсан, шу йўсинда шармандаликтан;
 Башартики, на енгилтак ҳавою ҳавас,
 На аёллар қўрқоқлиги енгмаса сени.

Жульетта

Бер, бер менга! Қўрқоқликдан оғиз ҳам очма!

Лаврентий

Ма, олиб бор, баҳтиёр бўл, иродали бўл,
 Мен ҳам дарҳол Ромеога хабар қилгали
 Бир роҳибни Мантуяга жўнатгум ҳозир.

Жульетта

Менга куч бер, эҳ муҳаббат: бунда иажот бор.—
 Яхши қол, эй менинг отам! (*Кетадилар*)

ИККИНЧИ САҲНА

Капулетти уйда.

Капулетти, унинг хотини, энага ва икки хизматкор кириб келадилар.

Капулетти

Бу рўйхатда ёзилганинг барини айтгин.

Биринчи хизматкор кетади.

(2-хизматкорга)

Йигирмата эпчил ошпаз ёллаб келасан.

2-хизматкор

Мен сизга тақсир, ёмон ошиазларни олиб
келмайман,
Даставвал қарайман: улар бармоқларини
ялайдиларми, йўқми.

Капулетти

Бу билан нима демоқчи бўласан?

2-хизматкор

Худо ҳақи тақсир, ёмон ошпаз ҳеч қачон бармоқларини яламайди. Шу сабабли мен ҳам бармоғини яла-маётганларни ёллайман.

Капулетти

Бор, бор.

Иккинчи хизматкор кетади.

Қўрқаманки, муҳлатида улгуролмасмиз —
Ҳа, айтгандай, жўнадими қизим роҳибга!

Энага

Ҳа, тақсир!

Қапулетти

Буниси соз, қизга яхши ўғиң берар у.
Қақилдоқ қиз, ўлгудай сур, ўжар бир шайтон!

Энага

Ана, хурсанд келаёттир, гуноҳдан ариб.

Жульетта кириб келади.

Қапулетти

Ҳай, тажанг қиз? Қайда кездинг, сарсон, овора?

Жульетта

Шундай жойга бордимки мен, у ерда мени ---
Қилганимга пушаймон ва тавба қилдириди.
Авлиё пир буюрдики, тиз чўкиб сиздан
Гуноҳимга уэр сўрай ҳамда марҳамат.
Ялинаман, афу қилинг! Бундан бу ёқقا —
Итоаткор қизингизман.

Қапулетти

Тез графга киши бориб хабардор қилсин:
Эртага биз тугуничани тугиб қўямиз.

Жульетта

Бутхонада кўрган эдим ёш графни мен;
Босиб ўтмай камтаринлик чегарасидан,
Унга одат кўтаргудай илтифот қилдим.

Қапулетти

Майли энди. Рози бўлдим, тур, бор, кечирдим.
Аллақачон шундай бўлсанг — бўлмас эдими?
Мен графни кўрмоқчиман. Чақириб келинг —
Худо ҳақи, бизнинг роҳиб авлиё ҳам пир,
Шаҳаримиз унга талай-талай миннатдор.

Жульетта

Бирга юргин, энасажон, менинг хонамга:
 Эрта учун менга лозим зебу зийнатни
 Бирга танлаб, кўриб чиқиб, тахлаб қўяйлик.

Капулетти хоним

Ҳали анча муҳлат бор-ку пайшанбагача!

Капулетти

Бор, энага. Биз эртага черков борамиз.

Жульетта ва энага чиқадилар.

Капулетти хоним

Ҳамма ишни тугал қилиб улгуролмасмиз,
 Тун ҳам кирди.

Капулетти

Сен гапирма! Мен уддалайман!
 Ҳамма ишни мен боплайман, воллоҳи, хотин.
 Боргин ҳозир Жульеттага, либослар танла!
 Мени қўйгин; мен бу кёча мижжа қоқмайман;
 Энди бу гал, уй бекаси ролини ўйнай.—
 Ҳой, навкарлар! Кетишдимн? Хўп, ўзим борай,—
 Эртага: «Сен ҳозир бўл!» деб графга айтай.

Қўнглим анча тинди, шукур, маломат кетди;
 Қайсар қизча тажанглигин қўйди охири!

Кетадилар.

УЧИНЧИ САҲНА

Жульеттанинг хонаси.

Жульетта ҳам энага кириб келадилар.

Жульетта

Ҳа, бу кўйлак—зебо либос.—Энди, энага,
 Мени бугун ёлғиз қолдир, илтимосим шу!

Худованддан шафқат тилаб, шафоат тилаб,
Кўп қилишим керак бугун дуо ва ниёз,
Биласан-ку, андеша ва гуноҳим талай.

Капулетти хоним кириб келади.

Капулетти хоним

Сизлар бунда бандмисизлар! Ердам керакми?

Жульетта

Иўқ, онажон; биз эртага тўйнинг базмига —
Керак бўлган буюмларни саралаб олдик.
Энди мени ёлғиз қўйишг, илтимосим шу.
Дояни ҳам бирга олиб кетсангиз маъқул:
Кутилмаган ишлар чиқиб қолиши мумкин

Капулетти хоним

Хўп, бўлмаса, ҳайрли тун, ором ол, қизим!

Капулетти хоним ва энага чиқиб кетадилар

Жульетта

Видолашдик! Учрашувни худо билади.
Томиримни бурамоқда совуқ бир даҳшат.
У ҳаётнинг иссиғини музлатаяпти.—
Чақирайин уларни мен: юпантирсинглар.—
Энагажон!— Иўқ, нимага! Мен ўзим якка
Бу саҳнада ачинарли ролимни ўйнай.
Кел, э шиша! Ухлатмаса сендаги дору,
Мабодо, мен мажбур бўлсам эрга чиқишига?!
Иўқ, сира йўқ! Бу қўймайди, мана буниси!

(Пичоқни чиқариб қўяди.)

Балки мени ўлдиргани роҳиб макр ила
Бу шишада заҳар берган. Иўқ, шундай бўлса —
Шу никоҳнинг уволлари унинг бўйнига:
Ромеога мени никоҳ қилган ўзи-ку...
Хавотирман, аммо шундай бўлмаса керак:

У виждонли авлиёдур элнинг кўзида —
 Лекин барвақт уйғонсам-у, аммо ўша чоғ —
 Менга келиб етолмаса азиз Ромео —
 Уз вақтида этолмаса мени.— Бу даҳшат!
 Ўша сассиқ сағанада бўғилиб қолсам,
 Улиб кетсам келмасданоқ азиз Ромеом!
 Мабодо, мен тирик қолсам, ўзга хатар бор;
 Мен ўйлайман, ўлим ҳамда қаро зулматни,
 Мен ўйлайман, сағананинг ваҳимасини,
 У юз йиллаб оиласмага гўристон бўлган,
 Қўйилгандир боболарнинг суюги унда...
 Қечагина унга меҳмон келгандир Тибалът,
 Қонли жасад чиримоқда оқ кафан ичра,—
 Дерлар тунда, ўша ерда, маълум соатда —
 Пайдо бўлиб юрар экан мудҳиш арвоҳлар...—
 Агарда мен нолалардан, сассиқ ҳидлардан,
 Одамзодни жинни қилган ваҳималардан
 Уйғонсаму: ўша онда тентираб кетсам!
 Боболарнинг суюгини қўғирчиқ қилсам,
 Ечиб олсам у сўйилган Тибалът кафанин,
 Е боболар суюгини ҳассадай қўллаб
 Жинниларча янчидан қўйсан бадбахт калламни?!
 Ҳозир менга кўринмоқда Тибалътнинг руҳи,
 У қассос деб Ромеони излаб юрибди.
 Тибалът, тўхта! Ромео бок, ҳозир бораман,
 Сенинг учун ичяпман!

(Парда орқасидаги ётоққа ииқилади.)

ТҮРТИНЧИ САҲНА

Қапулетти уйда бир зал.

Қапулетти хоним ва энага кириб келадилар.

Қапулетти хоним

Қалитни ол, очиб келтир шириналик — ҳалво.

Энага

Ошхонага керак эмиш хурмо ҳам беҳи.

Капулетти кириб келади.

Капулетти

Тезроқ бўлинг! Қичқирищди хўрозлар тағин!
Занг урилди: соатлар ҳам уч бўлиб қолди.
Анжелика¹, санбусани ўзинг қараб тур.
Хасисланма!

Энага

Эҳ, қатишманг ишимизга сиз!
Бориб ётинг! Бутун туни ухламай чиқиб
Тобсизланиш, касалланиш ҳеч ажаб эмас.

Капулетти

Ҳечқиси йўқ! Кўп арзимас сабаблар билан
Ухламаган пайтлар бўлган, касал бўлмадим.

Капулетти хоним

Шундай вақтлар ҳам бор эди: чиқар эдингиз —
Кечалари ов қилгани. Энди қўймайман!

Капулетти хоним ва энага кетадилар.

Капулетти

Ана, ана, қизғанишни кўрасизларми?!

Уч-тўртта хизматкор кабоб сихи, ўтин ва
саватларни олиб кирадилар.

Ҳой йигитча, сен нималар олиб келтирдинг?

1-хизматкор

Алланима, ошпаз учун, ўзим билмайман.

¹ Анжелика — Капулеттининг хотиними ёки доями экани номаълум.

Капулетти

Дарров, дарров! (1-хизматкор кетади.)

Сен-чи, қуруқ ўтин олиб кел!

Петрдан сўраб билгин, у жойин айтар.

2-хизматкор

Каллам бор-ку, ўзгинам ҳам топиб оларман;

Ўтин сўраб Пётрга ташвиш бермайман.

Капулетти

Майли, майли, шўх йигитсан, кўриб турибман!

Калланг ўзи ўтин бўлгай! (2-хизматкор кетади.)

Тонг отиб қолди.

Куёв ҳозир келиб қолар машшоқлар билан,—

Ўзи айтди. Ҳа, чамаси келиб ҳам қолди!

Саҳна орқасидан музыка.

Ҳой энага! Хотин! Қани, ҳой-ҳой одамлар!

Энага кириб келади.

Жульеттани бориб уйғот, ясантилинглар!

Мен Парис-ла гаплашайин ҳангамалашиб.

Дарров, дарров, шошилингиз, куёв келмоқда!

Бўлинг дейман, дарҳол бўлинг! (Кетадилар.)

БЕШИНЧИ САҲНА

Жульеттанинг хонаси.

Энага кириб келади.

Энага

Бека хоним! Жульетта, ҳу! Шунча қаттиқ, а!

Қўзичоғим, хонимгинам! Ҳой уйқучи қиз!

Қани, жоним, ҳой жонгинам, туринг, келинчак!

Бир оғиз ҳам гапирмайди? Тугал бир ҳафта —

Ўйқусини ҳозирданоқ олмоқчими бу?

Қафилманки, Парис энди уқдириб қўяр —

Шу бугундан — кечалари камроқ ухланг, деб,—
Худо ҳақи шунича қаттиқ ухлабдиларки!..
Үйғотай-чи... Туриш керак... Бекам, хоним қиз!
Күёвпоча келиб күрса ҳали түшакда
Тағин сизни чўчитмасин, сескантирмасин!..

(Парданни очади.)

Кийим-бошин кийиб олиб қайта ухлабди?..
Туринг, туринг, оҳ хоним қиз, уйғонинг, туринг!
Вой-дод! Вой-дод! Мадад, имдод, Жульєтта ўлган!
Ҳайҳот, нега мен туғилдим фоний дунёда!
Менга ароқ, оқдоримдан!.. Афандим!! Хоним!..

Капулетти хоним келади.

Капулетти хоним

Нега шунича шовқин-сурон?

Энага

Фалокат, мотам!

Капулетти хоним

Нима бўлти?

Энага

Қандай даҳшат! Үзингиз қаранг!

Капулетти хоним

Э воҳ, э воҳ! Болагинам, жону жигарим!
Уйғон, қара! Йўқ, бўлмаса мен ҳам ўламан!

(Энагага.)

Дод-вой қилгин! Мадад дегин!

Капулетти кириб келади.

Капулетти

Бу уят-ку, куёв келди, Жульєтта қани?

Энага

Ҳайҳот, ўлди, вафот қилди!

Қапулетти хоним

Шўрлик бахтим! Мусибат кун! У ўлди, ўлди!

Қапулетти

Қани, кўрай! Оҳ, музлабди! Бўлибди тамом!

Қони совиб қотиб қолган аъзою тани;

Шу лаблардан аллақачон жон учиб кетган,

Бевақт аёз қамраб олган нозик чечакдай,—

Қизимни ҳам олиб кетди ноинсоф ажал.

Энага

Оҳ, қора кун!

Қапулетти хоним

Оҳ, мусибат, мотамли қазо!

Қапулетти

Уни олиб менга аза келтирган ажал,

Тилимни ҳам боғлаб қўйди — гапиролмайман.

Лаврентий ва Парис музикачилар билан кириб
келади.

Лаврентий

Бутхонага бориш учун келин тайёрми?

Қапулетти

У тайёру ҳеч қайтмаслик шарти-ла, лекин,—

Менинг ўғлим, худди тўйинг арафасида

Ажал сенинг хотинингга ҳамёстиқ бўлди.

Мана бунда, у беҳаё ўлим топтаган

Чечак бунда! Энди менинг куёвим ажал.

Қизим эри, ворисим ҳам ажалдир, ажал.

Мен ҳам бешак ўлажакман, ҳамма нарсамнинг
Мулкимнинг ҳам, умримнинг ҳам вориси — ажал!

Парис

Бу эртани интизорда кутдим, бекарор,
Э воҳ, эрта менга берган тамошоси бу!

Капулетти хоним

Оҳ, бадбахт кун, нафратли кун, қабоҳат кундуз!
Замонанинг шу азалий, оғир йўлида —
Шундан бадтар, шундай ёмон соат бўлмаган!
Шу умримнинг ёлғиз гули, бир зурриётим,
Якка-ёлғиз саодатим, менинг севинчим,—
Золим ажал олиб кетди уни ҳам қўймай!

Энага

Афсус, афсус! Аччиғ, аччиғ, аччиғ кун бўлди!
Умримдаги кунлардан энг бадбахти шу кун!
Нафратли кун! Шўрлик куним, мусибатли кун!
Умрим бўйи шундай қора кун кўрганим йўқ!
Фалокатли, мусибатли, мотамли куним!

Парис

Мен алдандим, ёлғиз қолдим, хорландим, ўлдим!
Жирканч ўлим, мени ўзинг алдадинг, ўзинг!
Э жафокор, мени эздинг, поймол қилдинг!
Ишқ — ҳаётдир; ҳаёт ўлса ишқ ҳам ўликдир.

Капулетти

Парчаландим, ўлдирилдим, дилпора бўлдим,
Нега келдинг уйимизга, э бадбахт соат,
Тўйимизни бузганими, ўлдирганими?
Фарзандгинам, шўрлик болам, жигарим, жоним!
Сен ўликсан, сен мурдасан, жонгинам, болам!
Шодлигим ҳам илалабад ўлди сен билан!

Лаврентий

Сизга уят! Довдирашдан мотам чоғида —
 Мадад йўқдир. Гўзал қизга сиз билан бирга —
 Шерик эди фалаклар ҳам; аммо ҳозирда —
 Унга эга бўлиб қолди фалакнинг ўзи.
 Унга у ер маъқулроқдир. Сиз ҳиссангизни
 Сақлаб тура олмадингиз ўлим дастидан,
 Тангри бўлса берди унга абадий ҳаёт.
 Ниятингиз Жўльеттани улғайтириш-ди:
 Самовотга кўтаришни хоҳлар эдингиз —
 Ҳозир бўлса у булутдан нарида, баланд —
 Осмонда юрар экан, шунга йиглайсиз?
 Қизингизни лекин чакки севар экансиз,
 У лаззатдан баҳра олса — аччиғланасиз,
 Эри билан узоқ турган бахтиёр эмас,
 Никоҳ бўлгач, ёшроқ ўлган келинлар хушбахт.
 Кўз ёшларин артиб олинг! Розмарин баргин
 Жасадига селиб қўйинг, расм бўйича.
 Ясантириб-безантириб черковга элтинг!
 Фигон-фарёд тудиради жинни табиат,
 Аммо шундан кулиб турар ақлу фаросат!

Капулетти

Шодлик учун тайёрланган барча нарсалар —
 Хизмат қилғай энди қаро, ғамли мақсадга,
 Музикамиз мунгли бўлур марсия каби,
 Худойига айланади тўй зиёфати.
 Машқларимиз мотам куйи, аза бўлғуси,
 Никоҳ учун тайёрланган чечакдасталар —
 Үлиқ келин тобутини кўмади энди,
 Ҳамма нарса тескари бир қиёфа олур.

Лаврентий

Боринг, тақсир! Хоним, сиз ҳам у билан боринг!
 Сиз ҳам боринг граф Парис! Тайёр бўлинглар —

Марҳумани гўрга олиб боргали бирга.
Бу — фалакнинг сизга берган жазоси, холос.
Феълингиздан худонинг ҳам тугабди сабри.

Капулетти, унинг хотини, Парис ва
Лаврентий кетади.

1-созанда

Сурнайларни йиғиштириб ростакам кетищга тўғри
келади.

Энага

Йириб олинг, йиғиб олинг, яхши йигитлар. Бу ерда
қанақа мотам юз берганини кўриб турибсизлар!

Кетади.

1-созанда

Шунақа бўлса ҳам, худо ҳақи, ҳақимизни тўлаш
лари керак.

Петр кириб келади.

Петр

Машшоқлар, ҳой машшоқлар! «Юрак қувончи»,
«Юрак қувончи»ни чалинг! Тирик қолишимни хоҳласа-
ларинг «Юрак қувончи»ни чалинглар!

1-созанда

Нега «Юрак қувончи»ни ахир?

Петр

Ҳой машшоқлар! Чунки менинг юрагим, «Юрагим
жизнинг тўла». айналасини айтяпти. Менга биронта қувонч-
ли, муngли куй чалиб берсаларинг кўнглим юпанади.

1-созанда

Сизга ҳеч нарса чалмаймиз. Ҳозир чалиш маҳали эмас!

Петр

Демак, чалмоқни истамайсизлар?

1-созанда

Иўд!

Петр

Бўлмаса сизга кўрсатаман.

1-созанда

Нимани кўрсатасиз?

Петр

Пул эмас, албатта, шапалоқ кўрсатаман, шаллақи ашулачилар!

1-созанда

Мен ҳам сени табриклайман; малай!

Петр

Қаллангга малай пичогини ўқталсам кўрасан. Қалит ҳам керак эмас. «Фа, ре»ларни сизга кўрсатаман! Биласизми?

1-созанда

«Фа-ре»лар билан кўрсатадиган бўлсангиз, ноталарни билар экансиз-да.

2-созанда

Илтимос қиласиз, пичогингизни яшириб, ақлингизни чиқарсангиз.

П е т р

Ақлимдан әхтиёт бўлинглар! Мен темир пичоғимни яшириб, темир ақлим билан сизларни хўп калтаклайман. Сизлар ҳам менга одам нусхаси бўлиб жавоб беринглар:

Жон бўлса ғам дастида,
Ақлим олиш қасдида,
Қўшиқда кумуш куйлар...

Нега «кумуш куйлар», қани тушунтириб берсангизчи, Симон-Тор?

1-созандада

Чунки кумушнинг жаранглаши ширин.

П е т р

Яхши айтдинг! Хўш, сиз нима дейсиз, Гуго-Қай?

2-созандада

Шу учун «кумуш куйлар» дейиладики, машшоқларга ашула учун кумуш танга тўлайдилар.

П е т р

Бу ҳам яхши! Сиз нима дейсиз, Яков Вақвақ?

3-созандада

Ростинни айтсам, айтолмайман!

П е т р

Майли, кечирасизлар. Сиз ахир ашулачилар. Шу учун «кумуш куйлар» дейилади-ку, машшоқларга тўлайдиган тилла йўқ.

«Қўшиқда кумуш куйлар,
Кўнгилни хушнуд айлар!»

Кетади.

1-созанда

Бу қанақа сассиқ газанда, а?

2-созанда

Қўявер! Э! Ўликни кўмиб бўлиб йигичилар қайтиб
келишини кутайлик, сўнгра баҳам овқатласаниз. (*Ке-
тадилар.*)

У ПАРДА

БИРИНЧИ САҲНА

Мантуя. Кӯча. Ромео кириб келади.

Ромео

Агар тушда кўрганларим ҳақиқат эса,
 Кўрган тушим хушхабарга йўйилса керак.
 Қалбимда бор севгининг шўх парвардигори,
 Шу кун бўйи аллақандай фавқулодда руҳ —
 Мени кўкда енгилгина учирив юрди.
 Гўё ёrim мени ўлик учратган эмиш,—
 Даҳшатли туш: ўлик бўлиб тушда ўйласанг.—
 Үлган эмиш, лабларидан жон кириб танга
 Мен тирилиб император бўлган эмишман.
 Қандай ширип экан севги; ҳатто сояси,—
 Шарпаси ҳам шундай буюк баҳт олиб келар!

Узун этиклар кийгак Балтазар кириб келади.

Веронадан дарак бордир! Салом, Балтазар!
 Сенроҳибдан менга бирон хат келтирдингми?
 Хоним қалай? Қандай экан дадамнинг ҳоли?
 Жульетта-чи? У тўғрида сўраяпман мен!
 У соғ бўлса, демак, ҳамма нарса жо-бажо.

Балтазар

У қиз яхши, ҳеч нарса ҳам ёмон бўлмайди.
 Унинг жисми Капулетти сағанасида.
 Руҳи эса фаришталар ичра яшайди.
 Тобутини онланинг сағанасида

Кўрган ҳамон чопиб келдим сизга айтгали.
Кечирасиз, шум хабарни келтирдим сизга,
Сиз ўзингиз буюргансиз бу вазифани!

Р о м е о

Бу гап ростми? Ҳақиқатми? Оҳ, золим фалак!
Бу ердаги уйимни топ! Қалам, қофоз топ.
Отлар ёлла — мен шу кеча жўнаб кетаман.

Б а л т а з а р

Ялинаман, бунча шошманг, кўзингиз бежо,
Рангларинтиз мусибатдан бермоқда дарак!

Р о м е о

Янглишасан, жим бўл, менинг айтганимни қил.
Авлиёдан менга бирон хат келтирдингми?

Б а л т а з а р

Йўқ, тақсирим!

Р о м е о

Майли, бориб отларни ёлла.
Мен ҳам дарҳол келажакман.

Б а л т а з а р кетади.

Мен сен билан ётажакман бу тун Жульетта!
Иўлдошингман... Изтиробли киши дилига —
Нақадар тез суқуласан ўсаллик, ажаб?!
Доручини хотирладим, яқинда уйи.
У дорулар устасини яқинда кўрдим.
Увадалар ичра эди, йўқсил камбағал.
Кўзларида қашшоқликнинг аччиғ алами.
Дўконида тошбақадан, тимсоҳ, балиқдан
Тулупларни қўйиб қўйган мижозлар учун,

Токчаларда бўш қутилар тизими қатор,
Сопол лаган, катта-кичик шиша идишлар.
Чириб кетган данаклару узуқ чилвирлар,
Ҳабдорилар... Хуллас калом — аянч манзара...
Мен бу бадбаҳт гадойликни кўргач дедимки:
«Бирорига даркор бўлса мабодо ажал:—
Мантуяда шунга жазо — ўлим бўлса ҳам —
Бу ердаги бандар сатар ўша ажални».
Бу тушунча менинг учун бекор бўлмабди,
Ўша гадой менга сатар заҳарни ҳозир.
Хотиримда, унинг уйи шу бўлса керак.
Дўкон бекик, ҳа, айтгандай букун байрам-ку...
Доруфурӯш, ҳой дўкондор!

Д о р и ф у р у ш қелади.

Д о р и ф у р у ш

Ким бу қичқирган?

Р о м е о

Бу ёққа чиқ! Сени жуда йўқсил кўраман,
Буларни ол, бу ерда бор роса қирқ тилла,
Бунга эваз менга керак бир мисқол оғу.
Бир заҳарки томирларга тез заққум әлтсин,
Ҳаётидан безган киши ерга гуп учсин,
Баданидан нафас кетсин шундай қисталанг —
Тўп оғзидан портлаб чиқсан ўқ-дори каби.

Д о р и ф у р у ш

Бундай дору менда бору... Аммо қонунан —
Сотган киши Мантуяда ўлимга маҳкум.

Р о м е о

Ўзинг гадо: ўлимдан-чи, шунча қўрқасан!
Аннр сенинг юзларингда очлик излари,

Кўзларингда муҳтожликнинг, ўлимнинг дарди,
Яғринингда тиланчилик, қашшоқлик, хорлик.
Сенинг дўстинг на дунёдир ва на шу қонун;
Шундай қонун мавжудмикан — сени бойитгай?
Қонунни буз, ма, буни ол, гадойликдан чиқ.

Д о р и ф у р у ш

Ризоликни хоҳиш эмас, гадойлик берур.
(Заҳарни унга беради.)

Р о м е о

Гадойликка пул тўлайман, хоҳишга эмас.

Д о р и ф у р у ш

Бу заҳарни бирон суюқ нарсага қўшиб —
Ундан кейин ичилади; сиздаги мадор —
Йигирмата кишича ҳам бўлса ўласиз.

Р о м е о

Мана олтин -- виждон учун энг ёмон заҳар,
Бу қабоҳат дунёмизда энг ёмон қотил;
У бадтардир ман қилинган шу дорудан ҳам.
Менга заҳар сен сотмадинг, мен сенга сотдим.
Хайр энди, овқат олиб егин, семиргин. —
Заҳар эмас, мен йўлимга олганим, малҳам,
Ёр қабрида сендан лаззат олурман бир дам.

Қетадилар.

ИККИНЧИ САҲНА

Роҳиб Лаврентийнинг кулбаси.
Иоани келади.

Иоани

Ҳой авлиё, роҳиб қардош, биродаримиз!

Лаврентий кириб келади.

Лаврентий

Биродарим Иоаннинг овозидир бу.—
Мантуядан келасизми? Ромео қандай?
Нима деди? Ёки менга мактуб бердими?

Иоанн

Роҳиблардан биттасини олиб кетгани —
Бу шаҳарда излаб қолдим, у шу шаҳарда
Касаллардан хабар олиб, боқиб юради.
Тополдим-у, қўрғондаги дарвазабонлар —
«Бу ваболик ҳовлиларга кириб чиққан», деб —
Дарвозани муҳрлади, бизни тўхтатди,
Шундай қилиб Мантуяга бора олмадик.

Лаврентий

Мактубни·чи? Ромеога ким олиб борди?

Иоанн

Юборишга қўл тегмади, менда турибди —
Ҳатто сенга қайтаришга топмадим имкон;
Ёвуз вабо ҳаммани ҳам чўчитган шунча...

Лаврентий

Оҳ, шум толе, Онт ичаман биродарликка,
Ҳазил эмас-ди ўша хатнинг мундарижаси;
Эгасига етмагани кўп ёмон бўлди.
Битта метин топиб дарров кулбага келтир.

Иоанн

Шу соатда келтираман. (*Кетади.*)

Лаврентий

Сағанага ҳозир ўзим бормоғим лозим,
Уйғонади уч соатдан сўнгра Жульєтта,—

Ромеога хабар қилолмаганим учун
 Менга чексиз лаънатларни ёғдиради у!
 Майли, яна Мантуяга бир хат ёзаман,
 У келгунча яшираман қизни кулбамда.
 Тириклайин бечора қиз ётар тобутда...

Қетади.

УЧИНЧИ САҲНА

Гўристон; у ерда Капулеттилар сағанаси.
 Парис, орқасида гуллар ҳам машъал ушлаган мажрам.

Парис

Хой йигитча, машъални бер, ўзинг нари тур!
 Энди ўчир, токи бизни ҳеч ким кўрмасин!
 Шу дарахтнинг тагида ёт ва шу кавланган
 Ерга қулоқ қўйиб, жуда зийрак бўлиб ёт:
 Гўристонда ҳар бир қадам эшитилар-ку.
 Бунда тупроқ кўп эшилган, бўш ва кавакдир.
 Нимаики эшитолсанг ҳуштак чалиб қўй,
 Бунга одам келганини билурман щундан.
 Гулларни бер, энди жўна, айтганимдай қил!

Мажрам (*ўзича*)

Кўп қўрқаман гўристонда ёлғиз қолишдан;
 Нима қиласай, чора йўқдир, баҳарҳол турай.

(*Яширинади.*)

Парис

Чечакларга кўмиб ташлай никоҳ ётоғин!
 Эй гул, тошу тупроқ бўлди тахтиравонинг.
 Сени энди ювайнми гулоблар билан,
 Еки ўтдай қайноқ бўлган кўз ёш тўкайин?
 Сени яна қайта бошдан гулларга кўмиб,
 Тун қўйнида аччиқ-аччиқ йиглаб ўпайин!

Мажрам ҳуштак чалади.

Бола ҳуштак чалди, демак, кимдир келмоқда!
 Бу ерларга етмиш кимнинг мурдор оёғи?
 Ким бузмоқда менинг севги маросимимни?
 Нима? Машъал? Яшир мени, эй тун, бир нафас!

Яширилади.

Ромео ва Балтазар машъал, метин чўкич ва
 бошқаларни олиб келадилар.

Ромео

Чўкични бер, ҳамда ўша темир метинни!
 Бу хатни ол, эрта билан отамга ёткиз!
 Машъални бер! Ҳаётингдан безмаган бўлсанг —
 Бунда нима кўрсанг, сезсанг, аралашма ҳеч.
 Тушмоқчиман ўлимларнинг бу маконига,
 Хотинимнинг чеҳрасини кўриш муродим;
 Ундан кейин унинг ўлик бармоқларидан
 Қимматбаҳо узукни ҳам чиқармоқчиман:
 Жуда муҳим бир иш учун у менга даркор.
 Энди жўна. Аммо агар қизиқиб қолсанг —
 Ёки пусиб-пойлаб ётсанг, онт ичаманки,—
 Шу ютоққан гўристонда қилиб чилпора
 Танингдаги аъзоларни тўғраб ташлайман.
 Ниятларим ва авзойим ғоят ёввойи,
 Бўкирувчи денгизлардан, оч бир қоплондан
 Даҳшатлидир менинг бугун ёвуз ниятим!

Балтазар

Хўп, кетаман, сизга ҳалал бермайман, тақсир!

Ромео

Дўст бўлганинг исбот бўлур шу билан. Ма, ол!
 (Унга пул беради.)
 Яша, дўстим, баҳтиёр бўл, жўна, алвидо!

Балтазар

(Ўзича)

Ҳар ҳолда бир яширинай. Иш жуда қалтис!
Қарашлари даҳшат тўла, нияти бузуқ.

(Яширинади.)

Ромео

Эй лаънати, очкӯэ оғиз, эй ўлим нафси,
Дунёдаги энг нафис бир вужудин ютдинг!
Сенинг чирик жағларингни бир очиб кўрай,
Зўрлаб сенга едирайин янги бир таом!

Саганани очади.

Парис

Ҳа, бу ўшал Монтеккидир, беҳаё сургун!
Жульеттанинг акасини ўлдирган қотил!
Ушани деб йиглай-йиглай ўлди Жульетта.
Энди азиз жасадни ҳам ҳақорат қилиб
Хўрлагани келган экан. Тутаман уни!

(Олдига келади.)

Бас қил қабиҳ ишларингни, аглаҳ Монтекки!
Қабрда ҳам ўч излайсан. Ортиқ маҳкумсан.
Сени дарҳол қаматаман, юргин орқамдан —
Ажал бошлаб келмиш сени!

Ромео

Мен ўламан. Шу учун ҳам бу ерга келдим.—
Мени қўйгин. Озор берма, чиқиб кет, бола...
Улганларинг тақдиридан ҳайиқ, нари бор!
Ялинаман, олижаноб гўдак, илтимос!
Мени янги гуноҳларга бошлама, бор, кет!
Мен ўзимдан кўра сени ортиқ севаман!

Худо ҳақи, менинг қасдим фақат ўзимга.
Тезроқ қочгин ва яшагин, сўнгра айтарсан:
— Девонанинг илтифоти умримга боис.—

Парис

Ялинишинг-ёлворишинг менга жирканчdir,
Сени ҳозир қаматаман, сен, жинояткор.

Ромео

Менга ифво қилмоқчисан? Ма, бефаҳм бола!

Уришадилар.

Махрам

Уришадилар, сақла тангрим! Соқчи чақирай.

Парис

Яраландим (*йиқилади.*)

Агар сенда бўлса марҳамат,
Гўрни очиб Жульеттанинг ёнига қўйгин. (*Улади.*)

Ромео

Хўп, қўярман,— қани бунинг юзини кўрай:
Меркуцио қариндоши, граф Парис-ку!
Менга, менинг азиз кишим нима деган-ди?
Гапларини эшитмадим ҳаяжонланиб.
У дедики: Жульеттани граф олмоқчи,
У айтдими ёхуд буни тушимда кўрдим?
Ёки ҳозир Жульеттанинг номин эшитиб,
Ақлимдан ҳам озганимми? Қўлингни бергил,
Сен ила мен бир ёзилдик ғам китобига!
Ҳашаматли гўрга сени қўяман, ўсмир!
Гўр ичиди эмас, балки, ёрқин гумбазда.
Жульетта ҳам бу ердадир, мана сағана —
Шу туфайли қанча ёруғ, базмгоҳ каби:
Э, мурда, ёт, сени кўмган киши ҳам мурда!

(Парисни саганага қўяди.)

Кўп бўлади, одамзодлар ўлмасдан олдин
 Туядилар аллақандай масаррат — шодлик!
 Бу ҳолатга ўлим олди яшин дейдилар.
 Аммо мени бўладими дейилса хурсанд?
 Менинг севгим, э хотиним! Нафасларингдан
 Ўлим шимиб олган бўлса ҳамки асални,
 Аммо ҳуснинг устида у ҳукмрон эмас.
 Сен ўлимга бўйсунмабсан — ҳуснинг белгиси —
 Лабларингнинг, юзларингнинг гулғунчасидир;
 Тикилмабди ажалларнинг сўлғун байроби...
 Тибальт, сей ҳам бу ердасан, қонли кафандай!
 Бундан ортиқ сенга қандай ҳурмат қиласайки,
 Ешлигингни ҳалок этган шу қўллар билан —
 Чок-чок қилиб парчалайман ёвингни сенинг.
 Кечир, қардош! Мен ўзимни ҳалок қиласман.
 Сен ҳали ҳам нега шунча гўзал, Жульетта?
 Тансиз ўлим сенга ошиқ бўлган, ажабо?
 Ё у ориқ, мурдор жаллод зимиstonлика
 Ўз нафсига эрмак учун сени сақларми?
 Рашқ қиласман, шу учун ҳам сен-ла қоламан,
 Энди асло мен кетмайман қора қасрдан.
 Канизларинг бўлган қўртлар билан қоламан.
 Бунда менга бошланади абадий ором.
 Бунда ортиқ иргитарман ҳоргин бўйнимдан
 Ўша машъум юлдузларнинг бўйинтуругин.—
 Сўнгги марта; кўзлар, боқинг, қўллар, қучоқланг!
 Эй ҳаётнинг эшиклари бўлган лаблар, сиз —
 Ўлим билан аҳд қилишинг бўса орқали!—
 Сен, қани кел, менинг аччиғ, бадбўй етакчим,
 Умидлардан, ҳаваслардан холи дорғам, кел —
 Қояларга уриб синтир мўрт қайирикимни.
 Севгим учун мен ичаман (иҷади).

Дорунг зўр экан,
 Баракалла, доруфуруш. Упид ўламан (ўлади)

Гўристоннинг бошқа томонидан роҳиб **Лаврентий**
фонус, чўкич ҳам курак кўтариб кириб келади.

Лаврентий

Сендан мадад, э муқаддас, авлиё Франциск,
Қабрларга кўп қоқилдим.— Бу ердаги ким?

Балтазар

Сизни яхши биладиган бир дўстингиздир!

Лаврентий

Омон бўлинг, меҳрибон дўст, менга айтинг-чи:
Уша кўэсиз бошчаноқлар ва қуртлар учун
Беҳудага ёниб турган машъал кимники?
У ёнмоқда Капулетти сағанасида?

Балтазар

Ҳа, шундайдир азиз пиrim, ўша ердаги
Сиз кўп яхши кўрганингиз, менинг афандим.

Лаврентий

Ким экан у?

Балтазар

У — Ромео.

Лаврентий

Кўпдан берими?

Балтазар

Ядим соат бўлиб қолди.

Лаврентий

Юр, сағанага!

Б ал т а з а р

Йўқ, бу ердан кет деган-ди, менинг афандим,
Агар пойлаб қолсанг бунда мутлақо, сени —
Үлдирман, деган эди.

Л а в р е н т и й

Майли, қол, кетдим.
Бирон бало бўлмасин деб қўрқаётибман.

Б ал т а з а р

Бу дарахтнинг тагида мен ухлаганимда,
Тушда кўрдим ким биландир уришди хўжам;
Ва ўлдирди рақибини.

Л а в р е н т и й

Ким, Ромеоми?

Сағанага яқинлашади.

Э воҳ, э воҳ, бу кимларнинг қонларирикни,
Сағананинг тош зинасин булғаб қўйибди?
Одамзоднинг оромгоҳи, сўнгги манзилга —
Ушбу қонли қиличларни кимлар ташлабди?

Сағанага кириб келади.

Оҳ, Ромео! Қандай сўлғун! Яна ким? Парис!
Қора қонга беланибди! Бу шум қазога
Сабаб бўлди экан қайси ноқулай соат?
Қиз уйғонди.

Жульетта уйғонади.

Ж у л ь е т т а

Оҳ, меҳрибон отагинам! Қани соҳибим?
Мен қаерда бўлишимни яхши биламан.
Мана бунда. Айтинг, қани менинг Ромеом?

Саҳна орқасида шовқин.

Лаврентий

Ана шовқин! Тургин, қизим, дарҳол кетайлик,
Юқимликлар, мудҳиш тушлар, ўрин уйидан.—
Биздан ҳам зўр худо бузди ниятимизни.
Юр, кетайлик — ўлик эринг ётар кўксингда,
Бу томонда жонсиз Парис. Юр, сени элтай
Монастирга, тарки дунё опаларингга.
Сўрамай юр, кечикасан! Мана — соқчилар.
Юр, Жульетта! Ортиқ бунда қололмайман мен.

Лаврентий кетади.

Жульетта

Бор, кета бер! Мен бормайман! Буниси нима?
Севгилимнинг қўлида бу қанақа шиша?
Заҳар экан, шундай бевақт ўлимга сабаб.—
Қандай хасис! Ўзи ичиб ҳамма заҳарни—
Бир қатра ҳам қолдирмабди менга кўмакка.
Лабларидан бир ўпаман, балки ҳали ҳам—
Заҳар бордир дудоқларда, бу сўнгги бўса—
Менга кучу қувват берар ўлим олдидан.

(Ромеони ўлади.)

Ҳали лаблар иссиқ экан.

1 - соқчи
(саҳна орқасидан)
Юр, кўрсат, бола!

Жульетта

Ана шовқин! Жадал бўлай! Эй баҳтли пичоқ!
(Ромеонинг пичогини қинидан чиқаради.)
Менга тезроқ ўлим келтири!
(Ўзига пичоқ уради.)
Кўксим — ғилофинг!

Ромеонинг жасади устига йиқилиб ұлади.
Парисининг маҳрами билан соқчилар кириб
келади.

Маҳрам

Мана бу ер! Ана, машъал ҳамон ёнмоқда!
1 - соқчи

Ҳамма ер қон. Гүристонни тез қараб чиқинг!
Ким учраса суриштиrmай құлларин боғланы!
Бунда граф үлік ётар, ачинарлы ҳол!
Уч кун олдин күмилганди бунга Жүльетта,
Аммо ҳозыр тани иссиқ, қон совумаган.
Бекка чолинг! Хабар қилинг Капулеттига!
Ҳаммасини чақириңглар! Монтеккини ҳам!
Тупроқ ботди мусибатға, қонларға тамом,
Аммо бунинг боисини билмаймиз асло:
Биз-ку ҳукм беролмаймиз тергов қымасдан.

Балтазар ва соқчилардан бир нечтасы
кириб келади.

2 - соқчи

Бунда экан Ромеонинг хизматкори ҳам.

1 - соқчи

Бек келгунча қочирмайин ушлаб туриңглар!
Бир неча соқчи биләй Роҳиб Лаврентий
кириб келади.

Роҳиб бунда андишада титраб йиғлайды,
Биз құлидан курак билан мисрангии олдик.
У бу ерда, гүристондан кетаётганди.

1 - соқчи

Шубҳали ҳол. Ушлаб туриң!

Бек үз яқинлари биләй хириб келади.

Бек

Эрталабки уйқумизни ҳаром айлаган —
Қандай қазо юз берибди яна бу ерда?

Капулетти, унинг хотини ва бошқалар кириб
келади.

Нима бўпти? Нимага бу шовқин-суронлар?

Капулетти

Қўчаларда оломон гоҳ: «Ромео» дейди,
Гоҳ бақирар «Жульетта!» деб, гоҳо «Парис!» деб,
Ҳамма сарсон, ёпирилган сағанамизга.

Бек

Қандай даҳшат экан бизни қилган безовта?

1-соқчи

Соҳибфармон, бунда Парис ўлиқ ётибди,
Ромео ҳам, Жульетта ҳам бу ерда бежон.
Эндигина ўлдирилган, танлари иссиқ.

Бек

Излаб топинг, бу шабхуннинг гуноҳкорларин!

1-соқчи

Бу — Ромео хизматкори; ана бу роҳиб.
Сағанани очадиган асбоб-ярогии —
Биз булардан тинтиб топдик.

Капулетти

Хотин, қара, қонлар нечук тўкилар бевақт!
Янглишибди ўша пичоқ, унинг филофи
Монтеккининг биқинида бўм-бўш ётибди.
Кин ўрнига Жульеттамнинг бағрига кирмиши!

Капулетти хоним

Шўрлик бошим! Бу кўргилик кекса чоғимда —
Улим мунги чалаётган мотам оҳанги!

Монтекки ва бошқалар кириб келадилар.

Бек

Монтекки, сен ўз уйқунгдан бевақт турибсан,
Боқ, ягона ўғлинг бевақт чўзилиб ётар.

Монтекки

Хукмдорим, шу кечаси хотиним ўлди.
Сургундаги фарзандининг ғам-ҳасратидан:
Яна қандай мусибатни кўргим бор экан?

Бек

Боқиб кўргин!

Монтекки

Нодон ўғил! Бу қанақа беэҳтиромлик —
Ўз отангни якка қўйиб гўрга шошибсан!

Бек

Бизлар, тамом, бу таажжуб ишнинг бошини,
Авж пайтини, охирини аниқлагунча —
Сизлар сира шикоятга оғиз очманлар.—
Ундан кейин ўзим бошлиқ фарёдингизни —
Қабргача элтиб борай. Ҳозир-чи, сизлар —
Аламларни ром қилинглар сабру тоқатга.—
Ушланилган одамларни олиб келинглар!

Лаврентий

Бошлиқ мемман, гарчи ишда қатнашим андак:
Бу даҳшатли ўлимларнинг пайти, макони —
Гўё менга қарши оғир айномадир.

Мен бў ерда оқловчиман ҳам қораловчи:
Ҳам оқлайман ўз-ўзимни, ҳам қоралайман

Бек

Билганингнинг ҳаммасини айтиб бер дарҳол!!
Лаврентий

Гапим қисқа,— зотан умрим ҳам қисқа қолди:
Ачинарли қиссадан ҳам қисқа муҳлатим.
Жульеттанинг эри эди ўлик Ромео,
Унга шаръий хотин эди жонсиз Жульетта.
Никоҳларин мен ўқидим, худди ўша кун
Тибалът қатл қилинганди билганингиздай.
Бу туфайли янги кӯёв сургунга кетди;
Тибалът учун эмас эди қизнинг йигиси.
Аммо сизлар бу мотамни бостирайин деб —
Уни қистаб истадингиз графга тегсин.
Хузурумга келди дарров у безовта қиз,
Ва иккинчи бир никоҳдан қутулмоқ учун —
Девонавор кўзлар билан мадад сўради,
Иўқса ўзин ўлдирмоқчи эди кулбада.
Ўшанда мен синаб-синаб тополганимдан —
Ухлатувчан дору бердим; ўйлаганимдай —
Дору берди унга худди ўлик тусини.
Ўша чоғда Ромеога бир мактуб ёздим,
У даҳшатли тунда келиб, мунтазир қизни —
Жульеттани уйғонгандা олиб кетсин деб.
Юборганим роҳиб эса — Иоанн эди.
Тасодифан, қўлга тушиб бора олмади;
Ва бу кеча қайтиб берди мактубни менга.
Шуандан кейин, пойлаб қизнинг уйғониши пайтин —
Уни олиб тез чиқай деб келдим мозорга.
То, Ромео бундан хабар топиб келгунча —
Яширмоқчи эдим уни хонақоҳимда...
Афсусларки, муҳлатидан зигирдак олдин —
Етиб келсам, ётган эди бунда ўликлар —

Шу вафокор Ромео ҳам мўътабар Парис.
 Қиз уйғонгач мен ялиниб илтимос қилдим:
 Дарҳол чиқиб бўйсунгай, деб амри худога.
 Мени шовқин ҳайқтириди; у эса шошиб,
 Истамади бундан бирга чиқиб кетишни —
 Ва ўзини шунда ҳалок қилган чамаси.
 Мана ҳамма билганим шу. Аммо тўйгача —
 Бўлган барча гапни айтиб бергай энага.
 Модомики, бу мотамга айборд мениман,
 Муҳлатидан олдин олиб қўйинг жонимни,
 Қурбон бўлсин менинг жоним одил қонунга.

Бек

Пири комил, деганлари, сени рост экан.—
 Ромеонинг қароли-чи? У нима дейди?

Балтазар

Ромеога Жульєттанинг ўлганин айтдим;
 Буни билгач Мантуядан отланиб дарҳол,
 Келиб қолди сағанага — ана шу ерга.
 Бу мактубни отасига тайинлаб берди;
 Сўнгра тушди сағанага, менга буюрди:
 «Жон ўзингга даркор бўлса, бу ердан даф бўл!»

Бек

Сен мактубни менга бергин, ўқиб кўрайин.—
 Соқчиларни айтиб келган маҳрам қаерда?—
 Соҳибининг нима қилиб бу ерга келган?

Маҳрам

Гулдасталар билан келди хоним қабрига,
 Менга айтди: кутиб тургин; риоя қилдим.

Бирдан кимдир, қўлда машъал, гўрни очмоқчи.
Унга ҳамла қилиб қолди менинг афандим,—
Уша замон соқчиларга қараб югурдим.

Бек

Таъкидлайди роҳиб гапин хатнинг мазмуни,
Ишқ тарихин, бу ўлимнинг саргузаштин ҳам.
Езибдики, шаҳардаги бағоят йўқсил—
Доручидан оғу олдим ва ўлмак учун
Сағанага жўнадимки, Жўльетта билан
Бир тобутда ўлиб ётай. Мана... Вассалом!
Ҳой, Монтекки, Қапулетти, қани ғанимлар!
Мана қамчи топилибди нафратингизга:
Гулингизни сўлдирмишdir фалак ишқ билан!
А—мен бўлсан, парво қилмай низоингизга,
Икки яқин қариндошдан айрилдим: ибрат!

Қапулетти

Э Монтекки, биродарим, қўлингни бергии;
Бер, у бева Жўльеттанинг ҳурмати учун;
Бундан ортиқ хоҳишим йўқ!

Монтекки

Мен бўш келмайман:
Мен олтиндан қизга битта ҳайкал қўйдираи.
Қанча турса Веронамиз Верона бўлиб,
Вафодорлар вафодори қизнинг ҳайкали—
Ҳамма бўлак ҳайкаллардан бебаҳо бўлгай!

Қапулетти

Унга қатор бўлиб туарар олтин Ромео!
Оҳ, биз шўрлик, кўр хусумат қурбонлари, оҳ!

Бек

Ҳаммангизга тонг келтирди мотамсаро сулҳ,
 Ҳатто қалқмоқ истамайди аламли қуёш.
 Юринг, ҳали кенгаш қуриб ўйламоқ керак —
 Қимга — биздан илтифоту қимларга жазо!
 Ромео ва Жульеттанинг қиссасидан ҳам,—
 Ғамли қисса кўрган эмас тарихда олам!

Кетадилар.